

XTIIDZ NDZON DIOS MIÑE PQUIAA LUC

¡Diuzh Tiofl!

¹ Nanle luu ganle, nole bla zha ne bioxco pquiaa zho grë ncuaane goc zeeñe biaad Jesús meñ ne pxeel Dios ga.

² Ncuaane nlipaa goca, grë ncuaane pquiaa zho ga, laaw pquiaa zho zigne rzodiidzse miecha len dze rii, zigne rzodiidzsegaa zha ne bzëniepaa mew, zha ne pso me noneew lo miech.

³ Yeque naa pquiaa naa wen wen bhabdiidz naa, bleeni naa diidz grëse dien zha psilo grë ncuaan co; ni niina laa naa rquiaw zigne gocsew laaw rxel naa lo luu. Sac rien naa ib nonguiela gacnañ luuw;

⁴ zeeña lozh gacnañ luu zha nac diidzli rii, wseed ne blu zho lo luu i.

⁵ Len dze ne nac Herod rey rnabey me dib xtan zha Judé, len dze co no tib pxoz lë Zacarí, me nac tib zha ne nacgrë “Zha Abí”. Niicle tseeel mew, zha xtii pxoz Aarón ziaad wnaa co, lë me Lisabet.

⁶ Zigtaa Zacaríw, zigtaa Lisabeta, noxco me miñe rnabey Dios, mban mew zigne naca, ni tib xley Dios rguitsd me.

⁷ Meñ gol-le nac me grop me, per ni tib mëed quianied me, sac niaad Lisabet gapd me mëed.

⁸ Laa tib dzew bgaa grë zha ne nacgrë Zacarí gun zho dziin len yadoo.

⁹ Nac xcostumbr grë zha ne nac pxoz, rio zho tib rif dien chopaa yгаа tsielaadz goxyaal len yadoo, dzigo bгаа Zacarí.

¹⁰ Goxyaal co nolaadz me len yadoo, laa grë miech ne ndxie nëz ley nonabгаа lo Dios,

¹¹ tibaque zeene brieequia tib xanjl Dios bzo cue pcoog nëz derech, zaatne nozëëg me yaal ga.

¹² Zeene gon me anjl co bdzieb me, rdzieldraa me zha gun me lo dzeb co.

¹³ Dzigo rëb anjl co lo me:

—¡Gdzieebd luu! Diidzse zialnie naa lo luu, gac-nañ luu ganle mine bnab luu lo Dios ga, pquiaadiag mew; gane niina laa tsiel luu gap tib mëëdbgui. Zeene gal win, Juan cueelë to win.

¹⁴ Tib guielbley nroob gac win lo to, niicle lo grëragaa miecha,

¹⁵ sac tib men nziuu gac win lo Dios. Zeene gac win zha broob, ni tib ro nziu guied win, per ni vin yquiaarod win; ansraa gal win, laa Espíritu Sant nacniele win.

¹⁶ Win gac men ne co guic nzian grë zha Israel, gbiire gbig zho lo Dios, men ne rnabey zho.

¹⁷ Zigne goc Lí, men ne biaad pteed xtiidz me padzeela, sca gac win tedner win lo me, nroob poder ne gap win. Win gnee lo grë miech rii, gbiire gleynie zho me zigne goc xmenjol zho zha ne bleynie me; csaan zho grë xquieintseeb zho, gban zho zigne racladz me; zeena niowse gac zho ycaania zho me.

¹⁸ Pquiab Zacarí rëb Zacarí lo anjl co:

—¡Ncuane gacd i gon rnee luu! Zigtaa naaw, zigtaa tsiel naaw, menjol-le nac no.

¹⁹ Rëbchaa anjl co:

—Bieñ ganle anjl Gabriel nu quianee lo luu, anjl ne tibaque zo lo Dios. Me pxeel naa zialnie naa diidz rii.

²⁰ Per ne squi riladzd luuw, na laa luu guiaan ngop, haxta gal dze ne gac miñe rne naa lo luu nu, dze co glan xtiidz luu stib.

²¹ Grë miech ne ndxie quianab lo Dios ga, quiambëz zho Zacarí, rnabdiidzlsa zho pe goc me, sac ran zho rried me zaatne ziezëëg me yaal ga.

²² Zeene brieë me, gon zho gacdraa gnee me, dzigo bieñ zho no pe blu Dios lo me ga. Tel pe racladz me gnee me, niapse señ rlu me.

²³ Bzase dze ne beñ me dziin leñ yadoo, dzigo laa me zey lidz me.

²⁴ Goca bla ngbidz, laa mëed co pquialo zdoosieel me.

Dipse leñ gaay mëë bio zhuz co ro yu, ib brieded me, rley me rnee me:

²⁵ —¡Zha wentaa Dios, bneedz me diidz bdziñ dze yquianie naa mëed rii, zeena gzhidzniedraa miech naa!

Güeynie tib anjl diidz laa Jesús gac mëed

²⁶ Goc xoop mëë zoney Lisabet mëed, pxeel Dios anjl co stib güey me Nazaret, guiedz ne ndxie xtan zha Galilé.

²⁷ Ga no tib ndzooop nguieg lë Marí, leñ dze co no xtiidz ndzooop co ctsieelna ndzooop tib zha xtií rey David, lë José.

²⁸ Bdziñ anjl co zaatne no ndzooop, pquiaabduzh me ndzooop, rëb me:

—¡Dichos luu gon, sac tib zha nziuu nac luu lo Dios! Me quianap luu.

²⁹ Zeene gon Marí anjl co, ni gon Marí zha rnee me, bzee zdoo Marí, riend Marí dien pe nac scataa rzë xtiidz me.

³⁰ Dzigo rëbchaa me lo Marí:

—¡Gdziebd luu! Laa Dios gon bzooblo luu yгаа luu tib guieInzaac nroob.

³¹ Zdoo luu yquiaalo tib mөөdbgui, zeene laa win gal, JESUS cueelë luu win.

³² Tib men nroob gac win, zien miech ganle Xpөөd Dios ro ne no gbaa nac win; ni so me win gnabey win zig bnabey xmengol win David.

³³ Win gnabey lo grëse zha Israel, ni gdziind dze ne lozh xquieInabey win.

³⁴ Pquiab Marí rëb Marí lo anjl co:

—¿Mөөd ye? ¿Per zha grieelo gap naa mөөd, ni tib naa zo nu?

³⁵ Rëbchaa anjl co:

—Niapse por poder ne rap Dios gac min co. Zeene laa Espiritu Sant guiaad gacnie luu, hor co laa poder co gacnie luu, laa mөөd co yquiaalo zdoo luu; gacxe waa Xpөөd Dios gunbey miech win, mine rnabey Dios min co gun win.

³⁶ Ye belyeen luu Lisabet, niina lo guieIgol-le laa tib mөөd pquialo zdoo me; zëeb diidz ib grieelod gap me mөөd, per na racle xoop mөө zoney me mөөd,

³⁷ sac par Dios tsod ncuaane grieelod gac.

³⁸ Dzigo rëb Marí:

—Tel scaw, mine rnee luu i, maase gaca. Laa naa zo nu par gun naa mine gnabeytaa Dios naa.

Blozhse ga, laa anjl co zey.

Güeygan Marí Lisabet

³⁹⁻⁴⁰ Goc bla dzew, brieë Marí ga zie me ziegan me Lisabet tib guiedz win ne ndxie gui glaa ne nac xtan zha Judé.

⁴¹ Bdziñ me, wbig me pquiaabdiuzh me Lisabet. Bdiuzh co bnee me, zeeñe biasoli xpëéd Lisabet zdoo Lisabet; dzigo hor co bdeed Espíritu Sant guielbiini lo Lisabet,

⁴² nguiedz bnee Lisabet rëb me lo Marí:

—¡Dichos luu Marí bгаа luu guielnzaac qui! Sac gon, lo grëraa no nac no meñ wnaa, luu bzooblo Dios. Mëéd ne zoney luu i, zha nziuu nac win lo me.

⁴³ ¡Ib guiaanladz naa dze rii, znu biaad luu nac luu xniaa meñ ne rnabey naa, biaadgan luu naa!

⁴⁴ Haxta mëéd ne zoney naa nu, rley win biasoli win zdoo naa, zeeñe pquiaabdiuzh luu naa.

⁴⁵ ¡Dichos luu, bin luu miñe në Dios, ni bliladz luu zun mew!

⁴⁶ Dzigo hor co bnee Marí rëb me:

¡Meñ nroob nac Dios! ¡Gdib zdoo naa roolnie naa me!

⁴⁷⁻⁴⁸ Rleynie naa me nac me meñ ne psilaa naa, sac gon niicle peet nond naa, tib ngundziin winse nac naa lo me, per laa me bzooblo naa.

Grë miech, zigtaa leñ dze riiw, zigtaa leñ dze ne ziaadragaaw,

ziab zho naa nac tib wnaa ne mazdraa dichos.

⁴⁹ Ne nligaa zha nactaa guielnzaac rii bneedz me lo naa.

Meñ ro, meñ nroob nac me, ¡guiendraa cho zig me!

⁵⁰ Grëse miecha, zha ne rioxco rquiaadiag miñe rnabey me,

tibaque racnie me zho, ib rsaand me zho.

51 ꞑGolwi ganle zha nactaa grë ncuaaṅe run me!
Grë ncuaaṅe no guic zha niats guṅ zho, bnitlo
mew,

52 ptiche me grë zha ne zob rnabey.

Laa grë zha ndooladz, zha ne rzac miech peet
nond,

beenṅon me zho.

53 Grë zha mban ne guiṅd pe yquuin, nroob
guiṅnzaac ne bdeed me lo zho,

laa grë zha ne rapchen, scase bzonëz me zho.

54 ꞑPe zhidaa ziyacnie me grë zha ne nac xtii Israel,
meṅgol ne goc zig tib ngunḍziin lo me ga!
ꞑTibaque rlu me rleynie me zho!

55 Ib biaanladzd me xtiidz me miṅe bnee me lo
pxozgol ne Abraham,

zeṅe rëb me gdziṅd zhe ne csaan me Abraham, ni
grëraa zha ne grieequia lo xtii Abraham.

56 Maase tson mëë biaan Marí ga blëz me lo
Lisabet, dzigora wbi me ga bdziṅ me lidz me stib.

Gol xpëed Lisabet

57 Bdziṅ dzew, laa xpëed Lisabet bza mëë, laa me
gop win.

58 Grë zha ne no gax lidz me, grë zha ne nac
meṅlidz me, zeṅe bin zho scataa pquia zdoo Dios
me bdeed Dios mëed co lo me, rley zho güeygan zho
me.

59 Dze ne goc mëëdbgui yeṅ co xon ngbidz,
blalaa zha ne güeynal zhits pxoz win, zhits xniaa
win güeynie zho win bio win bey ne rio xpëëdbgui
zha Israel, parne glu lo Dios ngab win. Tibaque
naṅ zho Zacarí nrieelë win, zigne lëque pxoz win,
haxta scale nonee zho lo win,

⁶⁰ per hor co rëb Lisabet, led scad gac lë win, Juan grieelë win.

⁶¹ Dzigo pquiab zho rëb zho:

—¿Pe nacne sca grieelë win? Ni tib menlidz to lëd Juan.

⁶² Bnabdiidzaque zho lo pxoz win, blu zho señ lo me dien zha racladz me gac lë win.

⁶³ Dzigo bnab me bdeed zho tib lë lo zaatne yquiaa me; bzee zdoo zho zeene blozh pquiaa me gon zho rnee lo co: “Juan grieelë win.”

⁶⁴ Loxaque blozh dze sca pquiaa me, zeene laa me wbiire bnee stib, psilo me rdeed me xquizh lo Dios.

⁶⁵ Grë zha ne zo ga, zha ne runbey me, zeene gon zhow, per nli rzee zdoo zho.

(Nëzrii nëzrec bzhoon diidz laa mëed co gol, grëse guiedz ne ndxie gui glaa co gocnan miecha.

⁶⁶ Zha ne rona, rza zdoo zho rnee zho: “¿Bay cho gac mëdyeen co?” Sac nligaa rlu nacie Dios win.)

⁶⁷ Horco bdeed Espíritu Sant guielbiini lo Zacarí, psilo me bnee me rëb me:

⁶⁸ ¡Xquizh xquielnzaac men nroob ne rnabey, men ne nac xDios ne nac ne zha Israel! Sac gon laa me ziaad, ziaadgan me ne, ziadbee me ne lo xquielnë ne.

⁶⁹ Nasi laa me pxeel men nroob ne ziaadsilaa ne, lëe men co ga no grieequia lo zha xtii David, men ne been xtsiin me ga.

⁷⁰ Padzeelale bzeet me cxeel me men co, grë zha ne biaad pteed xtiidz me, bzeet zhow.

⁷¹ Rëb zho, ib sxeel me men ne guiaadsilaa ne ladznia zha ne nosacsi ne, zha ne rlëe lo ne.

72 Sac ib gdziṅd dze csaan me grë zha xti p̄xozgol ne, r̄quiānēpaa zdoo me zho.

Ib guiaaṅladzd me miṅe rëb me lo Abraham,

73 zeeṅe rëb me laa me cxeel̄ meṅ ne csilaa ne,

74 zeeṅa dziodzebdraa ne lo zha ne rlëë lo ne, lo zha ne rsacsi ne;

sinque iṅe tibli gac ne dziuun̄ ne miṅe rnabey me.

75 Gzataa dze ne gneedz me guiel̄mban lo ne,

iṅe mbe zdoo ne, dziuun̄ ne miṅe rleynie me.

76 Luu goṅ xin, bzooblo Dios ro ne zob gbaa, cteed xtiidz me lo miech,

luu tedner tsienee luu lo zho, laa meṅ co no guiaad.

77 Luu gnee lo grë zha Israel, guieṅ zho gaṅle zha guṅ Dios zho perdon, parne ycaania me zho.

78 Ne nligaa rleynie me ne, r̄quia zdoo me ne, gane laa me cxeel̄ Xpëed me, meṅ co gac zig tib biini,

79 Biini co gziini lo grë zha ne mban lo guiel̄cow, zeeṅa biini co glu nëz lo ne, guio ne nëz ne peet zhgab, peet dzeb guieṅd.

80 Zigse zie dzew, scase scase zierooob mëdyeen̄ co, ni scaquegaa dib zdoo win rleynie win Dios. Zeeṅe laa win broobpaa, dzigo güey win bio win tib dan zit, haxta bdziṅ dze ne laa win psilo pseed miech laa win blulo lo zho.

2

Gol Jesús
(Mt. 1:18-25)

¹ Lëëtaaque leṅ dze co, laa August, rey nroob ne zob Roma, bnabey top lë grëse miech ne no dib dan ne rnabey me, par gacnaṅ me dien palal zho.

² Lëë primer vuelt ga ptop zho lë miech, lëë iz co zob meṅ ne lë Cirein zobnabey me guiedz Siria.

³ Bnabey August grëse miech zha ne no stib ladz beṅ, laa zho no tsie zaatne nacpaa ladz zho tsiedeed zho lë zho, parne ga ygab zho.

⁴ Miṅ co nagonṅ nacne brieë José guiedz Nazaret (xtan Galilé) grop me Marí zie me Belén (xtan Judé). Laa me zie ga, sac ga goc ladz xmengol me rey David.

⁵ Gard ctsieelniapaa me Marí, per nole xtiidz me grop me. Leṅ dze co ziaadyobpaa gal xpëëd Marí.

⁶⁻⁷ Bdziṅ me Belén, bgaadraa me zaatne nrieelo mbëz me leṅ yu, lega nac ti leṅ lidz ma bdeed zho blëz me. Lëëtaaque bdziṅ me ga, laa mëëd co gol. Racse Marí pcheṅ me win lar, bdiix me win tib leṅ yag ne row ma guizh; lëë mëëdglo ga lo me.

⁸ Guieel co, blalaa zha ne nac baxtor, laa zho ndxie quianap zho xpëcwxiiil zho dan,

⁹ tibaque zeene brieequia tib xanjṅ Dios lo zho, dipse zaatne ndxie zho ga biab tib biini nroob. Zeene gonṅ zho anjṅ co, gonṅ zho biini nroob co, per nli bdzieb zho.

¹⁰ Dzigo bnee anjṅ co, rëb me lo zho:

— ¡Gdziebde to! ¡Golgon diidz cub ne ganle zialnie naa lo to nu! ¡Tib guieṅbley nroob gac diidz riṅ lo grëse miech!

¹¹ Meṅ ne gonṅ quiambëz to ga guiaad csilaa to, laa me blansole lo guidzliu. Me nac Meṅ ne zëëble diidz ga cxeelṅ Dios, me nac meṅ ndzon ne

rnabey. Belén, zaatne goc ladz rey David, ga gol me naguieel.

¹² Goltsie, zaatne tsiedziel to tib mēēdbgui yeen, nrielse win lar zhoob win len yag ne row ma guizh, lēē me ga.

¹³ Tibaque zeene gon zho laa stib dzoon anjl briequia gocgrē anjl ne quianee lo zho ga, psilo grē anjl co roolnie zho Dios, rnee zho:

¹⁴ ¡Haxta zaatne glaaraa gbaa, nozhoobnen ganle pa lotaa men nroob nac Dios!

¡Nasi, grēse miech zrieelo guiaanwen zho lo me; zdoos me rala laa me nobedz zho!

¹⁵ Zeene laa grē anjl co zey gbaa stib, psilo grē baxtor co rnee zho:

—¡Niinaga golgotsaa guio Belén! ¡Gotsaa guiowi ne dien, zeena dzian ne mine biaadnie anjl co diidz lo ne nu!

¹⁶ Lēēlēd bio zho nēz laa zho zie. Bdzin zho zaatne blēz José ga grop Marí, nligaa laa mēdyeen co nix ga, nixse win tib len yag ne row ma guizh.

¹⁷ Dzigo bzodiidz zho grēse zha rēb anjl co lo zho, zeene güeynie me diidz laa win gol.

¹⁸⁻¹⁹ Grē zha ne bina, per nli rzee zdoos zho; laa Marí nosew zdoos me, tibaque rsoladz mew.

²⁰ Blozh ga, laa zho bio nēz ziequianap zho xma zho stib. Ine roolnie zho Dios, rdeed zho xquizh lo me sca pxeel me xanjl me güeynie diidz lo zho, rley zho sac brieelo gon zho mēdyeen co.

²¹ Dze ne goc xon ngbidz gol win, dze co bio win bey ne rio xpēēdbgui zha Israel, par glu xnēz Dios ngab zho; dze coquew bleelē zho win JESUS, zigne rēb xanjl Dios zeene güeynie me diidz ne laa win gac mēēd lo Marí.

Güeynie zho Jesús yadoo

22-24 Nac ley ne psan Moisés lo zha Israel, wnaa ne sca rap mēēdbgui, zeene rac zho tap zhmal, none tsienie zho chop ma cogon zho len yadoo; yase tsienie zho tib nēz coc, tib nēzga palom. Ni rnabeya: “Grēse mēēdbgui ne rac mēēdglo, ib none gdeed zho win gac win tib zha ne gun xtsiin Dios.” Nacne zeene bza dze co, dzigo brie Marí zie me Jerusalén grop me José, zienie me mēdyeen co yadoo csañ me win ladznia Dios; lēē nēzle ga zienieque me gon ne no gdeed me ga.

25 Lēētaaque dze ne bdziñnie zho win len yadoo, laa tib men lē Simeón no ga. Men Jerusalén nac men co, rleynie me Dios, rioxco me mban me zigne rnabey Dios, ni nacie Espíritu Sant me. Quiambēz me gan me Men ne nole diidz ga cxeel Dios csilaa zha Israel,

26 sac rēble Espíritu Sant lo me ible laa me no gan men co.

27 Laa dze co, Espíritu Santaque psiaab guic me zie me yadoo. Nacne lēētaque no me len yadoo, laa zho bdziñnie mēdyeen co ga, ziesañ zho win ladznia Dios zigne rnabey ley.

28 Dzigo me wbig bdeedz win, rdeed me xquizh lo Dios, rēb me:

29 Xquizh xquielnzaac luu Dios, mine nē luu lo zhingundziin win luu nu, laaw goc.

¡Nasi zacle nagon guiaad-xi luu naa, haxta gley naa gbi naa lo guidzliu rii!

30-31 ¡Men ne nacle diidz cxeel luu guiaadsilaa miech lo xtol zho, grop lo naa laa naa ran me niina!

³² jGrëse miech ne ndxie lo guidzliu, me nac biini ne gziini lo zho!

jMe csañnziiu zha Israel, ne nac zho zha ne ngab lo luu!

³³ Zeene gon Marí grop José scataa rzë grë diidz ne rnee Simeón rzeet Simeón mëdyeen co, bzee zdoo me.

³⁴ Dzigo bñab Simeón lo Dios gacñien Dios me gza me mëdyeen co. Blozh ga, rëbcha Simeón lo xñiaa win:

—Tib guieļbley nroob ne gac mëed rii lo zha Israel, por win ndal zho grieel lo guieļcow ne no zho, laa zho gbig lo Dios. Ni scagaa zrieequia zha ne glëënie win, per lëëque zha csacsi zho ga. Mban gac zdoo luu, nroob guieļñë ne tso luu gañ luu zha sac miech win.

³⁵ Ga glu gañle zha nac zdoo tib tib miech.

³⁶⁻³⁷ Ye tib zhuz gol lë An zo ga hor co. Tibaque no me yadoo, dze guieel roolnie me Dios, rcuan me ni rzodiidznie me Dios. Tib zhuz gola, leñ dze co rac tapgaļ tap iz bñaañ me viud. Nguieg me ptsieelnia me, per loxaque gadz iz wbannie me tseeel me. Lëë pxoz me ga brieelë Fanuel, lëë zhey co ga nac zha xtii Aser. Tib meñ ne rteed xtiidz Dios lo miech nac me,

³⁸ dzigo wbigaque me, psilo me rdeed me xquizh lo Dios; ni bzodiidz me lo grë zha ne ndxie ga, rëb me lëë mëdyeen co ga nac meñ ne quiambëz zho ga guiaadsilaa zho.

³⁹ Blozhse been José miñe rnabey xley Dios grop me Marí, dzigo laa me wbi ga. Bdedraa ga, beynie me mëed co Nazaret, zaatne nac ladz me.

⁴⁰ Ga broob win, zigse zierooob win scase scase rac macis win, scase riabiiniraa win. Tibaque nacie Dios win.

Biaan Jesús len yadoo

⁴¹⁻⁴² Zeene bloozh Jesús tsiipchop iz, dzigo güey José grop me Marí güeynie me win lni Pascw, lni nroob ne run zho Jerusalén. Gzobse iz rie me grop me, per iz cotaa laa me güeynie win, sac nac zhiwseed zha Israel, mëëdbgui ne rap lalga iz, zrieelole tsie zho lo lni co.

⁴³ Zeene laa lni co bded, laa me bio nöz grop me laa me wbi ga. Ib biend me biaan win Jerusalén,

⁴⁴ tibaque güeynie guic me lad grëraa miech ne wbire lni, lad co zienal win. Laa me no nöz, zeene bdzetaa dzew, laa me psilo rguib win, bnabdiidz me lo grë zha lidz me, lo grë zha ne runbey me,

⁴⁵ per ni tib zho choot rdeete win diidz. Nacne wbireque me nöz Jerusalén stib, zieguib me win.

⁴⁶ Dze ne racle tson ngbidz blozh lniw, dzigoraa güeydziel me win len yadoo, laa win zob lo grë zha ne nac maistr ley, noquiaadiag win grë zhiwseed zho ni nzian grë ncuaane rnabdiidz win lo zho.

⁴⁷ Rzee zdoo zho ran zho scataa nixbiini win, niicle zeene rnee wina, zeene rtsiregaa win lo xtiidz zho.

⁴⁸ Zeene gon me laa win zob lad grë men co, bzee zdoo me; dzigo rëbchaa xniaa win lo win:

—Xin, ¿pe nacie squi been luu? Ptseeb luu no gon, quia no grop no pxoz luu noguib no luu.

⁴⁹ Pquiab win rëb win:

—Nguibde to naa. ¿Pe rande to ib none gun naa xtsiin Pxz naa?

⁵⁰ Ib biend me pe nacie sca rëb win.

⁵¹ Dzigo laa win zienal zhits me, laa me zeynie win Nazaret; nose grē min co zdoon xniaa win.

Tib mēed nguzobdiidz nac win, ron win xtiidz me.

⁵² Zigse zie dzew, laa win riabiiniraa, laa win noroobraa; rleynie Dios win, niiclegaa miecha rleynie zho win.

3

Psilo Juan Bautist noseed me miech

(Mt. 3:1-12; Mr. 1:1-8; Jn. 1:19-28)

¹⁻² Bdzin dzew, laa Juan psilo pseed miech. Lēē leñ iz co rac tsiin iz zob men ne lē Tiber nac me rey, rnabey me grē guiedz ne ngab lo zha Roma. Leñ dze co zob Pilat rnabey me grē guiedz ne ndxie nēz Judé, laa Herod zob rnabey grē guiedz ne ndxie nēz Galilé. Leñ dze coque zob bets Herod, men ne lē Lip rnabey me grē guiedz ne ndxie nēz Ituré ni nēz Traconit; laa Lisian rnabey grē guiedz ne ndxie nēz Abilin. Zha ne nac zhipxoz nroob zha Israel leñ dze co, nac Anás ni Caifás. Leñ dze copaa nagon güeynee Dios lo Juan (xpēed Zacarí) dan ngan ne no Juan ga.

³ Nacne hor co psilo Juan güeyted me grē guiedz ne ndxie ro guiubee Jordán, rnee me lo grē miech co, csaan zho xquieintseeb zho gbig zho lo Dios ni chobnis zho, zeena csilaa Dios zho lo grē xtoł zho.

⁴ Ga briequia mine bnee Isá, men ne biaad pteed xtiidz Dios, zeene znu pquiaa me:

Bii zon miech ganle zeene laa tib tsi men zēeb tib dan ngan, rnee me:

“Golzhixcuaa nēz ne ted men ne rnabey, golsaan grē guieintseeb ne run to.

⁵ Zaatne nac len blë, golcodzëew,
grë gui glaa, grë gui las, golsiaablow.
Nëz ne niecw, nëz ne quiaya quiaguiet nac,
golzhixcuaaw.

⁶ Grëse miech, laa zho gan men ne pxeel Dios ga
ziaadsilaa zho.”

⁷ Zeene ran Juan laa miech rdzin lo me cchoob-
nis me zho, rnee me lo zho:

—iMiech ngoopdol, masaque nac to zig nac meel!
Nan to na lëë, loxaque chobnis to laa to laale lo grë
guielnëdox ne ziaadyob guiaad.

⁸ Led scada gon, none ndzinli gban to zeena glu
nlipaa psaan to xquientseeb to. Ni gacniatsde to
guiab to, loxaque por nacse to zha xtii Abraham,
laa Dios csilaale to; sac gneli naa lo to ganle,
telne gacladz Dios, haxta grë quie zac gnabey me
tsalow miech ne gac zha xtii Abraham.

⁹ Nanle to ganle, grë yag nex ne rquiad nex lo,
zeene ran zho sca naca, rchug zhow, rzëëg zhow;
scadaa nagon sac grë zha ne gband zigne racladz
Dios, ib tedlaad zho lo gui; sac rreeequia laa me
nzhenle xquiibyag me, cchug me grë yag ne sca
nac.

¹⁰ Dzigo rnabdiidz zho lo Juan, pe no gun zho
parne ygaad zho grë guielnë co.

¹¹ Dzigo rquiab me rnee me lo zho:

—Telne quianie to chop lar ne racw to, none
gdeed to tiba lo zha ne guiend xab; telne quian-
iegaa to ncuaane gow to, none gdeed to palala
yquiin zha ne quianieda.

¹² Wbigaque bla recaudador ne zie chobnis,
rnabdiidz zho dien pe gun zho.

¹³ Pquiab Juan, rëb Juan lo zho:

—Cuandraa to samiech to, miñe rieguialse zho quizh zho, miñ co golnab lo zho.

¹⁴ Ye zla menGUIIB wbig, rNabdiidz zho rëb zho:

—¿Telzhe no waa, pe nac miñe dziuun no?

Rquiab Juan rnee Juan lo zho:

—Ndzinli golgac, ib ctsebde to samiech to par dien pe gla to lo zho; zha ne peet xtold, ib yquiaaquide to zho ncuaane beenð zho. None sac zdoo to dimi ne quiayazh to.

¹⁵ Nzian grë miech co quiambëznë zho gacnan zho dien pe lëele Men ne bzooblo Dios ga cxeel me nac Juan.

¹⁶ Dzigo rëb Juan lo zho:

—Tib wrobnisse nu rnedz naa lo to, sangue men ne no guiaad ga Espíritu Sant gdeed me lo zha ne gliladz me; ni scagaa zha ne gliladz me, sonëz me zho zaatne nitlo zho. Ne nligaa men non nac me, tel naa peet nond naa, per ni par tib ngundziin ne glit lab me ni me, raguiald naa gac naa.

¹⁷ Laa me guiaad zig tib zha ne rbeeguizh zhobx-til, sac zha co, rlozhse rbeeguizh zho zhob rgotsow zhow, laa paj rlaal zho lo gui, ga reca. Per gui ne gzëeg grë paj ne guiadbee me ga, gdziñd dze guiuuw.

¹⁸ Sca rnee me lo zho, par guien zho zha nac Xtiidz Dios.

¹⁹ Tib vuelt haxta lo rey Herod goctox me, sac lëëque Herodí, wnaa ne nac tsiel bets Herod nonie Herod; grë guieñtseeb ne quiayun Herod, blisqui mew.

²⁰ Per laa ne nion Herod diidz, lel been me stib guieñtseeb, bnabey me bgaa Juan bio Juan ladzguiib.

*Brobnis Jesús**(Mt. 3:13-17; Mr. 1:9-11)*

²¹ Leṅ dze ne nochoobnis Juan miech ga, tib dzew laa Jesús bdziṅ lo Juan ga, ye me bñab cchoobnis Juan me. Blozhse brobnis me, laa me quiazodiidznie Dios, tibaque zeene bzhial zhan gbaa,

²² laa meṅ ne nac Espíritu Sant biet, rlu me zig rlu tib palom, laa me bdziṅ guic Jesús, hor co blu zëeb tib tsi meṅ co nêz gbaa, rnee me:

—Xin, rleynie naa luu gon, nziuu luu lo naa.

*Xmengol Jesús**(Mt. 1:1-17)*

²³ Galptsii iz rap Jesús, laa me psilo xtsiiṅ me pseed me miech. Zha ne runbey me, rzoob zho xpëed José nac me,

²⁴ José co goc xpëed Elí,
Elí goc xpëed Matat,
Matat goc xpëed Leví,
Leví goc xpëed Melqui,
Melqui goc xpëed Jan,
Jan goc xpëed José,

²⁵ José goc xpëed Matatí,
Matatí goc xpëed Amós,
Amós goc xpëed Nahúm,
Nahúm goc xpëed Esli,
Esli goc xpëed Nagai,

²⁶ Nagai goc xpëed Maat,
Maat goc xpëed Matatí,
Matatí goc xpëed Semei,
Semei goc xpëed José,
José goc xpëed Judá,

27 Judá goc xpëed Joan,
Joan goc xpëed Resa,
Resa goc xpëed Zorobabel
Zorobabel goc xpëed Salatiel,
Salatiel goc xpëed Neri,
28 Neri goc xpëed Melqui,
Melqui goc xpëed Adi,
Adi goc xpëed Cosam,
Cosam goc xpëed Lmodam,
Lmodam goc xpëed Er,
29 Er goc xpëed Josué,
Josué goc xpëed Liezer,
Liezer goc xpëed Jorim,
Jorim goc xpëed Matat,
30 Matat goc xpëed Leví,
Leví goc xpëed Simeón,
Simeón goc xpëed Judá,
Judá goc xpëed José,
José goc xpëed Jonán,
Jonán goc xpëed Liaquim,
31 Liaquim goc xpëed Melé,
Melé goc xpëed Mainán,
Mainán goc xpëed Matata,
Matata goc xpëed Natán,
32 Natán goc xpëed David,
David goc xpëed Isaí,
Isaí goc xpëed Obed,
Obed goc xpëed Booz,
Booz goc xpëed Salmon,
Salmóngoc xpëed Naasón,
33 Naasón goc xpëed Minadab,
Minadab goc xpëed Aram,
Aram goc xpëed Srom,

Srom goc xpëed Far,
Far goc xpëed Judá
³⁴ Judá goc xpëed Jacob,
Jacob goc xpëed Isaac,
Isaac goc xpëed Abraham,
Abraham goc xpëed Taré,
Taré goc xpëed Nacor,
³⁵ Nacor goc xpëed Serug,
Serug goc xpëed Ragau,
Ragau goc xpëed Peleg,
Peleg goc xpëed Heber,
Heber goc xpëed Sala,
³⁶ Sala goc xpëed Cainán,
Cainán goc xpëed Rfaxad,
Rfaxad goc xpëed Sem,
Sem goc xpëed Noé,
Noé goc xpëed Lamec,
³⁷ Lamec goc xpëed Matusalén,
Matusalén goc xpëed Enoc,
Enoc goc xpëed Jared
Jared goc xpëed Mahalaleel,
Mahalaleel goc xpëed Cainán,
³⁸ Cainán goc xpëed Enós,
Enós goc xpëed Set,
Set goc xpëed Adán.
Adán goc zig tib xpëed Dios.

4

*Gocladz mendox niungüet ma Jesús
(Mt. 4:1-17; Mr. 1:12-15)*

¹ Zeene blozh brobnis Jesús guiubee Jordán ga, nacie Espíritu Sant me, dzigo güeynie me Jesús tib dan ngan, zaatne choot miech guiend.

² Ga bio Jesús, ni tib lë peet dowd me; gzase dze pquiana_l mendox niungüet ma me niun me mine racladz ma. Zeene goc choo dze no me ga, gon ma lëbdraa me rcaabedz me,

³ dzigo rëbchaa ma lo me:

—Telne nli Xpëed Dios nac luu, bnabey tsaalo grë quie rii ncuaane gow luu.

⁴ Dzigo pquiab me rëb me lo ma:

—Znu zhobnee lo Xtiidz Dios: “Niapse por xti-idz Dios mban miech, yquiamband zho loxaque guielwagwse.”

⁵ Blozh ga güeynie ma me glaa tib guic gui, ga znuse blu ma grëse guiedz ne ndxie dib lo guidzliu lo me,

⁶ rëb ma:

—Bui ganle, grëse guiedz ne gon ran luu i, chen naaw, zrieelo gded naaw lo zha ne racladztaa naa. Grësew, dib guielndaan ne no low, znedz naaw lo luu

⁷ telne squiitgzhib luu lo naa, gunnon luu naa.

⁸ —;Biche lo naa nu mendox! —rëb me lo ma—. Znu gon zhobnee lo Xtiidz Dios: “Diosse nac men ne rnabey, mese none gunnon luu, lo me riegual yquiitgzhib luu; ni mine rnabey me min co none gun luu.”

⁹ Blozh ga güeynieque ma me lad guiedz Jerusalén, ga blep ma me zaatne mazdraa glaa guic yadoo nroob ne zob lad guiedz co, rëb ma lo me:

—Telne nli Xpëed Dios nac luu, bringaa nu,

10 benque led znu rnee lo Xtiidz me: “Znabey Dios grë xanjł me yquiaanap luu,

11 zgueedz zho luu, zeeņa ni tib quie ycaand ni luu.”

12 Dzigo rëb me lo ma:

—Psoladz ganle noque stib zaatne znu rnee lo Xtiidz Dios: “Bien, Dios nac men ne rnabey luu, nodne quitnie luu me gnab luu lo me guņ me ncuaane nod guņ me.”

13 Gonse ma rdziel d zha guņgüet ma Jesús, dzigo biche ma lo me palal dze.

14 Blozhse ga, dzigo laa Jesús wbi ga bdziņ me nëz Galilé, scaque nacie Espíritu Sant me. Znuse beenbey miech me por grëtaa ncuaan ro ne ruņ me, grëse guiedz ne ndxie nëz co, rzeet zho me.

15 Zaatne rdziņtaa me, rie me xyadoo zho, rseed me zho Xtiidz Dios, rleynie zho me, rley zho ron zho grë miņe rnee me.

Güey Jesús Nazaret

(Mt. 13:53-58; Mr. 6:1-6)

16 Tib dzew, laa me bdziņ Nazaret, zaatne broob me. Goļ dze ne rdziiladz zha Israel lo dziin, güey me xyadoo zho zig ruņaque me grëraa zaatne ziye me. Zeene goļ horne rlab zho Xtiidz Dios, dzigo bded me,

17 bdeed zho miņe pquiaa Isá glab me. Pخال me low, lëetse zaatne znu rnee blab me:

18 ZhiEspíritu Dios nacie naa, ible Dios bzooblo naa, gnee naa Diidz Ndzon ne nac xtiidz me lo grëse zha ne rquiinnëw. Laa me pxeel naa gne naa lo grë zha ne ngadoo lo ncuaane nosacsi zho, zeeņa guien zho zha grieet zho lo grë ncuaan co.

Laa me pxeel naa gziini naa lo grë zha ne no lo guielcow,
grë zha ne rzac guiendraa zha grieë zho lo zhizh-
gab zho, laa me pxeel naa, naa cuee zho lo
zhgab co.

¹⁹ Laa naa zialnie diidz lo miech, gacnañ zho pa
lotaa noxco Dios gunlay me grëse zha ne
gbig lo me.

²⁰ Blozhse blab me lo co, ptibëd mew bdeed mew
lo zha ne quianapa, dzigo laa me bzob. Grëse zha
ne no leñ yadoo ga, dze rwi zho lo me,

²¹ dzigo bnee me lo zho, rëb me:

—Grë diidz ne blozh blab naa lo to nu, leñ dze rii
gon laaw noyac cumplir.

²² Grëse zho rleynie zho me, rlozhd gzee zdo
zho ron zho grëtaa diidz ndzon ne rnee me. Rn-
abdiidzlsa zho rnee zho:

—¿Bay zha squitaa pseed meñ qui? ¡Led lëë
xingan José i!

²³ Dzigo rëb me lo zho:

—No tib diidz ne rnee: “Zha ne racnie stib
miech, none guieñ zho glo meñladz zho gacnie
zho.” Rienpaa naa gon, miñ co racladz to gnë to lo
naa; quiambëz to gan to grë milagr ne ziyon to beñ
naa guiedz Capernaum.

²⁴ 'Gneli naa lo to ganle: Zha ne riaad rteed
xtiidz Dios, ible znu ranzed meñladz zho zho; gane
rriee lod pe gun zho.

²⁵⁻²⁶ Golsoladz ganle zeene biaad Lí, bio tib tiemp
ne biabd guie tson iz grol, tib gbindox ne gon
miech Israel nu. Ndal wnaa viud ne nac meñladz
me mban bded zho, guieñd pe nquiin zho, per
briee lod niun me xyudar zho; leñ xyudar tib wnaa

Sarept pxeel Dios me güeyguñ me, guiedz ne ndxie gax Sidón.

²⁷ Scaque zeene biaad Liséw, ndal zha Israel rlan guiedzdox ne nac lepr, per ni tib zho beenguiacd me; lel tib zha Siria lë Naamán, men co beenguiac me.

²⁸ Zeene gon zho sca rnee me, blëe zho.

²⁹ Gusobe zho, blee zho me lad guiedz, güeynie zho me tib ro yee ne quia glaa guic gui ne ndxie guiedz co. Laa zho nole par ctiix zho me ga,

³⁰ zeene znuse bded me lad zho, ziega me.

Biac tib mgui ne nosacsi mendox

(Mr. 1:21-28)

³¹ Ga wbi Jesús, bdziñ me guiedz Capernaum stib, guiedz ne ndxie nëz Galilé. Gzobse dze ne rdziiladz grë miech co lo dziin, rie me xyadoo zho rieseed me zho.

³² Rzee zdoo zho ron zho grë zhiwseed me, grëse miñe rnee me, rlu zha rnabey nac me.

³³ Tib vult, lad grë zha ne noseed me ga no tib mgui ne nosacsi mendox; roptsie mendox co rnee ma lo me:

³⁴ —¡Psaan no! ¿Pe guñ luu no Jesús Nazaren? ¿Ziaad luu lëe par gnitlo luu no? ¡Runbey naa luu, luu nac men ndzon ne pxeel Dios!

³⁵ Dzigo goctox me lo ma, rëb me:

—¡Psoog ro luu! ¡Na zeena psaan men qui!

Horco, squi ndxie grë miech co bron ma mgui co liu, mincose been ma, laa ma brie laa ma zie.

³⁶ Rlozhd gzee zdoo grë miech co, rnabdiidzlsa zho rnee zho:

—¿Zha nac xtiidz men qui, zha nacne haxta mendox rdzieb ma me, rzhooñ ma zeene laa me ractox lo ma?

³⁷ Grëse guiedz ne ndxie gax ga, zigse zie dze rzhooñ diidz scataa milagr ne ruñ me.

Biac xniadzoop Pedr
(Mt. 8:14-17; Mr. 1:29-39)

³⁸ Brieë Jesús len yadoo, zie me nëz lidz Simón. Bdziñ me lëëtaque laa xniadzoop Simón nix rlan xlëë, nzhoo rac me; dzigo wbig zha ne been vis laa zhuz co rzacnë, bnab zho lo me gunguiac me me.

³⁹ Nacne bded me zaatne nix zhuz co, goctox me lo xlëë co. Horcogazha laaw blëz, guche zhuz co ga, beenlo me ncuaane dow zho.

⁴⁰ Laa ngbidz rzëëblew, zeene bdziñ grë miech co lo Jesús, bdziñnie zho grë zhimguidz zho. Zhaase zhaase guiełguidz ne rzac tib tib mguidz co, per grëse zho zigne rxobnia me guic zho laa zho riac.

⁴¹ Nzian zho beñcxooñ me mendox ne nosacsi zho, zeene laa ma rriee, nguiedz roptsie ma rnee ma lo me:

—¡Rdziuñbey no luu, Xpëed Dios nac luu!

Dzigo ractox me lo ma, rsaand me gnee ma cho nac me, sac wen wen nañ ma me nac Men ne nacle diidz ga cxeel Dios.

⁴² Biini liu co, silgaw brieë Jesús lad guiedz co güey me tib zaatne choot miech guiend. Zeene bnit me lo grë miech co, brieë zho güeyguib zho me haxta bdziel me lo zho; rnab zho lo me Capernaumse ga cuëz me, paat tsiedraa me.

⁴³ Dzigo rëbchaa me lo zho:

—Griieloda, ib none ga naa grëraa guiedz, gaseed naa miech gacnañ zho zha racladz Dios gban zho; sac ible miñ co pxeel me naa zial naa.

⁴⁴ Nligaaw, grëse guiedz ne ndxie nëz Galilé ga güeyted me, güey me yadoo ne zob tib tib guiedz co, güeynee me Xtiidz Dios lo grë miech co.

5

Nroobdox mel bгаа

(Mt. 4:18-22; Mr. 1:16-20)

¹ Tib vuelt miech guizhiu ne pcaalsa lo Jesús ro Nisdoo Genesaret, haxta rtaagw zho me; grëse zho racladz yquiaadiag zho Xtiidz Dios.

² Gax ga zo chop barcw, blalaa ngooz mel biet leña, laa zho no lo nis ga noguuib zho guiex ne rnaaz zho mel.

³ Nacne güey me biep me tib leñ barcw co, bn-abey me Simón psëë Simóna bzëëba lo nis palal; sac lëë xbarcw Simón ga. Dzigo leen co bzob me pseed me grë miech co.

⁴ Zeene blozh bnee me lo zho, rëbchaа me lo Simón:

—Nana ganle zeeynie barcw rii guionie new zaatne quietlaа nis, zeena groñ to guiex ne rgaa mel i gnaaz to palal ma.

⁵ Pquiab Simón rëb Simón:

—Dib guieel-le bdzio no lo nis rii, per ni tib mel bnaazd no; per lega ne luu rneew, na dien laa no groña stib.

⁶ Bron zho guiex co lo nis, zeene laa zho cueew, ya zig zrieza, biodzëse leña no mel.

⁷ Horco blunia zho lo grëraa zha ne nacgrë zho no stib leñ barcw co, parne tsie zho gun zho

xyudar zho. Bdzin̄ zha co gogcza zho, gropse len̄ barcw co pcodzëe zho grë mel̄ co; ya zig zd-edquiew lo nis.

⁸ Zeene gon̄ Simón scataa mel̄ taf ne bgaa, pqui-itsgzh̄ib me lo Jesús, rëb me:

—Bzhiguiel̄ mazd psaan naa, tib miech ngoop-dol̄ nac naa, rdzieeld so luu lo naa nu.

⁹ Zigtaa Simóna, zigtaa zha ne ziegza mew, rzee zdoo zho ni rdzieb zho scataa nac milagr ne gon̄ zho ga.

¹⁰ Scasaque rac Jacob ni Juan (xingan tib men̄ lë Zebedé), zha ne nacgza Simón.

—Gdzieebd luu —rëb Jesús lo Simón—. Zigne squi gon̄ rioxco luu riaad luu gooz mel̄ niina, desde nadze laa luu tsoxco gun̄ luu stib gooz; laa naa cxel̄ luu tsietop luu grë miech ne sëeb xnëz Dios.

¹¹ Zigne bdziñnie zho barcw co ro nis, bzo zhow ga, laa zho zienal̄ zh̄its me.

*Biac tib zha ne rlan guiedz lepr
(Mt. 8:1-4; Mr. 1:40-45)*

¹² Laa Jesús no tib guiedz co, tib dzew, bdzin̄ tib mgui ne rlan guiedzdox ne lë lepr lo me, pquiits-gzh̄ib mgui haxta bdzin̄ lo mgui liu, rëb mgui lo me:

—Tebaa siguiel̄ luu gun̄guiac luu naa.

¹³ Dzigo pxobnia me guic mgui, rëb me:

—Zun̄guiac naa luu. ¡Niinagazh laa luu guiaan̄mbe!

Horcogazha laa mgui biaan̄mbe lo guiedz co.

¹⁴ Dzigo pso Jesús diidz lo mgui, choot lo gzodidz mgui zha biac mgui; ni rëb me lo mgui:

—Bzë, güey lo pxoz, güeyşan gon ne rnabey xley Moisés gdeed luu; zeena gan zho ganle laa luu biacle.

¹⁵ Niicle sca nęd me gacnan miecha, per znuse znuse rliaal diidz grętaa milagr ne ruņ me; miech guizhiu ne rdziņ lo me, zha ne zie yquiaadiag zhiwseed me, zha ne zieegaa gunġuiac me zho tel pe guielguidz ne rzac zho.

¹⁶ Zhiga, zhiga rbiche me lo miech, rie me zaatne choot guieņd riezodiidznie me Pxoz me.

Biac tib zha ne gutoo xcuerp

(Mt. 9:1-8; Mr. 2:1-12)

¹⁷ Stib dzew, miech guizhiu ne ndxie lo Jesús noquiaadiag zho zhiwseed me. Nzian grę zha farisé, grę maistr ley, zha ne brieed dib nęz Galilé, dib nęz Judé, zha ne brieegaa Jerusalén, ye zho laa zho no lad co noquiaadiag zho grę mine rnee me.

¹⁸ Laa grę miech co ndxie ga, zeene bdziņ bla zha bgui, ney zho stib meņ bgui, zhoobse me lo yag, ib gacd sę me sac dipse me gutoo. Gocladz zho nzęebnie zho me leņ yu ne no Jesús ga, ndziņnie zho me lo me.

¹⁹ Per ib gocd nded zho lad grę miech co. Nacne biepaque zho guic yu, pxal zho tiblę guiic co, ga pteed zho meņ rzacnę co dib yag ne zhoob me ga, bdziņ me lo Jesús.

²⁰ Zeene gon Jesús ne nli dib zdoo zho rnalo zho me, me gunġuiac meņ rzacnę co, rębchaa me lo meņ co:

—Peet tsienied guic luu, niinagazh laa naa gun perdon gręse xtoļ luu.

²¹ Zeene bin grę zha farisé co, grę maistr ley co sca ręb me, rneechaa zho gza zho: “¿Cho dzigo rzac

mgui qui nac me? ¡Falt i gon noyun me lo Dios!
¡Tibaque men ne run perdon xtol miech, ni lëe men
co nac Dios!”

²² Bienga Jesús sca quianee zho, dzigo rëbchaa
me:

—¿Pe nacte rzac to laa naa quiayun falt?

²³⁻²⁴ Nli cholze zac guiab laa zho gun perdon xtol
miech, per grielod gunguiac zho zho. Golwi ganle
laa naa gunguiac mgui rii, zeena gacnan to naa ne
nac naa Mgui ne pxeel Dios, ible rap naa poder par
gun naa miech perdon.

Dzigo bnee me lo men rzacne co, rëb me:

—¡Niinagazh guche i, bi yag ne bzhoob luu i, zeen
bzë!

²⁵ Zigne sca bnee me, laa mgui co bzoli, squi
ndxie grë miech co laa me blis yag co, ine roolnie
me Dios laa me zey.

²⁶ Psilo zho grëse zho, roolnie zho Dios; lala rzee
zdoo zho, lala rdzieb zho, rnee zho:

—¡Nadzesi, laa ne bdziañ ncuaane gard dziañ ne!

Bredz Jesús Leví

(Mt. 9:9-13; Mr. 2:13-17)

²⁷ Blozh ga, laa Jesús brieë ga. Ro nëz zieded
me gon me tib men lë Leví, zobse men co lo mezh
ne rietizh zho dimi ne razh lo zha Roma, sac me
rtop dimi co. Dzigo bredz Jesús me tsienal me zhits
Jesús.

²⁸ Biaaunque xmezh me ga, guso me ga, laa me
zienal.

²⁹ Bded ga, güeynie me Jesús tib wagw lidz me.
Grë zha ne run dziin co, ni grëragaa zha ne bdzin
ga, tipse brenie Jesús zho grë xpëëdsuel me.

³⁰ Blalaa zha farisé, ni zla maistr ley, rlëe zho gon zho sca zobnie Jesús grë zha co, bded ga rëbchaa zho lo xpëëdsuel me:

—iLëda i gon run to! ¿Pe nacne sca tipse rownie to grë zha ngoopdol co, grë zha beed ne nac recaudador ga?

³¹ Dzigo rëbchaa Jesús lo zho:

—Nanle to ganle, zha ne run rmed, zaatne no zha rzacne ga rquiin zho, ¿niacxe squiin zho zaatne no zha ne ndip ndaan?

³² Scaque naa nagon, zialguibd naa zha wen, sinque laa naa zialguib grë zha ngoopdol, zeena gbig zho lo Dios.

*¿Pe nacne rcuand xpëëdsuel Jesús?
(Mt. 9:14-17; Mr. 2:18-22)*

³³ Bdziñaque bla zha ne bnabdiidz, rëb zho lo Jesús:

—¿Pe nac waa ib rcuand xpëëdsuel luu, tibaque quiayow zho, tibaque quiaye zho? Zha xpëëdsuel Juan, zha xpëëdsuel farisé, rdzian no tibaque nocuan zho, tibaque nonab zho lo Dios.

³⁴ Pquiab Jesús rëb me lo zho:

—Zaatne nadien noyac tib guieltsieel, ¿niacxe znabey to ycuan grë zha ne ndxie lo lni, ni ran to laa mgui ne notsieelnia zo lo zho?

³⁵ Per zdziñ dze zeene laa mgui co gbiche, ni zeene laa dze co gdziñ, dzigosi nagon riegual ycuan zho.

³⁶ Blozhse sca bnee me, rëbaque me lo zho:

—Zha ne rquiaabdie lar, tsod zha ne ctsiez xab cub cuee zho tib lë lar ne yquiaabdie zho tib xab

gox zho. Sac tiba, znitlo zho xab cub zho ga, ni stiba rdzieeld yquia tib lë lar cub lad lar gox.

³⁷ Scaque zha ne rgotsow vin, tsod zha ne cotsow vin cub tib len guid ne padzeelale noquiin, sac stsiez vin cuba; lozh ga zigtaa vina, zigtaa guid cow, laaw nitlo ga.

³⁸ Gacxe waa, tel vin cuba none len tib guid cubaque tsotsowa.

³⁹ Nac cuent rii zig rzac miech vin, zha ne bienle rie vin ne padzeelale notsow, rdziladzd zho guie zho vin cub; sac biaanle guic zho rnee miech: “Vin ne padzeela notsow, miñ co nizhraa rdioow.”

6

Dze ne rdziiladz zha Israel lo dziin (Mt. 12:1-8; Mr. 2:23-38)

¹ Tib vuelt, lëetse dze ne rdziiladz zho lo dziina, bded Jesús zaatne zëëb zhobxtil grë xpëëdscuel me; psilo zho pchoo zho mzion zhobxtil co, zigse runmbe zho zhob co, scase row zhow.

² Gon blalaa zha farisé sca no zho, dzigo rëbchaa zho:

—iLëda i gon noyun to! Golguien ganle dze nda nac dze rii.

³ Pquiab Jesús rëb me lo zho:

—¿Pe gard glab to zaatne ziaad ganle zha been rey David, tib dze zeene pcaabedz me grë me zha ne ziegza me, ni zienied zho pe gow zho?

⁴ Rneew, bzëëb me len yadoo güey nab me grë guietxtil ne nac gon, downie me grë zha ne ziegza me ga; ni loxaque zha ne nacse pxoz, zha cose row guietxtil co.

⁵ Ni rëb me lo zho:

—Gacnan to ganle naa ne nac naa Mgui ne pxeel Dios, naa rnabey dze rii, nanpaa naa pe nonguiel gac.

*Biac tib mgui ne mband tib nia
(Mt. 12:9-14; Mr. 3:1-6)*

⁶ Gol stib dze ne rdziiladz zho lo dziin, güey Jesús len yadoo win ne zob lad guiedz co, psilo me noseed me miech. Lad grë miech ne no len yadoo ga, no tib mgui, mband nia derech me.

⁷ Blalaa zha farisé, blalaa maistr ley no lad co, quialeets zho Jesús dien pe zunguiac me mgui co, dze co; sac quiambëz zho tel laa me gunguiac mgui, dzigo min co yquiaaqui zho tsiezo zho me lo zhiwxtis zho.

⁸ Bien Jesús sca no guic zho, dzigo bredz me mgui co, bnabey me bzo mgui groltaa lo grë zha ne ndxie ga;

⁹ blozh ga rëbchaa me lo zho:

—¿Pe nadien rzac to nonguiel gun ne dze rii? ¿Pe nonguiela gun ne ncuaane yquiin, te nonguiela gun ne guieintseeb ye? Zig nac samiech ne zha ne noxtseeb xquielmban, ¿pe maase csaan ne guet zho?

¹⁰ Dze rwi me lo zho tib tib zho, dzigo rëbchaa me lo mgui co:

—¡Bzigaa nia luu!

Zigne bzigaa mgui co nia mgui, laaw biac.

¹¹ Zeene gon zho sca beenguiac me nia mgui, per nli rlëe zho, psilo zho quianediidz zho dien zha gun zho me.

*Bzo Jesús zha ne tsienee xtiidz me
(Mt. 4:23-25; 10:1-4; Mr. 3:13-19)*

12 Tib vüelt, güey Jesús tib guic gui, dipse guieel blöz me ga bzodiidznie me Dios.

13 Biini liu co, bredz me gröse zha ne nac xpëedscuel me, dzigo lad co ble me tsiipchop zho, zha ne tsiepaa tsienee xtiidz me lo miech.

14-16 Znu lë gza tsiipchop zha co:
 Simón (zha ne bleelë me Pedr),
 Ndrés (bets Pedr),
 Juan,
 Jacob,
 Lip,
 Bartol,
 Matew,
 Mazh,
 Jacob (xingan Alfé),
 Simón (zha ne no lad grë zha ne racladz cuee wxtis
 Roma Israel),
 Judas (bets Jacob),
 ni Judas Iscariot (zha ne güeyto me).

17 Cho gui co biet me grë xpëedscuel me, bdziñ zho tib ro lets. Loxaque bdziñ zho ga, laa stib dzoon xpëedscuel me bdziñaque lo me ga; zhiits co nañ stib dzoon miech, no zho racladz yquiaadiag zhiwseed me, nogaa zho zie ga par guñguiac me zho. Miech guizhiuw, zha ne ziaad nöz Judé, zha ne ziaad nöz Tiro, zha ne ziaad nöz Sidón, zha ne brieegaa Jerusalén.

18 Nzian grë zha co nosacsi menox, gröse zho beenguiac me zho.

19 Rbig be grë miech co racladz zho xen zho lad xab me, sac ran zho, zha ne rzhen lad xab me, tel pe guielguiidztaa rzac zho, runguiac me zho por grëtaa poder ne rap me.

*Cho nac zha ne wen zie
(Mt. 5:1-12, 38-48; 7:1-5, 12)*

²⁰ Dzigo dze bui Jesús lo grëse zha ne nac xpëëdsuel me, rëb me lo zho:

— ¡Wen zie zha ne rien none gbig zho lo Dios, sac ib zdziñ zho zaatne rnabey me!

²¹ ¡Wen zie zho! Sac niicle telne noyan zho gbin, per me gdeed ncuaane yquiin zho; niicle tel no hor mban rac zho roon zho; per zdziñ dze ne gdeed me tib guielbley nroob lo zho.

²² 'Zig nac to, zeene csilo miech glëënie zho to, guncxoon zho to, yquiaago zho to, gneenë zho to, sac zho haxta ni lë to gondraa zho, loxaque ne nac to zha ne no xnëz Mgui ne pxeel Dios nu, ¡wen zie to ga!

²³ ¡Nley golco zdoo to dze co, nguieel golgac, sac gon tib guielnaac nroob ne gneedz Dios lo to! Golsoladz ganle, scaque been pxozgol zho grë zha ne pxeel me padzeela biadnee xtiidz me.

²⁴ 'Sangue grë zha ne rzac grëse ncuaane rquiin zho quianie zho, ib rquiind zho gbig zho lo Dios, ¡probsaxe zho, sac lo guidzliu riise gac ncuaan co guielbley lo zho!

²⁵ ¡Probsaxe zho, sac niicle ne grëw quianie zho niina, per zdziñ dze gan zho ganle zha nac gbin; rlozhd gzhidz zho, rlozhd gley zho niina, per zdziñ dze laa zho gan ganle zha nac guielnë!

²⁶ 'Padzeela, biaad bla zha ne pquidie rëb zho Dios pxeel zho, bio pxozgol to bleynie zho zho, ¡probsaxe to telne yguib to sca gley nie miech to!

²⁷ 'Golquiaadiaga ganle: Zha ne rlëë lo to, golley nie zho, tel pe nac xliaadz zho golgacnie zho.

28 Zeene rdzibdee zho to, golnab lo Dios gunlay me zho; zeene rsacsigaa zho to, golnab lo Dios yquia zdoo me zho.

29 Tel gneedz zho tib puñet lo to, gzoobd nia to, golsaan zho maase yquiaa zho stiba.

'Zha ne gla xabnal to, golsaan maase ye biaagw güey zho.

30 Zha ne gnabtaa pe cos lo to, goldeeda; tel scasegaa xen zhow, ib gnabde tow lo zho.

31 None zaacse gac to lo miech, zeena scagaa zha, zaacse gac zho lo to.

32 'Sac gon, tel loxaque zha ne ndzieeldiidz to, zha cose rleynie to, led ncuaan nroobd ga run to! Haxta gre zha ntseeb run min co.

33-34 Tel loxaque zha ne runsegaa favor lo to, lo zha cosegue run to favor; zeene rungaa to tib pextad, lo zha ne rgobeyse to zguizh lo to, lo zha cose runxtad to, ini lalnu peet nond ncuaane run to ga! Sac gon haxta gre zha ntseeb run min co.

35 'Golguien sca, none gleynie to zha ne rlee lo to, none gacnie to zho lo xliaadz zho. Zha ne guiaad tib pextad lo to, goldeed ncuaane rnab zho, ib guiabde to nend lega scase gun to favor co lo zho. Zha ne gun gre min rii, nroob guielnzaac ne gdeed Dios lo zho, ni ga glu zho ganle nli xpeed me nac zho; sac gon tel me wen me lo grese miech, niicle zha ne run falt lo mew, niicle zha ne rien dgaa gdeed xquizh lo me, rsaand me zho.

36 Ndzinli sca golgac, zigne sca wen PxoZ to lo grese miech, scaque none wen gac to lo zho.

37 'Ib gunde to ne gac zdoo to, zeene ran to ncuaane nonguield ne run stib miech, sac to tozhal

gunquizh zhow; zeena scagaa Dios gunscad me to. Golguien none gun to samiech to perdon, zeena scagaa Dios zun me to perdon;

³⁸ sac grëse ncuaane run miech, mincoque rcaania zho. Grëse ncuaane gun to, scaania tow, ni haxta ndziibraa mine ycaania to. Sac ncuaane gun to lo samiech to, mincoque gun Dios to.

³⁹ Blozh sca bnee me, dzigo rëbchaa me:

—Golwi ganle, zig nac zha ne rold lo, ¿niacxe zrieelo glu zho nëz lo stib zha ne rold lo? Zha ne sca gun, tel griel ni tib zho zaatne nac tib ro blë, ib tedsod grop xcuaa zho tsietsobe ga.

⁴⁰ Grë zha ne nac mëëdscuel, tsod zha ne racraa lo zha ne noseed zho; haxta csiaalraa zho zhiwseed zho, ni telne tsoxco zhow, dzin zho medid co.

⁴¹ jLëda ga gon tso to lozhd gzee zdoo to dien cho pe run, ni nenda mazdraa mine run to!

⁴² jPe ro to glisqui to mine run stib zho, ni tel mazdraa nac mine run to? jGolguien sca glude to ncuaane nacde to! jGlo goltsoxco ndzinli gac to, dzigo lozh ga zac tsienee to zha gacndzinli stib zho!

Nex rlu zha nac tib tib yag

(Mt. 7:17-20, 24-27; 12:34-35)

⁴³ Tib tib yag rdeedsew xnexa. Griee lod yquia nex ncuaan tib lo yag ne rdeed nex wen; griee lod gaa yquia nex wen tib lo yag me rquia nex ncuaan.

⁴⁴ Tel zha nac nex ne rquia lo yag, gase rlu zha nac yag. Tsod yag guiets ne yquia guigw lo; ni tsod gaa lbë zarz ne gdeed uv.

⁴⁵ Scadaa nagon nac miech, zha ne wena, ncuaan wen run zho, diidz wen rnee zho, sac

desde zdoo zho no guielwen co; laa zha ne ntseeb, niapse ncuaane ntseeb run zho, niapse diidz dox rnee zho, sac desde zdoo zho no guielntseeb co. Gacxe waa, tel zha rzë xtiidz tib miech, gase rlu zha nac zdoo zho.

⁴⁶ 'Grieelod lega gnee to, naa rnabey to, sac zha ne rneew ib none gun zho mine rnabey naa. Nzian zha ne rnee, naa rnabey zho, ni rund zho mine rne naa.

⁴⁷ 'Zha ne rquiaadiag mine rne naa, ni rioxco zho rban zhow zigne naca,

⁴⁸ rrieequia nac zho ga zig tib zha ndzielguic ne quiet blee xcimient lidz, psilo zhow haxta zaatne bgaa lo quie. Niicle riab guiedox, peet racd lidz zho, nis naal ne raclo rded zaatne zoba ga, per rbixcheda.

⁴⁹ Laa zha ne rquiaadiag xtidz naa, ni rioxcod zho gban zhow, ziaad gac zho zig tib zha nxen ne güeyzoob lidz laglaase lo liu. Znuse bnitlo lidz zho, sac zeeñe biab guiedox, lo nis naal ne goclo bded zaatne zoba, znuse bixchew, ni stib lëw biaand.

7

Biac tib zha ne rquia dziin tib lo menquiib (Mt. 8:5-13)

¹ Zeene blozh bnee Jesús lo grë miech co, dzigo laa me wbi ga, bdzin me Capernaum.

² Lëëtaaque len dze co rzacnë tib zha ne run dziin lo tib men ne rnabey lo xmenquiib zha Roma, no guiedz co; nzhoo rac zho zootle laa zho guetle. Rleyniedox men co zho,

³ zigne bin me laa Jesús bdzin, lëälöd pxeel me bla zha ne nac zha non lo menquiedz Israel, güey

zho güeynee zho lo Jesús siguiel̄ Jesús tsiegun̄guiac Jesús zhingun̄dziin me.

⁴ Bdzin̄ zho bñab zho lo Jesús siguiel̄ me tsie me.

—Bzhiguiel̄ been̄ xyudar me —rëb zho—. Tib zha wen nac me,

⁵ rleynie me men̄ladz ne, haxta bzaa me tib xyadoo no lad guiedz nu.

⁶ Dzigo zienal̄ Jesús zhits zho. Zhile gdzin̄ zho lidz men̄ rnabey co, zeene bdieelo zho bla zha ne ndzieeldiidz me, zienie tib xtiidz me lo Jesús. Rzë xtiidz me, rëb me:

—Bzhiguiel̄ mazd guiaate luu. Naraa rien̄ naa choot nacd naa, par csodziin naa lo luu guiaad luu haxta ro lidz naa.

⁷ Nligaa rien̄ naa tib zha winse nac naa par gbig naa lo luu, gane niicle biald naa nialdziel̄ naa luu. Nan̄paa naa, zaatne ziaad luu i, con tib lan xtiidz luu zac gnabey luu guiac zhingun̄dziin naa.

⁸ Sca rnee naa, sac tel̄ naa no zha ne rnabey lo naa, zeene rnabey zho naa none gon naa mine rnee zho; scaque zhaguiib ne rnabey naa, zeene rne naa tib lo zho: “Güey nu”, rie zho; zeene rnegaa naa: “Dë nu”, riaad zho; zha ne nacгаа zhingun̄dziin naaw, mine rnabeytaa naa zho, run̄ zhow.

⁹ Zeene bin Jesús sca rzë xtiidz men̄ co, bzee zdoo me, ptsire lo me, rëb me lo grë zha ne zienal̄ zhits me:

—Gol̄wi ganle pa lotaa rnalo men̄ qui Dios. Lo grë zha Israel gon̄, ni tib zho gard gan̄ naa squitaa dib zdoo gnalo Dios.

¹⁰ Grë zha ne güey mandad ga, zeene bdzin̄ zho gon̄ zho laa ngun̄dziin co biacle.

Rrieaban xpëed tib wnaa viud

11 Bded ga, güey Jesús tib guiedz lë Naín grë xpëedscuel me, miech guizhiu ne zienal zhits zho.

12 Zeene bdziñ zho gax ro guiedz co, lëëtaque bdzieelo zho tib dzoon miech ziequeets xpëed tib wnaa viud; lëese mëed ga lo wnaa co.

13 Goñ Jesús zha rac me, pqüia zdoo Jesús me, wbig Jesús rëb Jesús lo me:

—¡Goondraa luu!

14 Dzigo bzhen Jesús yag ne zhoob ngutoo co. Zeene goñ gza zha ne nxobyan yag cow, hor co bzodze zho; dzigo bnee me lo mëed co rëb me:

—Xin, ¡guche i!

15 Horcogazha brieaban niib co, bzobli niib, laa niib psilo bnee.

Rley xniaa niib, pcaania me niib.

16 Zeene goñ grë miech co sca brieaban mëed co, lala rdzieb zho, lala rdeed zho xquizh lo Dios, rnee zho:

—¡Tib meñ nroob ne goñ ziadteed xtiidz Dios i, ziaad lo ne! ¡Laa ne bdziañ niina ganle, laa Dios ziaadgan ne, ziadbee me ne lo xquieñne!

17 Gdipse nëz Judé, ni grëraa guiedz ne ndxie dib gax ga, gocnañ miech milagr nroob ne been Jesús ga.

Zha ne pxeel Juan Bautist

(Mt. 11:2-19)

18 Bin Juan Bautist grëtaa milagr ne run Jesús ga, sac rie xpëedscuel Juan riezodiidz zhow lo Juan. Dzigo pxeel Juan chop zho,

19 zienabdiidz lo Jesús, dieñ pe me nac Meñ ne nole diidz ga cxeel Dios, te dzigora a gdziñ meñ co ye.

20 Bdzin zho lo Jesús, wbig zho lo me, rëb zho:

—Laa Juan pxeel no ziaadnabdiidz no lo luu, dien pe lëele Men ne nacle diidz ga cxeel Dios i nac luu, te naraa guiaad me ye.

21 Lëëtaaque ndal miech ndxie lo me ga, quiayunguiac me grë men rzacnë. Nzian zho, tel pe guielguidztaa rzac zho, no zho nosacsi mendox, no zho rold lo, grëse zho runguiac me zho.

22 Dzigo rëbchaa me lo zha ne pxeel Juan ga:

—Grëse mine bin to rne naa, grëgaa ncuaane gon to quiayun naa, goltsie golzodiidza lo Juan. Rañ to ganle, grë zha ne rold lo, zha ne në ni, zha ne rlan guiedz lepr, zha ne rcuaat, grëse zho laa zho riac, haxta grë mengut, rrieeban. Grësew golzodiidza lo me, golguiab lo me ganle blactaa zha ne rquiin gbig lo Dios, laa zho noquiaadiag xtiidz Dios;

23 ni golguiab lo me: dichos zha ne tiblrique rililadz cho nac naa.

24 Zeene laa xpëedscuel Juan zey, dzigo psilo me bzeet me Juan lo grë miech guizhiu ne ndxie ga, rëb me lo zho:

—Zeene dien güey to dan ngan ne bio Juan ga, ¿zha güeynie guic to nian to me? ¿Pe rëb to rlu me zig tib goobgui ne nëzrii nëzrec rey me,

25 te rëb to ye masaque grë lar niazh ne racw zha non nacw me? Per nanle to ganle, zha ne scataa racwxab, len grë yu ne rzob zha rnabey, ga rio zho.

26 Nligaa cho güeynie guic to nac me, ¿te rëb to ye tib men ne noteed xtiidz Diosa?

’Gacnan to ganle, tib men ne noteed xtiidz Dios gon nac me, ni me nac tib zha ne mazdraa nroob lo grë zha ne ziyun dziin co.

²⁷ Me ga raquiet lo Xtiidz Dios, zaatne znu rnee: “Sxel̄ naa tib zha ne tednerga lo luu, zha co gzhix-cuaa nēz ne ted luu.”

²⁸ Ne nligaa lo grēse mgui ne zieded lo guidzliu, gard grieequia tib zha ne mazdraa non lo Juan Bautist; per zha ne goṅ winraa zaatne rnabey Dios, nonraa zha co lo me.

²⁹ Leṅ dze ne nochoobnis Juan miech ga, ndal zha ne bin zhiwseed me, haxta grē zha ne rtop dimi ne razh lo zha Roma, bien zho nonguiela guṅ zho miṅe rnabey Dios, güey zho pchoobnis Juan zho.

³⁰ Saṅgue grē maistr ley ni grē zha farisé, pe liaadz zho nion zho miṅe rnabey Dios, ib güeyd zho nchoobnis Juan zho.

³¹ Blozhse sca bnee me, rēbchaa me:

—Nac grē miech rii, ib rienḍ zho pepaa racladz zho. ¿Cho ganle ruṅ zigne ruṅ zho?

³² Lēē zho ruṅ miṅe ruṅ grē mēēdlaas ne rio wguit dib ro nēz. Niicle rool̄ xcompañer win di nguieel̄, rieved win; niicle rool̄gaa zho di ngan, roond win.

³³ Sac goṅ, ziaad Juan, ran zho rowd me grē ncuaaṅe nac xquiel̄wagw zho, niicle vina ried mew; dzigo rnee zho meṅdox nacie me.

³⁴ Blozh ga, ziaad Mgui ne pxeel̄ Dios, ran zho row me, rie me, laa zho rneeque lega rowcho me, lega riecho me vin; ib rienḍ me cho rtsieelsa me, haxta grē zha yozh ne rtop dimi ne razh lo zha Roma, haxta grē zha ngoopdol̄ rzēnie me.

³⁵ Sca rnee zho, saṅgue zha ne rgaa guiel̄biini ne rdeed Dios, rien zho cho nac zha ne ziaadgun xtsiin me.

Güey Jesús lidz tib zha farisé

³⁶ Tib dze bredz tib zha farisé Jesús güey me tib wagw lidz zho. Bdziñ me, bded me bzob me lo mezh.

³⁷ Lad guiedz co no tib wnaa ro nöz, bin me laa Jesús bdziñ lidz zha farisé co, dzigo bi me tib bot nceit nex, tiblo nceit niazha, brieë me zie me nöz lidz zha co.

³⁸ Bdziñ me ga, wbig me zaatne zob Jesús, psilo me roon me. Zigse roon me, lëëque nis ne riet lo me ga, bdiib me ni Jesús, ni pcuiidz mew con guits guic me. Dzigo ptsieelro mew, blozhse ga bleë me nceit co bdëëb mew.

³⁹ Zeene gon zha farisé co sca been wnaa co, bza zdoo zho rëb zho: “Telne niaca minë nli men ne ziadteed xtiidz Dios nac men qui, nien me ganle tib wnaa ngoopdol i, ndeete me diidz squitaa nguëëbnia zho zhits ni me.”

⁴⁰⁻⁴¹ Dzigo bnee Jesús lo zha farisé co yquiaadiag zho chop lan xtiidz me, rëb me:

—Pquiaadiaga ganle Simón: Chop mgui name, quia zho guielqui lo men ne blediñ dimi lo zho. Tib zho zëëb gaay mil pes plat, stib zho zëëb gaay gayoow.

⁴² Gonse men co ni tib zho rdziel zha quizh zho dimi co, dzigo mazd pquia zdoo me zho, beenquizhd me zho xquielqui zho. Bnë nasca dien, lo grop zha co, ¿cho mazdraa sac zdoo minë been men co?

⁴³ Dzigo pquiab Simón, rëb Simón:

—Par naa, zha ne nroobraa xquielqui ga, zha co sacraa zdoo minë been me.

—Scaw gon —rëb Jesús—.

⁴⁴ ¡Mincopaa nagon squi rac wnaa prob qui! Gon ganle zeene bzëëb naa lidz luu, bneedzd luu nis

niar ni naa; mazd me goṅ bdiib me ni naa, maase niicle con nis ne biin me bdiib mew, ni haxta pcuiidz mew con guits guic me.

⁴⁵ Zeene blanso naa per ni tib bzhid bneedzd luu nquiaabdiuzh luu naa, laa me goṅ wlal ne blanso me nu tibaque quiatsieelro me ni naa.

⁴⁶ Nac costumbr none nchoob luu nceit guic naa, per beend luuw; mazd mele goṅ biaad biadtëeb me nceit nex rii zhits ni naa.

⁴⁷ Laa me noyūṅ miṅ rii, sacne nlipaa rzac zdoo me beṅ naa me perdon grëtaa doḷdox ne nzëeb me. Zigne rneeque ne ga, teḷ zha ne zhis xtoḷa, zhi rzac zdoo zho zeene laa zho rac perdon.

⁴⁸ Dzigo bnee Jesús lo wnaa co, rëb Jesús peet tsienied guic me, laa Jesús beēṅle perdon grëse xtoḷ me.

⁴⁹ Zha ne zobgza Jesús lo mezh ga, zeene goṅ zho sca rëb Jesús psilo zho rnabdiidzlsa zho, rnee zho:
—¿Cho dzigo rzac mgui qui nac me? ¿Zha nacne guiab me laa me beēṅ perdon xtoḷ wnaa qui?

⁵⁰ Horco biire Jesús bnee me lo wnaa co, rëb me:
—Laa naa psilaa luu lo xtoḷ luu, sac dib zdoo luu bnalo luu naa. Bzë naa, peet tsieniedraa guic luu.

8

Güeyseed Jesús miech dipse Galilé

¹ Bded ga, brieē Jesús grë xpëēdscuel me güey me grëraa guiedz ne ndxie nëz Galilé ga, zigtaa guiedz nrooba, zigtaa guiedz wina, güey me güeynee me lo miech zha racladz Dios gban zho.

²⁻³ Ye blalaa meṅ wnaa güeynaḷ zhits zho, teḷ pe ncuane quanie grë meṅ wnaa co, rdeed zhow ruṅ zho xyudar me; sac rzac zdoo zho beēṅguiac

me zho. No zho beenguiac me lo guielguidz, nogaa zho bencxoon me mendox ne nosacsi zho. Ga güeynal tib wnaa lë Marí Magdal (lëe wnaa co bencxoon Jesús gadz mendox ne nosacsi me), ga güeynal stib men lë Zhuan (lëe tsiel Chuz ga, men ne quianap grë lo xtsiin rey Herod) ni stib men lë Susan.

*Nac Xtiidz Dios zig zhobxtil
(Mt. 13:1-23; Mr. 4:1-20)*

⁴ Tib dzew, miech guizhiu ne pcaalsa lo Jesús; nzian guiedz ne brieë zho bdziñ zho lo me. Laa me noseed zho, zeene bzodiidz me tib cuent rii lo zho, rëb me:

⁵ —Tib mgui name, brieë zho güey zho gon zhobxtil. Zeene laa zho quialaal zhob co liu, now bliaal gax ro nëz, now bliaal lad quie, nogaaw bliaal len yag guiets. Mine bliaal ro nëz ga, zha ne bded bzëni zhow, blozh ga güeyaque grë mguin dow maw.

⁶ Mine bliaal zaatne nac lad quie, blana per znuse bidza sac guiend gop ga.

⁷ Mine bliaal len yag guiets co, zigne blana blanaque stib dzoon yag guiets, znuse bnitlo yag guietsa.

⁸ Sangue mine bliaal zaatne nac niapse lo liu, blana, brooba, ndzon goca, tib tib zhob ne biab liu ga now goc haxta tib gayoo zhob.

Blozhse bzodiidz me cuent co, nguiedz bnee me lo zho rëb me:

—iZha ne racladz guien mine rne naa, yquiaadiag zhow!

⁹ Dzigo wbig grë zha ne nac xpëedscuel me, bnabdiidz zho lo me dien zha nac cuent co.

¹⁰ Rëbchaa me lo zho:

—Tel to, Dioszhal rlu lo to ganle zha rnabey me, niicle ncuaane mazdraa ngeetsa; sangue grëraa zha ne squi gard gbig lo me, niapse con cuent rzodiidz naaw lo zho, parne guien zhow; per niicle scaw, ib rzoobdiagd zhow, ib rioguicd zho zha naca.

¹¹ 'Znu gon nac cuent co: Zhobxtil co nac Xtiidz Dios.

¹² Ro nöz ne sca bliaal zhob co, ga rlu ganle zha rzac zha ne rquiaadiag Xtiidz Dios, per znusaque rdzin mendox rquiil ma zho gliladzd zhow, zeena laad zho lo dol.

¹³ Lad quie ne bliaal spalala ga, ga rlu zha rzac zha ne rley rquiaadiag Xtiidz Dios, rley zho rcaania zhow, per rcaaniad zhow dib zdoo zho. Nli rililadz zhow palal dze, per zeene ran zho zha run miech zho, zha rnee miech lo zho, rsaanga zhow.

¹⁴ Nogaa zho nac zig len yag guiets co. Rquiaadiag zho Xtiidz Dios, per laa ne tsoniew guic zho, lel rsilo zho grë zhgab ne dien zha gapchen cho, dien zha gdeedguxt xcuerp zho lo guidzliu rii, min co rionie guic zho; pa së zho gban zigne rnabey Dios.

¹⁵ Laa lo liu naal co, ga rlu ganle zha rzac zha ne nguudz zdoo. Zeene rquiaadiag zho Xtiidz Dios, dib zdoo zho rcaania zhow, dib zdoo zho rililadz zhow. Grëse ncuaane run zho, ndzinli rrieequiw; sac tiblrique rac zho.

Xcuent biini

(Mt. 12:46-50; Mr. 3:31-35; 4:21-25)

¹⁶ Blozh ga, bnee me lo grë miech ne ndxie ga, rëb me lo zho:

—Tsod zha ne yquiaagui tib biini, lozh ga ctoos zho pe cos low, gzolangaa zhow tib zhan lon. Sac biini ne rquia, glaa rzoba par gziiniw len yu, zeena guiab biini lo grëse zha ne sëëb len yu.

¹⁷ Scaque nagon, grë ncuane rac ngueets, grë ncuane rnee miech zhlian, none xoobnena.

¹⁸ 'Wen wen golquiaadiag mine rne naa, ni goitsoxcow. Sac zha ne tsoxcow, zeedraa Dios guielbiini lo zho; sangue zha ne tsoxcoda, haxta tel palalse guielbiini ne rzac zho quianie zho, stiche mew.

¹⁹ Dze co, scaque noseed me miech, zeene bdzin xniaa me ni zha bets me ziegan zho me. Per brielod ndzin zho haxta lo me, sac miech guizhiu ne ndxie lo me ga.

²⁰ Dzigo rëb tib zho lo me:

—Laa xniaa luu gon, ni zha bets luu bdzin ley ziaadguib zho luu.

²¹ Pquiab me rëb me:

—¿Xnia naa ye, bets naa ye? Grëse zha ne gon rquiaadiag Xtiidz Dios ni rioxco zho mban zhow, lëë zha co nac xniaa naa, zha co nac bets naa, zha co nac bzian naa.

Pcuëz Jesús tib medox

(Mt. 8:23-27; Mr. 4:35-41)

²² Tib bdze dze, bzëëbnie Jesús xpëëdsuel me tib len barcw, rëb me lo zho, tedquia zho stib nëz ro nis co.

²³ Laa zho zie lo nis co zeene laa me gootguies. Tibaque zeene psilo brieë tib medox, masaque riasoli lo nis co, zootle laa barcw ne no zho ga yguiitsle len nis.

²⁴ Zeene gon zho scataa ntseeb rac lo nis co, lëëled güey zho güeycuaan zho me.

—¡Maestro! —rëb zho—. ¡Blee mcaallo luu ganle, laa ne nonitlo lo nis rii niina!

Dzigo guche me bnee me lo me co, ni bnee me lo nis co. Zigne bnee me, dzese biac me, dzese bre nis co.

²⁵ Dzigo rëbchaa me lo zho:

—¿Pe nacne rdzieb to? ¿Niacxe rliladzde to Dios dib zdoo to?

Ne nligaa rdzieb zho, ni lala rzee zdoo zho, rnabdiidzlsa zho rnee zho:

—¿Bay cho nac me? ¿Zha nacne haxta me, haxta nis ron xtiidz me?

Men Gadar ne nosacsi men_dox
(Mt. 8:28-34; Mr. 5:1-20)

²⁶ Bdzin zho stib nëz ro nis co, ga nac xtan zha Gadar. Zo zho ga, nëz dan squi riaan xtan zha Galilé.

²⁷ Laa Jesús bietzde len barcw, zeene laa tib mgui ne no nëz co bdzin lo me. Mban rlu mgui co nosacsi men_dox me, niicle xab me nacwdraa me; ib rbëzd me lidz me, niapse grë len xpaa ngutoo rio me.

²⁸ Zeene gon me Jesús, masaque roptsie me bdzin me pquiitsgzhib me lo Jesús, zëëb tsi me rnee me:

—¡Psaan naa Jesús! Nanpaa naa gon Xpëed Dios nroob ne zob gbaa nac luu. ¡Bzhiguiel csacsid luu naa!

²⁹ Per men_dox co sca rnee, sac hor co laa Jesús bnabeyle ma csaan ma me. Ziele dze sca nosacsi ma me, ntseeb rac me, niicle rzoob zho caden ni me, rzoob zho caden nia me, parne paat tsied

me, znuse rchug mew; dzigo rienie men_ox co me rquianzë me grë dan ngan, zaatne choot miech guiend.

³⁰ Dzigo bñabdiidz Jesús lo ma dien cho lë ma. Pquiab ma rëb ma:

— Legion lë no.

Sca rëb ma sac nzian nac ma no ma zdoo mgui co.

³¹ Ni bñab ma lo Jesús gzonëzd me ma lo ncowdoo ne noraa ma ne nacgrë ma.

³² Gaxaque ga ndxie tib dzoon nguts notop lag, bñab ma gdeed me diidzbey lose grë nguts co gdziñ ma. Dzigo bdeed me diidz.

³³ Horco laa grë men_ox co psaan mgui co, güeysëeb ma zdoo grë nguts co. Psilo grë nguts co rquiaa ma corr, güeypix ma tib ro yeedox ne quia ro nis co, bliaal ma haxta lo nis; grëse ma gut.

³⁴ Grë zha ne quianap nguts co, bzhoon zho, rias zho güeyzodiidz zhow lad guiedz, ni grëraa yu ne zob gax ga.

³⁵ Nacne brieë grë miech co ziewi zho. Zeene bdziñ zho, per nli bdzieb zho goñ zha laa men co zob gax lo Jesús, laa me nacwxable, rlu niinile nac guic me.

³⁶ Psilo grë zha ne goñ zha biac me rzodiidz zhow lo grë zha ne bdziñ ga.

³⁷ Mazdraa bdzieb grë miech co bin zhow, dzigo mazd bñab zho lo Jesús siguiel me gbi me xtan zho.

³⁸ Zeene laa Jesús zie sëeb me len barcw par gbi me ga, dzigo wbig mgui co rnab me lo Jesús siguiel Jesús tsienal me zhits Jesús; per bzhiguiel Jesús nienal me, rëb Jesús lo me:

39 —¡Biaan! Güey, güeyzodiidz lo grë menlidz luu ganle zha nactaa milagr ne been Dios beenguiac me luu.

Dzigo wbire men co. Güey me lad guiedz, grëse lo miech güeyzodiidz me zha nactaa guielnzaac ne been Jesús ga, beenguiac Jesús me.

*Brieaban tib xpëdwnaa tib men lë Jair
(Mt. 9:18-26; Mr. 5:21-43)*

40 Zeene laa Jesús biire bdzin stib nëz ro nis co, miech guizhiu ne quiambëz me ga, rley zho gon zho laa me bdzin.

41 Loxaque bdzin me, laa tib men ne rnabey yadoo lë Jair wbigle pquiitsgzhib lo me. Rnab Jair siguiel me tsienal me lidz Jair tsiegunguiac me tib xpëdwnaa win Jair.

42 Nzhoo rac mëed co, tib mëed tsiipchop iza, ni lëese mëed ga lo me.

Dzigo laa Jesús zie nëz lidz men co. Miech guizhiu ne zienal zhits me, haxta rtaagw zho me.

43 Lad grë miech co zienal tib wnaa rzacnë, gocle tsiipchop iz rlan me tib guielguidz, rzac me zigne rzac grë men wnaa gzob mëe; tibaque rlan mew ib rbëzda. Grële ncuaane rap me bloozh me lo grë men ne run rmed, per ni tib zho runguiacd me.

44 Laa me no lad co, tibaque wbig gax me nëz zhits Jesús, bzhen me ni lar ne mbix Jesús; hor cogazha laa me biac.

45 Bien Jesús sca bzhen wnaa co lad xab me, dzigo rëbchaa me:

—¿Cho ga bzhen lad xab naa?

Grëse zho rnee led zhada. Dzigo rëbchaa Pedr lo me:

—Maestro, wi ganle zha ndaagwtaa ziaad luu lad grë miech rii, haxta rcheep zho luu, ¿zha nan luu choot xend lad xab luu?

⁴⁶ —Per no cho bzhen lad xab naa —rnee me—, sac bienpaa naa beenguiac naa zho.

⁴⁷ Zeene gon wnaa co bien Jesús sca bzhen me lad xab me, rdzieb me laa me wbig pquitsgzhib me lo Jesús. Squi ndxie grë miech co, bzodiidz me zha nacne sca been me, ni zha zigne bzhen me lad xab Jesús laa me biac.

⁴⁸ Dzigo rëbchaa Jesús lo me:

—Xin, laa luu biac sacne dib zdoo luu bnalo luu naa. Bzë na, peet tsieniedraa guic luu.

⁴⁹ Laa Jesús bii quianeeque lo wnaa co, zeene laa tib zha ne nac mandad ziaad nëz lidz Jair bdziñ, rëb zho lo Jair:

—Csodziindraa luu lo men qui, laa xpëed luu gutle.

⁵⁰ Zeene gon Jesús sca rëb zha co, rëbchaa me lo Jair:

—Peet tsienied guic luu. Dib zdoo luu bnalo Dios, zeena peet gacd xpëed luu.

⁵¹ Bdziñ zho lidz Jair, psaandraa Jesús nal grë miech co zhits me ndziñ zho zaatne nix mëed co. Loxaque Pedr, Jacob, ni Juan, pxoz win ni xniaa win bzëëbnie me len yu ne nix win.

⁵² Grë miech ne ndxie ga, roon zho no zho xquielnë win; dzigo rëbchaa Jesús lo zho:

—Goonde to; sac gon nixguiesse mëedwin rii, gute win.

⁵³ Psilo zho lel rzhidznie zho me, sac nanpaa zho gutle win.

⁵⁴ Dzigo wbig me, bzhen me nia win, nguiedz bnee me lo win, rëb me:

—¡Guche i na, ndzooop yeen!

⁵⁵ Zigne sca bnee me, laa mëed co brieaban, laa win guche ga; dzigo bnabey me bguiaan zho win.

⁵⁶ Zigtaa pxoz wina, zigtaa xniaa wina, per nli rley me. Dzigo pso Jesús diidz lo me, choot lo gzodiidzd me zha brieaban win.

9

*Pxeel Jesús xpëedscuel me güeyseed zho miech
(Mt. 10:5-15; 14:1-12; Mr. 6:7-29)*

¹⁻² Tib dze bredz Jesús gza tsiipchop xpëedscuel me, pxeel me zho tsienee zho lo miech gacnan zho zha racladz Dios gban zho; bdeed me poder lo zho guñcxoon zho grë menox ne nosacsi miech, ni guñguiac zho grë men rzacnë.

³ —Goltsie —rëb me lo zho—. Per ib güeyde to ncuane yquiin to nëz. Zig nac dimi, zig nac ncuane gow to, pe bziuud, pe baxtongaa, güeyde tow; xab tow, mine nacwse to mincose goltsienie.

⁴ Guiedz ne gdziñ to, zha ne gneedz zaatne cuëz to, lidz zha co golcuëz, haxta gdziñ dze ne gbi to guiedz co.

⁵ Per telne gdziñ to tib guiedz, nëd miech yquiaa-diag zho mine zienee to, dzigo gollit grë yudie co ni to, golrieegazh ga, zeena guien zho ganle dol ga been zho lo Dios, nëd zho ycaania zho xtiidz me.

⁶ Dzigo laa zho briea, laa zho zie. Grëse guiedz ne ndxie dib gax ga, güey zho güeynee zho Xtiidz Dios lo miech, ni beenguiac zho grë men rzacnë.

⁷ Bin rey Herod rzeet zho Jesús, sac tel pa lotaaw zëëb diidz grëtaa milagr ne run me. Grë miech co, no zho rzac Juan Bautist ga brieëban, lëë me ga nac Jesús;

⁸ nogaa zho rnee bod Líw, men ne biadteed xtiidz Dios padzeela, me ziaad stib; zzhisgaa zho rnee no cho stib men biadteed xtiidz Dios padzeelaw, sinque brieëban me gane ziaad me stib.

⁹ Zeëne ron Herod rnee grë miech co lëë Juan ga, rio me zhgab, rnee me:

—¿Bay cho nac men co? Per gacda Juan; naazhal name bnabey pchug zho yan Juan.

Racladz Herod tebaa zha gan me Jesús.

Bguiaan Jesús gaay mil miech

(Mt. 14:13-21; Mr. 6:30-44; Jn. 6:1-14)

¹⁰ Goc bla dzew, laa grë zha ne pxeel Jesús ga wbire bdziñ lo me. Blozhse bzodiidz zho lo me grëse tel zha güey zho, dzigo güeynie me zho tib lugar riaan gax guiedz Betsaid.

¹¹ Zeëne bin grë miech co laa me brieë, dzigo brieenal zho me, bdziñ zho lo me ga. Zeëne gon me zho, rley me pcaania me zho, bnee me lo zho zha racladz Dios gban zho, ni beënguiac me grë zha ne rzacnë.

¹² Laa dze rdzelew, wbig gza tsiipchop xpëëdsuel me rëb zho lo me, mazd gnee me lo grë miech co gbi zho ga; zeëna guiob tsie zho grë guiedz las, grë yu ne riaan gax ga, yguib zho dien pa cuëz zho, yguib zho dien pe gow zho; sac choot miech nod ga.

¹³ Dzigo rëbchaa me lo zho:

—To goldeed ncuaane gow zho.

Pquiab zho rëb zho:

—Gaayaque guietxtil ni chop me_l ziaadnie no nu, ipe rnase ncuaan_l co lo grëtaa miech qui! Niicle niaca mi_ne gziuu ncuaane_n gow zho, pe zhidaa dimi yquiin, ¿pa guioxi now?

¹⁴⁻¹⁵ Nligaa miech tafa, zig gaay mil rgaa lox-
aque zha bguise. Dzigo bnabey me zho güey zho,
güeynee zho lo grë miech co sob zho, cue zho gro_l
gayooga, gro_l gayooga zho tib lugar.

¹⁶ Laa grë miech co bzob, dzigo bzhen_n Jesús
gza gaay guietxtil co ni grop me_l co, blis lo me
nëz gbaa, bdeed me xquizh lo Dios. Blozhse ga,
beengro_l me gza guietxtil co, me_l co ne, dzigo zigse
rdeed mew lo xpëedscuel me, scase scase rguiz
zhow lo grë miech co.

¹⁷ Grëse zho dow haxta zaatne bieltaa zdoo zho;
ni zeene_n blozh dow zho, biodzë tsiipchop chicuid
bio grë mi_ne biaan_n.

Bnee Pedr cho nac Jesús

(Mt. 16:13-19; Mr. 8:27-30)

¹⁸ Tib dze biche Jesús lo miech palal, güey
me tib zaatne güeyzodiidnie me Dios; loxaque
xpëedscuelse me güeynal_n zhits me. Ga bnabdiidz
me lo zho rëb me:

—¿Cho dien_n ron to rnee miech nac naa?

¹⁹ Pquiab zho rëb zho:

—No zho rnee Juan Bautista, nogaa zho rnee
Líw (men_n ne biadteed Xtiidz Dios padzeela); nogaa
gro_l zho rnee no cho stib men_n ne biadteed Xtiidz
Dios padzeelaw, sinque brieaban me gane ziaad
me stib.

²⁰ —¿To waa? —rëb me lo zho—. ¿Cho rzac to nac
naa?

Horco pquiab Pedr, rëb Pedr lo me:

—¡Luu nac Men ne zëëble diidz ga cxeel Dios!

²¹ Dzigo pso me diidz lo zho choot lo gneed zhow.

Bzeet Jesús zha gun miech me

(Mt. 16:21-28; Mr. 8:31-9:1)

²² Tib vuelt bzeet Jesús lo grë xpëëdscuel me zha csacsi miech me. Rëb me, nroob grë ncuane cteed zho me; grë zha non lo menguedz, grë pxoz rnabey, grë zha ne rseed miech ley, ible stsidil zho me, ni haxta zut zho me; per zeene gac tson ngbidz gut me laa me grieeban.

²³ Ni rëb me lo grë miech ne ndxie lo me ga:

—Zha ne racladz sëëb xnëz naa, none cueeladz zho zho, none lëb zho gzataa dze guiaadnal zho mine rnabey naa, niicle tel min co yquiaaqui csacsi miech zho. Nodne yquia zdoo zho xquielmban zho,

²⁴ sac zha ne yquia zdoo xquielmban, lel znu nitlo zho; sangue zha ne sca cueeladz xquielmban porne no zho xnëz naa, ib zgaa zho tib guielmban ne gdzind dze lozh.

²⁵ Zha ne zienie guic loxaque gapchen, ¿pa dien yquiina lo zho, tel por lëëw rsacsi zho zho, tel lëëw yquiaaqui guey zho gabil?

²⁶ Naa ne nac naa Mgui ne pxeel Dios, zha ne ctoladz guiab zho laa zho no xnëz naa, ctoladzniegaa zho xtidz naa; scaque naa stoladznie naa zho gal dze ne laa naa guial stib. Dze ne guialnie naa grë xanjl Pxoz naa, guiallu naa guielndzon ne rap me.

²⁷ Blozhse sca bnee me, rëbchaa me lo grë miech co:

—Ni gni naa lo to ganle, nzian grë zha ne ndxie nu niina, ib tedsod bii zaṅ zho zeene laa Dios glu zha rnabey me.

Bdzëëlo Jesús

(Mt. 17:1-8; Mr. 9:2-8)

²⁸ Goca maase xon ngbidz, güey Jesús tib guic gui gza me Pedr, Jacob ni Juan; laa me zie ga ziezodiidznie me Dios.

²⁹ Laa me nozodiidznie Dios, zeene laa me bdzëëlo. Masaque biinidoo ne rrie lo me, xab mew, nquitsbie rnaw, haxta rquiabniw.

³⁰⁻³¹ Tibaque brieequia Lí grop Moisés bdziṅ lo me ga, psilo zho nozodiidznie zho me grë guieṅne ne cteed miech me Jerusalén, zeene laa me gbi lo guidzliu. Masaque biinidoo ne riab, ncuane gzee zdoo new.

³² Laa zha ne zianṅ zhits me, rcow zho mcaal zob zho ga; per zeene biab biini nroob co, hor co bzhial lo zho goṅ zho zha rlu me gza me Lí ni Moisés.

³³ Laa grop meṅ co ziebiche lo Jesús, zeene rëb Pedr lo me:

—Maestro, jwena goṅ tebaa gbiaaz ne nu! Na maase gzaa no tsoṅ yu yag xiid win, tiba cuëz luu, tiba cuëz Moisés, stiba cuëz Lí.

Per niicle Pedr riendaque dien pe nacne sca rnee Pedr.

³⁴ Laa Pedr bii quianeeque, zeene bre tib xcow zaatne zo zho ga; per nli bdzieb zho goṅ zho laa zho biaan leṅ xcow co.

³⁵ Dzigo bin zho zëëb tib tsi meṅ co lo xcow co, rnee me:

—Lëë Xpëed naa i goṅ, rleynie naa me. Golgon miṅe rnee me.

³⁶ Zeene blozh bin zho tsi men co, gon zho lox-
aque Jesússe zo ga.

Grèse mine gon zho ga, ib choot lo bneed zhow
len dze co.

Biac tib mēed ne nosacsi men_dox
(Mt. 17:14-21; Mr. 9:14-29)

³⁷ Biini liu co, laa Jesús wbi guic gui co gza me
zha ne güeynie me ga. Miech guizhiu ne güeydzieelo
me.

³⁸ Lad grē miech co brieet tib mgui, wbig me lo
Jesús rēb me:

—Maestro, bzhiguiel bui ganle zha rac xpēed
naa. Tibaque mēedbgui rii nac mēed lo naa,

³⁹ ni na laa men_dox nosacsi win. Zeene rdziñ ma
rcoptsiedan ma win, rron ma win liu, ga nix win
run_cxidz ma win, ni masaque rdzib mtsiñ ro win;
nen rsaan ma win.

⁴⁰ Blansonie naa win nu, bnaab naa lo xpēedscuel
luu gun_cxoon zho men_dox co, per brieelod zho.

⁴¹ Dzigo rēbchaa Jesús:

—¡Pe nac squitaa miech ntseeb nac to, ib nēde to
gnalo to Dios! ¿Pa lal dze ne so naa gne naa lo to?
¡Ncuaane cxeewdraa naa lo to squitaa nac to! Dēnie
xpēed luu nu —rēb me lo men co.

⁴² Zeene laa mēed co ziegax lo Jesús, hor co bron
men_dox co win liu, nix win ga masaque rzhidz
win. Dzigo goctox Jesús lo ma, ben_cxoon me ma.
Horcogazh biac mēed co, laa me bdeed win lo pxoz
win.

⁴³ Grē miech ne ndxie ga, per nli rzee zdoo zho
gon zho scataa nroob poder ne rap Dios.

Grèse miech ne ran grētaa milagr ne run Jesús,
rzee zdoo zho.

*Bzeet Jesús stib laa miech csacsi me
(Mt. 17:22-23; Mr. 9:30-32)*

⁴⁴ Biire Jesús bzeet me lo xpëedscuel me zha guṅ miech me, rëb me:

—Wen wen golquiaadiag mine gni naa lo to nu ganle. Naa gon ne nac naa Mgui ne pxeel Dios, ible zielo zho naa ladznia miech.

⁴⁵ Per ib riend zho zha nacne sca rnee me, sac gard gdeed Dios diidzbey hor co guien zho zha naca; niicle par gnabdiidzga zho, rdzieb zho gnabdiidz zhow lo me.

*¿Cho nonraa?
(Mt. 18:1-5; Mr. 9:33-40)*

⁴⁶ Horco psilo zho noneelsa zho dien cho tib zho gac zha non.

⁴⁷ Bien Jesús sca no zho, dzigo bnee me lo zho, bredz me tib mëëdbgui win,

⁴⁸ rëb me:

—Grë zha ne no xnëz naa, zha ne guṅcas tib mëëdwin zig mëëd rii, gleynie zho win, rrieequia naa ga rleynie zho. Ni zha ne gleynie naa, rrieequia men ne pxeelle naa ga rleynie zho. Teine racladz to gacnan to dien cho nac zha non, gacnan to ganle, zha ne tsoxcō gac zig tib ngunḍziin lo samiech, zha co nac zha non.

⁴⁹ Blozh ga, rëbcha Juan lo me:

—Maestro, bdzion no tib zha co gon bzeet zho lë luu zeene benxoon zho mendox, nacne nli blisqui now lo zho, sac led yed zho nacgrë ne.

⁵⁰ Dzigo pquiab me, rëb me:

—¡Guṅscade to! Sac gon zha ne racnie ne, grieelod lëëque zha glëënie ne.

*Ndox Jesús lo Juan grop Jacob
(Mt. 8:19-22)*

⁵¹ Leñ dze ne ziaadyob gbi Jesús lo guidzliu rii, leñ dze co bio me nēz laa me zie nēz Jerusalén. Tiblique bio guic me, ib pquiad zdo me, laa me zie.

⁵² Zeene bdzin me xtan Samar, pxeel me bla zho bdedner zie zho tib guiedz win ne ndxie nēz co, par dien pa lo gdeed miech co cuēz me.

⁵³ Bdzin zho guiedz co, choot bzhiguiełd ndeed zaatne mbēz me; sac bien zho nēz Jerusalén tsie me. Nac zha Samar, rlēenie zho zha Ísrael.

⁵⁴ Zeene bin Jacoba grop Jacob Juan, blēe guic zho, rēbchaa zho lo me:

—Maestro, įmazd tibaque gotsaa gnab ne gliaal gui lad grē miech rii, zeena nitlogazh zho!

⁵⁵ Biecwaque me, goctox me lo zho rēb me:

—Riende to lēe zhapaa nac meñ ne nacie to.

⁵⁶ Golguien ganle, naa ne nac naa Mgui ne pxeel Dios, ziałd naa par gnitlo naa miech, sinque laa naa ział csilaa naa zho lo dol.

Ga brie zho güey zho stib guiedz.

⁵⁷ Nēz zie zho, zeene wbig tib mgui co rēb me lo Jesús, laa me racladz tsienal me zhits Jesús, tel pa lotaa nac zaatne tsie Jesús.

⁵⁸ Dzigo pquiab Jesús rēb Jesús lo me:

—Gocnana ganle, naa ne nac naa Mgui ne pxeel Dios, peet rapd naa nu, mazd zig nac grē mēz, grē mguin, rap ma zhibliee ma, rap ma zhiptsieez ma; per naa per ni zaatne gaguies naa quianied naa.

⁵⁹ Laa zha ne bredz me tsienal zhits me, pquiab zho rēb zho:

—Sēnal naa zhits luu, per bzhiguiel bneedz didzbey cuēz naa, gangazh naa tsoliu pxoz naa.

⁶⁰ Rēbchaa me lo zho:

—Nzian grē zha gut no, psaan tsow tsie samengut zho tsiequeets zho. Saṅgue luu zhits naa dēnal, zeēna tsie luu tsienee luu lo miech, gacnaṅ zho zha racladz Dios gban zho.

⁶¹ Pquiab stib zho rēb lo me:

—Maase sēnal naa zhits luu, per bneedz diidz ganiegazh naa diidz lo grē menlidz naa.

⁶² Dzigo rēbchaa me:

—Zha ne xēn nia rad ni csilo zho gwi zho nēz zhits zho, niacxe zrieelo ygan zho ngon. Scaque zha ne sēēb xnēz Dios, grieelod sēēb zho telne mazdraa rleynie zho grē ncuaaṅ lo guidzliu rii.

10

Güey tsongaltsii zha ne güeynee Xtiidz Dios (Mt. 11:20-24)

¹ Tib dze, ble Jesús stsongaltsii zha ne rquiaadia-gle zhiwseed me, bnabey me tedner zho lo me tsie zho grē guiedz ne no ted me, pxeel me zho chopga chopga zho.

² —Golnab lo Dios —rēb me—, cxeelraa me zha ne guṅ xtsiin me. Sac ne nligaa ndaldoo miech ne quiambēz yquiaadiag Xtiidz me, zha ne gneelew lo zho rgaad.

³ Goltsie sca, per nsin nsin golso. Golguien ganle rrieequia nac to zig cho mēcwxiiil yeen, ni laa naa rxel to zaatne no grē coyot dox.

⁴ Peet güeyde to, güeyde to dimi, güeyde to ncuaane gow to, lab tow, miṅe quiase ni to miṅcose goltsienie.

'Miech ne yquiaabdiuzh to nēz, sode to dieen zharaa yquiaabdiuzh to zho.

⁵ Zeene yguib to zaatne cuēz to, yu ne gdziṅtaa to, goḷnab guṅlay Dios grē zha ne no yu co.

⁶ Teḷne squiaadiag zho miṅe rnee to, zuṅlay me zho; teḷne nēdgaā zho yquiaadiag zhow, dzigo toque guṅlay me.

⁷ Zha ne gneedz zaatne cuēz to, lidzse zha co goḷcuēz, tsiede to stib yu stib yu; guieḷwagw ne gneedz zho lo to, ctoladzde to goḷgowa; sac goṅ zha ne ruṅ dziin, ib none ycaa zho miṅe non xtsiṅ zho.

⁸ 'Guiedz ne yquiaadiag miech miṅe zienee to, zaacse goḷgac lo zho, teḷ pe guieḷwagw ne gneedz zho, goḷquiina;

⁹ goḷguṅguiac grē meṅ rzacnē ne no ga. Goḷguiab lo zho, laa dze ne nolu Dios zha sēēb miech xnēz me, laa dze co bdziṅle.

¹⁰ Saṅgue guiedz ne siguiēd miech yquiaadiag zho miṅe zienee to, goḷriee grē ro xnēz zho,

¹¹ gaṅlo zho glit to grē yudie co ni to, zeena guien zho gaṅle nēz ne nitlo zho ga zie zho. Goḷguiab lo zho, zha bguiba, sac binpaa zho zha grieelo sēēb zho xnēz Dios ni nēd zho goṅ zho diidz.

¹² Gacnaṅ zho gaṅle, gaḷ dze ne guṅ Dios xquieḷwxtis me, lēētaa gac guieḷnē ne tsieguiā zha Sodom, mazdraa nac guieḷnē ne tsieguiā zho.

¹³ 'Scadaa nac zha Corazín ni zha Betsaid. ¡Prob-saxe zho, sac goṅ goṅpaa zho grē milagr ne ruṅ Dios, per ib psaand zho xquieḷntseeb zho! Teḷ niaca miṅe ngaa grē meṅ Tiro, grē meṅ Sidón, niaṅ grē milagr ne goṅ zho, ib ndedsod mban niac grē zha co nio zho guieḷnē, zēēb nsaan zho xquieḷntseeb zho mbig zho lo Dios.

14 Gacnaṅ zho gaṅle, gaḷ dze ne guṅ Dios guieḷwxtis, lëētaa caxtigw ne ygaa zha Tiro ni zha Sidón, mazdraa miṅe ygaa zho.

15 Scaque zha Capernaum, masaque rzac zho niina zha nziuuraa lo Dios, per gacnaṅ zho gaṅle haxta quiet leṅ gabiḷ ga guey zho.

16 Blozhse sca bnee me, rëbchaa me lo zho:

—Grëse zha ne yquiaadiag miṅe gnee to, rrieequia naa ga rcaania zho. Zha ne nëdgaa ycaania to, rrieequia naa ga nëd zho ycaania zho; ni zha ne nëd ycaania naa, rrieequia meṅ ne pxeel naa ga nëd zho ycaania zho.

*Wbire tsonḡaltsii zha ne pxeel Jesús ga
(Mt. 11:25-27; 13:16-17)*

17 Zeene laa gza tsonḡaltsii zha co wbire, rley zho bdziṅ zho lo Jesús. Rëb zho haxta grë mendox bdzieb ma zho, zeene bzeet zho lë me.

18 Dzigo pquiab me rëb me lo zho:

—Haxta ma ne rnabey lo ma, goṅpaa naa goṅ bringaa ma, biab ma zig riabse tib belye.

19 Laa naa bneedz poder qui lo to, parne gdeete to diidz guṅ ma miṅe racladz ma; grë meeldox, grë meegu ntseeb, niicle gzoobni to ma, peet gacde to.

20 Nli laa to ruṅcxooṅ mendox niina, per gleyde to por miṅ co, sinque mazd golley porne laa lë to zhooble lo Dios, laa to ngable lo me.

21 Horco biaad tib guieḷbley nroob zdoo Jesús, bnee me lo Dios, rëb me:

—Papá, luu nac meṅ ne rnabey gbaa, luu nac meṅ ne rnabey guidzliu, rnedz naa xquizh lo luu, sac grë miṅe noyṅ luu nu niina, bdeete luu diidz niacnaṅ grë zha raca, sinque laaw blu luu lo grë

zha ne nac zig grë mөөдlas. Sca quiayun̄ luu, sac ib scale racladz luu gaca.

²² Blozh ga rëb me lo grë miech ne ndxie lo me ga:

—Grëse ncuaane ran̄ to quiayun̄ naa, Dios men̄ ne nac Pxoꝝ naa, me bneedz poder rii lo naa; sac ib laa me bzo naa, naa gun̄a. Xpëed me nac naa, wen wen runbey me naa, scagaa naa wen wen runbey naa me. Choot runbeyd me zigne runbey naa me, per zha ne gded naa diidz gunbey me, zunbey zho me.

²³ Dzigo rëbchaa me lo xpëedscuel me:

—Dichos to bgaa to noyan̄ to grë min̄ rii.

²⁴ Sac gon̄ blactaa zha ne biadteed xtiidz Dios padzeela, haxta grë zha ne bnabey len̄ dze co, bzoobladz zho nian̄ zho grë ncuaane noyan̄ to, bzoobladz zho nquiaadiag zho grë ncuaane noquiaadiag to.

Xcuent tib zha Samar

²⁵ Tib dze wbig tib zha ne nac maistr ley lo Jesús, bnabdiidz zho lo me, rëb zho:

—Maestro, bnë lo naa dien̄, ¿pe nac mine gun̄ naa parne grieelo ygaa naa guielmban ndzon ne gdziind dze lozh?

²⁶ Pquiab Jesús rëb me:

—¿Zha dien̄ zhobnee lo ley? ¿Pe rnabeya?

²⁷ Rëbchaa maistr ley co:

—Znu rneew: “Dib zdoo luu, dib nacse luu, dib guielbiini ne no guic luu, dipse xfuers luu, bleynie Dios; ni bleynie samiech luu, zigne rleynie luu luu.”

28 —¡Min qui nagon bioxco gun luu —rëb Jesús—, zeena yгаа luu guielmban ndzon ne gdziind dze lozh ga!

29 Per par glud ne noxcod me gun me mine rnabey ley, dzigo pquiaalo me rëb me lo Jesús:

—¿Chopaa dzigo nac samiech naa, zha ne no gleynie naa?

30 Dzigo bzodiidz Jesús tib cuent lo me, rëb Jesús:

—Tib men wladz name brieer me Jerusalén zie me guiedz Jericó. Nëz zie me brieequia ngbaan, bdiin ngbaan me, mer niut ngbaan me; grëse ncuaane ney me, haxta xab me blan ngbaan.

31 Laa me nix ga, zeene laa tib pxoz bded. Zigne gon pxoz me, biecwga pxoz bded pxoz tib lad.

32 Wdzeepaaw, zeene laa tib zha ne runaque dziin len yadoo ziaad ga; scaque zigne gon zho me, tib tib bded zho.

33 Sca nix me ga, zeene laa tib zha Samar bdziin. Zeene gon zho me, wbig gax zho lo me; pquia zdoos zho me gon zho zha rna me.

34 Gagazh been zho me rmed, blee zho vin bdiib zho lo grë rid ne ney me, bdëëb zho nceita, pxidoo zhow. Blozhse ga, blis zho me bzoob zho me lad xcuay zho laa zho zienie me, haxta bdziinnie zho me tib yu ne rbëz miech ne zo nëz; ga blëznie zho me, pquianap zho me.

35 'Biini liu, zeene laa zho brieer ga, blee zho palal dimi, lal ne non chop xtse zha ne rie dziin, bdeed zhow lo bizhuan yu co, parne yquiaanap me men co, rëb zho: “Peet tsienied guic luu, telne nroobraa gun luu gaxt, na zeene gbire naa dzigo quizh naaw.”

³⁶ Blozhse bzodiidz me cuent co, rëbchaa me lo maistr ley co:

—Lo gza tson zha ne nadien bded zaatne nix men co, ¿cho tib zho bien samiech zho ga nac me?

³⁷ Pquiab maistr ley co rëb me:

—Zha ne bion bded gaw, sac zha co pquia zdo me.

Dzigo rëbchaa Jesús lo me:

—Sca nagon none gun luu.

Blëz Jesús lidz Mart ni Marí

³⁸ Laa Jesús no nëz gza xpëëdsuel me. Bdziñ me tib guiedz win, ga no tib wnaa lë Mart, dzigo men co bdeed zaatne blëz zho.

³⁹⁻⁴⁰ Bdziñ zho lidz Mart, lëëlëd bzëëb Mart ro tie. Zhixco ro tie no Mart, laa tib bel Mart lë Marí zob noquiaadiag grë zhiwseed Jesús. Gon Mart rgaadraa nia Mart, dzigo wbig Mart rëb Mart lo Jesús:

—Bzhiguiel bnee lo bel naa guiaad me gun me xyudar naa. Bui ganle tipse naa psan me ro tie.

⁴¹ Pquiab Jesús rëb Jesús lo me:

—Aque luuw nli Mart, squitaa noxco luu dien zha gac xtsiin ro tie luu.

⁴² No tib ncuaane mazdraa none tsoxco luu, ni lëë min co nu gon noyun Marí; gane grieelod ycaa naa mine quiayun me.

11

Zha none gzodiidznie ne Dios

(Mt. 6:9-15; 7:7-11)

¹ Tib vuelte, loxaque blozh bzodiidznie Jesús Dios, wbig tib xpëëdsuel me rëb lo me:

—Maestro, bzhiguiel blu lo no dien zha gzodiidznie no Dios, zigne been Juan Bautist pseed me xpëëdsuel me zha gzodiidznie zho Dios.

² Dzigo rëbchaa Jesús:

—Zeene gzodiidznie to Dios, golguiab:

Dios, luu nac Pxo^z no, zob luu gbaa;

luuse nac meⁿ ne mazdraa ndzon.

Luu nac meⁿ ne gnabey no,

miⁿe gnabeytaa luu, zigne raca gbaa,

scaque none gaca lo guidzliu nu.

³ Been guieln^zaac bneedz ncuaane dioow no nadze.

⁴ Bzhiguiel been no perdon grëse dol ne ziodziuuⁿ
no lo luu,

zigne rdziuuⁿ no samiech no perdon grë falt ne
ruⁿ zho lo no.

Gdeete luu diidz yquiil men^dox no,

been guieln^zaac bla no lo ma.

⁵ Sca nagon gnee to —rëb Jesús—. Ncuaane gnab to lo me zneedz mew. Samiechse to name, gzoob ne wxiⁿa, lega nacle glanso tib zha ne ndzieeldiidz to ni guien^d pe gdeed to gow zho. Dzigo tsie to lidz stib zha ne ndzieeldiidz to guiab to lo zho: “Bzhiguiel beenxtad tsonaque xcuuⁿ luu lo naa.

⁶ Lega nacle blanso tib zha ne runbey naa, na guien^d pe gded naa yquiin zho.”

⁷ Segur znë zho: “Gunneete luu naa nu, dziitsle nioog ro lidz naa, nataa nixguies grë xpëëd naa; grieelod gache naa gnedz naa ncuaane racladz luu.”

⁸ Per telne sonaad to ga, ganse zho tibaque quia-nee to, gnid naa zho tsieched zho gneedz zho ncuaane racladz to. Per gneedzd zhow porne

ndzieeldiidz to zho, sinque laa zho gneedza porne gon zho tibaque quianab tow.

⁹ Scaque nagon none gun to, zeene pe gnab to lo Dios. Ncuane rquiin to, golnaba lo me, scagaa me zneedz mew. Golguib tel pe racladz to, me nac men ne gacnie to gdziel tow. Golcuedzle me, scagaa me scaania me to.

¹⁰ Sac grese zha ne rbig lo me rnab zho ncuane rquiin zho, rdeed mew. Zha ne rguib ncuane racladz zho, racnie me zho rdziel zhow. Zha ne rbedzle me, rcaania me zho.

¹¹ Golguien ganle, zig nac to, zeene rnab xpëed to tib mel gow win, ¿niacxe ziazh to co to tib meel nia win?

¹² Zeene rnabgaa win tib dzit, ¿niacxe zgo to tib meegu nia win?

¹³ Led rioxco to lëe niapse ncuane wen rdeed to lo xpëed to, niicle ne miech ntseeb nac to. Telne sca rioxco to xpëed to, pelel PxoZ to dzigo, men ne zob gbaa, tsoxcod me to. Ib tedsod grese zha ne gnab lo me gdeed me ncuane rquiin zho, zdeed mew; haxta zha ne gnab cxeel me Espiritu Sant gacnie zho, zun me mine gnab zho.

Rëb zho mendox nacie Jesús

(Mt. 12:22-30, 43-45; Mr. 3:20-27)

¹⁴ Tib vuelte beñcxoon Jesús mendox ne nosacsi tib mgui co. Ib gacd gnee mgui, sac psan ngop ma mgui. Dzigo zigne beñcxoon Jesús ma, laa mgui psilo bnee. Grë miech ne ndxie ga, bzee zdoo zho gon zhow.

¹⁵ Nogaa zho rnee, Beelzebú ma ne rnabey lo mendox, ma co nacie me gane rrieelo runcxoon me mendox.

16 Brieequia spalal zho, rnab zho lo me guṅ me pe stib milagr, parne gliladz zho nli Dios pxeel me.

17 Bien Jesús zha rza guic zha ne noneenë me ga, dzigo rëbchaa me lo zho:

—¡Ncuaane gacd goṅ rnee to! Teṽ tib guiedz nadien, csilo miech, lëëque zha tilnie menladz zho, ¿niacxe nitlod guiedz co? Tib diigaa miecha, teṽ lëëque zha tilnie menlidz zho, led znuse lëë nitlo dii co.

18 Scaque mendox nagon, telne lëëque lëë ma guṅcxoon samenodox ma, ¡pe nale na bnitlo ma! Laa naa rne miṅ rii lo to, porne rnee to ma ne rnabey lo mendox nacie naa, gane rrieelo ruṅcxoon naa ma.

19 Nana telne sca rzac to, ¿zha ne nacgrë to dzigo, cho nacie zho ne ye zho ruṅcxoon ma? Gase naganle rlu doldox i quiayun to squi rnee to.

20 Sangue tel naa, Dios nacie naa ruṅcxoon naa mendox, ni ga rlu ganle laa Dios pxeelle men ne gnabey lo to.

21 ¡Masaque nac mendox zig tib zha ne no xfuers! Tib zha ne no xfuers, teṽ tibaque ney zho xquiib zho, ¿cho dien lega sëëb lidz zho gla ncuaane quianie zho?

22 Per zeene rrieequia stib zha ne mazdraa no xfuers, zha cole rtiche zha co, ruṅcxoon zho zho, riaanne zho grë ncuaane gopchen zho.

23 Golgacnan sca ganle, zha ne rlëë lo naa, ga rlu nacdied zho naa; ni zha ne racnied naa lo xtsin naa, paat yquiind zho.

24 Mendox ne rsacsi miech, zeene laa ma rsaan zho, rie ma riequianzë ma dan zaatne choot miech guiend, rguib ma dien pa cuëz ma; ranse ma

rdziel̄d zaatne cuēz ma, rnee ma: “Mazd gbire naa guia naa lidz naa stib.”

²⁵ Dzigo rbire ma, zeēne rdziñ ma lo zha ne psacsi ma ga, masaque rzac ma zho zig rzac miech tib yu ne griiñ bliooḅ, tib yu ne ine nzhixcuaa leñ.

²⁶ Dzigo rie ma riexi ma zgadz samēdox ma, ma ne mazdraa ntseeb, rdziñ ma gza ma rzēēb ma zdoo zha co, rsilo ma rsacsi ma zho. ¡Horcole mazdraa mban ruñ ma zho!

²⁷ Sca quianee Jesús, zeēne nguiedz bnee tib wnaa ne no lad grē miech ne ndxie lo me ga, rēb wnaa co:

—¡Dichos wnaa ne gop luu, wnaa ne bgadz luu!

²⁸ Pquiab Jesús rēb me:

—¡Mazdraa dichos zha ne goñ, yquiaadiag Xtiidz Dios ni tsoxco zho gban zhow zigne naca!

Zha ne rliladzd cho nac Jesús

(Mt. 5:15; 6:22-23; 12:38-42; Mr. 8-12)

²⁹ Miech guizhiu ne quiazin̄raa lo me ga, dzigo bnee me rēb me:

—Nadzpaa ntseeb zdoo to nac to miech ne mban leñ dze rīi. Tibaque quia to racladz to gañ to pe stib milagr, parne gliladz to Dios pxeel̄ naa, ¿zha rnaraa milagr ne racladz to gañ to? Gacnañ to ganle, stibaque milagr goñ gañ to, tib miñe csoladz to zha goc Jonás.

³⁰ Haxta dzigora a nagon̄ guien̄ to nli Dios pxeel̄ naa. Sac tel̄ Jonás, zeēne gocnañ zha Nínive zha bzhaac me, dzigo bliladz zho nli Dios pxeel̄ me.

³¹ Ni gacnañ to ganle, zeēne gal̄ dze ne laa Dios guñ xquiel̄wxtis me, zieso wnaa ne goc rein nēz Sabá, steedquie me to. Sac goñ pa lo ga brieē me, biaad me biadquiaadiag me grē xtiidz Salomón; ni

to, lo to nu zo men ne mazdraa non lo Salomón, ni néd to gon to xtiidz me.

³² Scaque grē zha Nínive, steedquie zho to; sac gon zeene güeynee Jonás lo zha Nínive, znuse bin zho diidz psaan zho xquie_lntseeb zho wbig zho lo Dios; ni to, lo to nu zo men ne mazdraa non lo Jonás, ni ib runcasde to me.

³³ Tsod zha ne yquiaagui tib biini, lozh ga ctoos zho pe cos low, gzolangaa zhow zaatne ngueets. Sac biini ne rquia, glaa rzoba par gziiniw len yu, zeena guiab biini lo grēse zha ne sēeb len yu.

³⁴ Rreequia nac bziaalo miech zig nac tib biini. Telne niapse lo grē ncuane ndzinli rwi zho, dzigo gdipse xcuerp zho no lo guie_lbiini. Laa telne lox- aque lo grē ncuane nonguiel_ldga rwi zho, dzigo gdipse xcuerp zho no lo guie_lcow ga.

³⁵ Gol_lguie_l sca pa lo rwi to, napaa laa ne tso to lo biini, le_l lo guie_lcow no to.

³⁶ Sac gon, tel_l dipse xcuerp to no lo guie_lbiini, ni tib lēw nod lo ncow, zlupaa to; sac masaque nac to ga zig tib zha ne zo gax tib lo biini nroob.

Güey Jesús lidz tib zha farisé

(Mt. 23:1-36; Mr. 12:38-40; Lc. 20:45-47)

³⁷ Zeene blozhse bnee Jesús lo grē miech co, dzigo bredz tib zha farisé me güeynie zho me tib wagw lidz zho.

Bdzin me lidz zho, bded me bzob me lo mezh,

³⁸ psilo me dow me, per bdiibd me nia me zigne nacpaa xcostumbr grē zha Israel. Zeene gon zha farisé cow, rlozhd gzee zdoo zho;

³⁹ dzigo rēbchaa me:

—Grë to ne nac to zha farisé, laglaase rlu to miech wen nac to, per zdoo to ntseeb to, sac niapse guielntseeb, niapse guielgbaan run to; masaque nac to gon zig tas, zig plat ne nëz zhitsse mbe rna, laa nëz leña rnadraa di beed.

⁴⁰ ¡Nadzpaa ncow nac guic to! ¿Pe riende to racladz Dios ne laglaase glu miech wen nac to, sinque racladz me desde zdoo to gac to miech wen? Sac dib nacse to psan me to.

⁴¹ Laa ne squi no to noban to, mazd goldeed ncuane nacchenpaa to lo grë zha ne guiend pe yquiin, zeena gac to miech ne nlipaa wen.

⁴² ¡Probsaxe to! Rzac to demas nguzobdiidz to lo Dios, rio to haxta grë guizh bitxtil, grë guizh rud, ni grëragaa guizh ne ran to, rdeed to xdiezm to yadoo; per rioxcode to gban to zigne rnabey Dios, ib rioxcode to gleynie to samiech to. Ible none tsoxco to min rii, ni bii scaquegaa tsoxco to gdeed to xdiezm to.

⁴³ ¡Probsaxe to! Rdziladz to gacnon to lo miech, zeene rie to yadoo, zaatne glupaa non to, ga rzob to; scaque ndooladz racladz to gnee miech bdiuzh lo to, zeene rdzieel zho to dib ro nëz.

⁴⁴ ¡Probsaxe to, lëëtaa rdzieel to grë to maistr ley! Masaque nac to zig nac grë baa ne rludraa pa nac. Telbaa cow, zeene rded zho zaatne niaaw, ib riend zho lad grë ncuana noyodz ga, noded zho.

⁴⁵ Horco pquiab tib maistr ley, rëb zho lo me:

—Maestro, ¿ye no dzigo lëë rzoob luu squi nac?

⁴⁶ Pquiab Jesús rëb me:

—Ye to gon. ¡Probsaxe to! Rio to rzadraa ley ne rnabey to gun miech, ni per ni to rioxcode to siquier csilo to gun tow.

47 ¡Probsaxe to! Paat rquiinda gon squi rio to, rlozhd dieen paraa rzhixcuaa to ro xpaá grë zha ne biadteed xtiidz Dios padzeela.

48 ¡Iguál ntseeb to grë pxozgol to! Sac gon, zha beet grë zha co, laa to no rzhixcuaa to ro baa.

49 Nanle Dios squitaa ntseeb zdoo to, mine run to ga bnee me, zeene rëb me: “Sxel naa grë zha ne tsieteed xtidz naa lo zho, sxel naa zha ne tsieneew lo zho, per nanle naa gandzed zho zho, haxta zut zho gro! zho.”

50 Gacnan to sca ganle, grë to miech ne mban len dze rii, grë to gunquizh Dios xchen grë zha ne pxeel me biadteed xtiidz me wlal ne ndxie guidzliu,

51 desde Abel haxta Zacarí men ne beet pxozgol to len yadoo zaatne nac gax lo pcoog. ¡Ne nligaa grëse dol co gon, to quizha!

52 ¡Probsaxe to maistr ley squi nac to, ib rneede to diidzli lo miech! Nac diidz to cseed miech guien zho zha nac Xtiidz Dios, per nëde to gliladz tow, ni niicle nëedgaa to gliladz zha ne racladz ycaaniaw.

53-54 Blozhse ga, laa me brieë ga. Grë zha farisé, grë maistr ley, per nli rlëë zho bin zho sca rëb me. Psilo zho nzian grë ncuaane rnabdiidz zho lo me, rguib zho dieñ zha gunglëë zho me, par dieñ pe cxiñd me pe tib diidz, zeena miñ co yquiaaqui zho tsiezoob zho xdemand me.

12

*Grë ncuaane rac ngueets zhliian
(Mt. 10:19-20, 28-33; 12:32)*

1 Miech guizhiu ne pcaalsa lo Jesús, haxta rcheeplsa zho. Dzigo bnee me lo xpëedscuel me, rëb me:

—Golguien gon, gunde to mine run zha farisé, tel zha rquiaalose zho miech wen nac zho.

² Sac grëse ncuaane sca ngueets rac, grëse ncuaane rlud miech, zdzin dze ne xoobneña.

³ Zig nac grë ncuaane zhliaanse rnee to lo ncow niina, zdzin dze ne gon miecha zobna ngbidz; grë ncuaane rnee to len yuse, zdzin dze ne dib lad guiedz gacnan miecha.

⁴ 'Golgona ganle bets: Ib gdziebde to zha ne gacladz gut to. Nli zrieelo gut zho xcuerp to, per peet grielodraa zho gun zho.

⁵ Golguien, Dios nac men ne mazdraa nroob, mine rnabey me min co none gon to. Sac tel me, zrieelo me gnitlo me miech dib xcuerp zho, ni lozh ga zrieelo me gzonëz me zho nëz len gabil.

⁶ Nligaa gdziebde to miech, csaand Dios lega pe gac to. Golwi ganle, zig nac grë mguin, niicle ne rzac miech peet nond ma, haxta chop ma rto zho por tib gaay centav; per tel Dios, ib rsaanladzd me ma.

⁷ Pelel to dzigo csaan me, haxta guits guic tow, grësew ngaba lo me. Gdziebde to sca, golguien ganle nonraa to lo tib dzoon mguin.

⁸ Ni gni naa lo to ganle, zha ne glu lo miech nacie zho naa, scaque naa ne nac naa Mgui ne pxeel Dios, zeen gal dze co zlu naa lo grë xanjl Dios, nacie naa zho.

⁹ Saingue zha ne ctoladznie naa lo miech, scaque naa ziep naa lo grë anjl co runbeyd naa zho.

¹⁰ No zha ne rneenë naa, per zun Dios zho perdon dol co; saingue zha ntseeb ne gneenë Espiritu Sant, ib gundraa me zho perdon.

11 Zeene tsiezo miech rii to lo grë zha ne rnabey xyadoo zho, tsiezogaa zho to lo grë zha ne nac wxtis, tsode to zhgab dien pe gnee to;

12 sac zeene sca tsiegala, Espíritu Sant csiaab guic to pe nac mine gnee to lo zho.

Zha ne loxaque rapchen

13 Horco wbig tib zha ne no lad grë miech co, rëb zho lo Jesús:

—Maestro, bzhiguiel bnee lo bets naa glë zho ncuaane psan pxoz no, gneedz zho mine raguial naa yca naa.

14 —Aque luuw nli —rëb Jesús—, ¿cho në lo luu laa naa noyūn guielwxtis co? Ziald naa gon par quiiz naa ncuaane rap miech.

15 Dzigo bnee me lo grë miech co, rëb me:

—¡Golguien gon, gzoobladzde to demas gapchen to! Sac niicle ndziibraa gapchen miech, grieelod por grë ncuaan co ndzon gac lo xquielmban zho.

16 Znu gon bzhaac tib men ne nroob gopchen. Nat liu quianie me, zeene rlaap me grë ncuaane ran me, nroob ncuaane rlis me low.

17 Bdziñ tib dze rgaadraa pa tsotsow grë ncuaan co, dzigo bzob me dien zha gun me.

18 Tibaque zeene rëb me: “Mine naca laa naa gun nroob grë yu qui, zeena zigtaa grë guielnzaac quiw, grëragaa ncuaane rap naa, ga tsotsowa grësew.

19 ¡Pe zhidaa iz ne lëb grë ncuaan co! Peet tsieniedraa guic naa, ine guxt sob naa, gow naa, guie naa ncuaane gacladztaa naa.”

20 Min co rza guic me, tibaque zeene rëb Dios lo me: “Nadzpaa nxen luu. Guieel riigazh gon laa

luu guet. ¡Zhaale zha ne guiaanne grëtaa ncuaane beenlo luu i!”

²¹ Zeene blozh bzodiidz Jesús cuent co, rëbchaa me:

—Sca nagon rzac grë zha ne loxaque dien zha gapchen zho zienie guic zho. Ncuaan cose rionie guic zho, ib rioxcod zho gun zho ncuaane non nëz lo Dios.

Rsaand Dios zha ne no xnëz me
(Mt. 6:19-21, 25-34)

²² Blozh ga, rëbchaa me lo xpëdscuel me:

—Gacxe waa, gni naa lo to ganle: Tso de to zhgab dien zha gban to lo guidzliu rii, pa grie e pe gow to par gban to, pa gdzielgaa ncuaane gdze xcuerp to.

²³ Mazd golconie guic to dien zha gac xquielmban to, dien pa tsiebannie to xcuerp to.

²⁴ Golwi lo grë nga ganle, led yed ma ran, led yed ma rlaap, led yed ma rgotsow pe guielgon, per row ma; sac Dios rdeed ncuaane row ma. ¡Tel to gon, mazdraa non to lo grë mguin co!

²⁵ Ni lalnu paat rquiinda tant tso to zhgab. Telne guiab to tso to zhgab dien zha gacnool xtse to spalal yeense, ¿niacxe zrieelo to gunnool tow?

²⁶ Nanle to ganle led ncuaane grieelod ga. ¿Pe nac dzigo tant tso to zhgab ncuaane mazdraa nroob?

²⁷ Zig nac lar, ¿pe nacne tant tso to zhgab dien pe gacwxab to? Pe rwide to lo grë guiee dzil ne ganle zëeb dan, zha rrooba, niow rluw, ni led yeda rio zhgab dien zha gacwxaba; ni gni naa lo to ganle, per ni rey Salomón con grë xab niazh me, blud me scataa niow.

²⁸ Gase na ganle golwi, niicxe grë guiee dan co na, zna dze zob nguiaw, gzhe widz laaw bidzle, laaw

tsecle, ni scataa niow rgacwxab Diosa; ¿pe lel to dzigo ygacwxabd me, niicle ne squi gard guien to dib zdoo to gnalo to me?

²⁹ 'Tsodraa to zhgab sca, guiab to: "¿Pa griee pe dioow ne, pa griee pe dio ne?"

³⁰ Grë miech ne runbeyd Dios, tibaque zhgab co rio zho. Sangue to, golsoladz ganle Pxoꝛ to men ne zob gbaa, nanle me pe nac grë xliaadz to.

³¹ Me nac men ne gneedz ncuaane yquuin to, per ib none glo tsoxco to gban to zigne rnabey me.

³² 'Nli zhis to, pale tib dzoon win mëcwxiiil yeen, per gdziebde to. Sac niicle zhis to, per rley Pxoꝛ to men ne zob gbaa, laa me rneedz grëse ncuaane rap me lo to.

³³ Gacxe waa, laa ne tsonie guic to dien zha gacnroob ncuaane rap to, mine quianie to goltow, dzigo goldeed dimi co yquuin zha ne rappaa liaadz; zeena sca nroobraa guielnzaac ne ygaa to gbaa. Guielnzaac cosi, led yeda nitlo, led yeda grë, led yeda tsoxtseeb lo ngbaan, tsoxtseebgaa lo mxil.

³⁴ 'Sca golgun, sac gon guielnzaac ne gunlo to, zaatne gunlo tow, ga gdziñ to.

¡Nsin golso!

(Mt. 5:25-26; 10:34-36; 16:1-4; 24:45-51; Mr. 8:11-13)

³⁵ 'Nsin sca golso —rëb me lo zho—.

³⁶ Golgac zig tib ngundziin ne rquiambëz gbire men ne rnabey zho zeene pa rie me tib lo guieltsieel. Nsin rzo zho, zigne rdziñ me, rxal zho ro yu rzëeb me.

³⁷ 'Dichos zha ne nsin zo zeene laa men ne rnabey zho glanso. Ib tedsod, steed me zho nëz len

yu, soob me zho lo mezh, csilo me mezh al gdziib ncuaane gow zho.

³⁸ Nligaa dichos zha ne sca nsin so, horne glansotaa me; niicle tel wxina, ziadyiinigaa liuw.

³⁹ Golgan ganle, tel niaca mine gacnan miech laa ngbaan tsieban lidz zho guieel, per nand zho dien pa horpaaw, ¿niacxe zaaguies zho? Led sobna zho lëë, nsin nsin so zho parne csaand zho sëëb ngbaan lidz zho.

⁴⁰ Scaque to nagon, none sca nsin so to, sac gon lega naclew zeene gan to laa Mgui ne pxeel Dios ziaadle.

⁴¹ Zeene blozh sca bnee me, rëbcha Pedr lo me:
—Maestro, mine blozh bnee luu i, ¿pe par nose naca, te ye par grëraa miecha ye?

⁴² Pquiab me rëb me:

—Laaw rne naa, par grëse zha ne zienie guic zaacse gun zho mine rnee men ne rnabey zho. Nligaa nsin none so zho, sac laa zho guiaannie zha ne nacgrë zho, zig riaannie tib ngundziin sangundziin zho parne gdeed zho ncuaane gow zho.

⁴³ Dichos zho, telne ine niowse noyun zho dziin co zeene laa men ne rnabey zho glanso.

⁴⁴ Zeene gan mew, ib tedsod so me zho, zha gnabey grëse ncuaane quianie me.

⁴⁵ Per tel tsienie wguic guic zho guiab zho gbireniobd me, csilo zho lel csacsi zho grë zha ne biaannie zho, tso zho loxaque gowcho zho, loxaque gzudz zho,

⁴⁶ tibaque zeene gan zho laa me zole lo zho; ib tedsod hor cogazh ctiche me dziin co lo zho, gzonëz me zho guey zho zaatne no grëraa zha ne rond diidz. Nroob caxtigw ne cteed me zho.

47 'Sac gon zha ne sca nanle pe nac mine racladz men ne rnabey zho, ni tsoxcod zho gun zhow; ible nroob nac caxtigw ne ted zho.

48 Mazd lëëtaa caxtigw ted zha ne peet nand, niicle gund zho mine rnabey me. Grëse zha ne nanle pe nac mine no gun zho, ib none gun zhow; nac cuent rii zig tib zha ne rcaania pe cos, tel palal mine pcaania zho, none haxta nroobraaw ctsire zho.

49 Niina ne laa naa zial, rrieequia zialzobgui naa lo guidzliu. ¡Ni zoot naa gon, tebaa ranle naa laaw quiayazbel! ¡Tebaa psiaalle naa lo dziin ne zialgun naa!

50 Per na naraa none teed naa tib guielnë nroob, ni mbanse gon rac zdoo naa quiambëz naa gdziin dze co.

51 ¿Masaque nan to na lëë, laa naa zial loxaque par cuiñ wense miech? Lëda gon, ye zial naa zialgunctil naa zho.

52 Sac desde len dze rii, yu ne no gaay miech, laa zho ctsolsa. Tel sëëb chop zho xnëz naa, laa stson zha ne guiaan ga, ctsidil zho; tel sëëbgaa tson zho, scaque grop zha ne guiaan ga, gandzed zho zho.

53 Mëed ne gan laa pxoz zho, laa xniaagaa zho bzëëb xnëz naa, gandzed zho pxoz zho, gandzed zho xniaa zho; scaquegaa zha ne quianie mëëda, zeene gan zho laa xingan zho, laa xindzoopgaa zho bzëëb xnëz naa, gandzed zho zho. Zha ne nac nguzhizha, zlëënie xniaa tsieel zho zho; tel xniaagaa tsieel zhow, zlëënie zho me.

54 Blozhse sca bnee me, rëbchaa me lo grë miech ne ndxie ga:

—¡Pe nlipaa rnee to riende to pe nac grë ncuaane

noyac len dze rii! Zha zeene ran to rquia xcow nēz ne rzēeb ngbidz, znuse rien to laa guie guiab.

⁵⁵ Zeene ranḡaa to ziaad me nēz ne rzē ngbidz len mēē naḡ, nanḡle to laa nēēḡ gac.

⁵⁶ ¡Guielwquiaaalo i lo to gon! Zha zēēb dzigo runbey to grē señ ne rlu zhan gbaa, rlugaa lo guidzliu, laa grē miḡe quiaḡan to len dze rii riende to.

⁵⁷ ¡None guien to tozhal cobey dien pe nac miḡe nonguiel gon to!

⁵⁸ Gzoob ne bdilnie to tib samiech to, laa to nole nēz zie to lo wxtis grop to. None guien to, laga no to nēz mazd golḡuaaḡn mpas, lēdle tsiezo zho to lo wxtis; sac tel laa to gdziḡn lo wxtis, ib znabey wxtis zha ne co to ladzguiib.

⁵⁹ Ni nanḡle to ganḡle, grieede to ga, haxtaque lozh quizh to tel palal gac mult ne gnab zho lo to.

13

Grēse miech, ngoopdoḡ nac zho

¹ Len dze co, bdziḡn bla zho lo Jesús bzodiidz zho lo me zha bnabey Pilat gut bla zha Galilé, lēētse zeene no zho len yadoo noyut zho ma ne nogogon zho lo Dios.

² Dzigo rēbchaa Jesús lo zho:

—Segur na lēē, rēb to mazdraa ngoopdoḡ grē zha co lo grēraa zha ne no nēz Galilé, gane sca bdzieelo zho.

³ ¡Lēda gon! Zigtaa ngoopdoḡ zha co, scaque to ngoopdoḡ nac to; telne csaande to xquielntseeb to gbig to lo Dios, ye to znitlo to.

⁴ Scaque tsiimtson zha ne bgaadz yuglaa ne bixche Siloé, masaque rëb to nagon mazdraa ngoopdol zho lo grëraa zha Jerusalén, gane sca gut zho.

⁵ Per gacnan to ganle, jlëda! jZig rne naa ga, ye to miech ngoopdol nac to, ni telne csaande to xquielntseeb to gbig to lo Dios, ye to zdziñ dze ne nitlo to!

⁶ Dzigo bzodiidz me tib cuent lo zho, rëb me:

—Tib men name, zob tib zhan yag guigw lo xcuaa me zaatne quianie me lbë uv. Cad rdziñ mëë ne rquia guigw, rie me rieguib me nex low, per ib peet rquiad. Zeene goctaa tson iz, gon me sca rdeetew nex,

⁷ dzigo bnabey me zha ne quianap liu co cchuggazh zhow, rëb me: “jPchuggazh yag yozh qui, zhlëse zoba i! Nale rac tson iz ziyal naa rguib naa nex low, ni peet nex rneedzda.”

⁸ Dzigo pquiab zha ne quia dziin lo me ga, rëb zho: “Psaan dien guiaana stibtaa iz rii, na laa naa glë zhana, na laa naa gdziñ beeba.

⁹ Telne yquiadaque nex low iz ne ziaad, maase cchug new dzigo.”

*Biac tib zhuz ne nosacsi mendox
(Mt. 13:31-33; Mr. 4:30-32)*

¹⁰ Tib dze ne rdziiladz zha Israel lo dziina, bdziñ Jesús len yadoo, psilo me noseed me miech.

¹¹ Lad grë zha ne noseed me ga, lad co no tib men wnaa nlengw nac zhits, gocle tsiimtson iz sca nosacsi mendox me, ib gacd gacnli me.

¹² Zeene gon Jesús me, dzigo bredz me me, pxobnia me guic me, rëb me lo me:

—jNiinagazh gon, laa luu guiac!

¹³ ¡Horcogazh laa zhits me ga gocnli, rley me, psilo me rdeed me xquizh lo Dios!

¹⁴ Laa zha ne rnabey yadoo, zeene gon zho sca beenguiac Jesús me dze co, blëe zho, rëb zho lo zha ne ndxie ga:

—Zha ne racladz guiac pe lo guielguidz, pe gacd guiaad zho len dze ne rac dziin, ¡led tsod zho guiaad zho guiac zho dze nda rii!

¹⁵ Dzigo pquiab Jesús rëb me:

—¡Nazdpaa ntseeb to! Rquiaalo to ib peet dziin runde to dze rii. ¿Pezhe ga waa run to zeene rsilaa to xcon to, rsilaa to xpurr to dze rii rieguie to ma nis?

¹⁶ Zha nac dzigo rzac to, nonguielda nu ben naa beenguiac naa wnaa rii, dze rii. Golwi ganle zha xtii Abraham nac me, len tsiimtson iz goc sca nosaci mendox me.

¹⁷ Zha ne rlëe ga, zeene bin zho sca rëb me, ptoladz zho; laa grëraa zha ne ndxie ga, rley zho ran zho grëtaa milagr ne run me.

¹⁸ Blozh ga, bnee me rëb me:

—¿Zha ganle racnroob lo xtsiin Dios lo guidzliu rii?

¹⁹ Racnrooba gon zig rroob tib midz moxtaz ne ran zho dan rii. Tel midz moxtaza niicle tib midz winsew, zaatne racbniw, rrooba, raca tib yag nroob; haxta rie grë mguin riezhixcuaa ma zhiptsieez ma low.

²⁰ 'Ziaadaque gon gaca, zig ncobi.

²¹ Sac tel ncobiw, niipaquew rcots men wnaa tson lmud rin, ni dib nacse ncob co rzibe.

*Zha ne ycaania Dios
(Mt. 7:13-14, 21-23)*

²² Laa Jesús no nēz zie me nēz Jerusalén. Guiedz ne rdedtaa me rseed me miech; zigtaa guiedz nrooba, zigtaa guiedz wina.

²³ Tib vuelt bnabdiidz tib zho lo me, dien pe zhis nac miech ne ycaania Dios. Dzigo pquiab me rēb me:

²⁴ —Nligaa zhis zho, sac masaque naca zig tib puert niase. Goltsoxco sca niinasraa golsēēb xnēz me ycaania me to, sac zdziñ dze ne nzian zho gacladz sēēb, per grielodraaw.

²⁵ Deque laa men ne rnabey csioog ro yu, telne biaan to nēz ley, niicle cuedzraa to me gnab to siguiel me cxal me ro yu sēēb to, per cxaldras mew. “Runbeyd naa to”, gnē me, “nand naa dien cho zha to.”

²⁶ Niicle guiab to runbey me to, biaadpaa me ladz to pseed me miech, haxta downie to me.

²⁷ “Laa naa nile”, gnē me, “runbeyd naa to. ĩGunneetraa to naa, ĩb rdziguiend naa grē miech yozh, miech ngoopdol ne nac to!”

²⁸ Mban gac to zeene gan to laa Abraham, laa Isaac, laa Jacob ni grēraa zha ne biadteed xtiidz Dios, laa me pcaania zho, laa to biaanse nēz ley. Nligaa mbandox gac to, zoon to, haxta zow lay to lo guielne co.

²⁹ Ni mazdraaw gon, zeene gan to pa lo guidzliu brie grē miech ne bdziñ ga, ine zobnie me zho lo xmez me noyownie me zho.

³⁰ Grē zha ne rzac to niina peet nond, lētse zha co yгаа guielnzaac co; laa grē zha ne rzac non zho niina, peet ygad zho.

*Bzeet Jesús zha nac zha Jerusalén
(Mt. 23:37-39)*

³¹ Dze coquew, bdziñ bla zha farisé rëb zho lo Jesús grieeniob me ga, sac laa Herod racladz gut me.

³² Dzigo rëbchaa me lo zho:

—Gołtsie gołguiab lo mëz win co cxecw me spalal, nadzese ni gzhe guñguiac naa miech nu, zigtaa zha ne rzacnëw, zigtagaa zha ne nosacsi men_doxa; gal widz guien_dle naa nu.

³³ ;Nligaa nadzesew ni gzhe, widz laa naa gdziñle Jerusalén zaatne za naa! Sac ible Jerusalén, ga rut zho grëse zha ne riadteed xtiidz Dios lo miech.

³⁴ ;Aque tow men Jerusalén! ;Pe nacne squitaa nac to, rut to zha ne ziadteed xtiidz Dios lo to, rgoquie to grë zha ne rxeel me lo to? Blactaa gocladz naa niacnie naa to, nquiianaap naa to zig run nguid rgueedz ma xpëed ma, per bzhiguielde to.

³⁵ Gacnañ to ganle, nadzetaa gon laa lidz to guiaan ngan, sac gandraa to naa, haxta gal dze ne guiab to: “;Zha ndzontaa men qui pxeel Dios lo ne!”

14

Biac tib men ne rrieë gui

¹⁻² Tib dze ne rdziiladz zha Israel lo dziina, güey Jesús lidz tib zha farisé ne nac zha non, sac bredz zho me tib wagw lidz zho. Bdziñaque tib men bgui, rzacnë me, gdipse me no gui. Grëraa zha farisé ne ndxie ga, quialeets zho Jesús quiambëz zho dien pe zunguiac me mgui co.

³ Dzigo rëbchaa Jesús lo zho, ni lo grë maistr ley ne ndxie ga:

—Golnē dien, ħpe nonguiela gunguiac naa miech dze rii, te nonguielda ye?

⁴ Ni tib zho pquiabd. Horco pxobnia me guic mgui co, beenguiac me mgui. Blozhse bzonēz me mgui,

⁵ rēbchaa me lo zho:

—ħPe nli na peet dziin runde to dze rii? Tel zha tsietsobe tib xpēed to, tib xmagaa to tib len guiuu dze rii, ħniacxe tsiebeegazhde to xpēed to, tsiebeegazhdgaa to xma to ga?

⁶ Loxaque lo zho rac, ib bdziel zho pe nquiab zho.

⁷ Grēraa miech ne nodzin ga, no zho rguib zho dien zha ygaa zho zaatne nzhixcuaraa sob zho. Goñ Jesús zha rac zho, dzigo bnee me lo zho, rēb me:

⁸ —Golguien goñ, zeene znu cuedz miech to, zig nac tsie to tib wagw zaatne noyac tib guieltseel, ib gunde tsiesob to zaatne nzhixcuaraa. Sac goñ, nenda glanso tib zha ne nonraa lo to,

⁹ lozh ga, laa zha ne bredz to lo lni guiaadliso to ga, gnē zho: “Guso i dien sob men rii.” Led tib guielt to ga par to, racse to laa to tsieso ga, tsiesob to zaatne rialle ro beel.

¹⁰ Mazd ganle, zeene sca pa lo tsie to tib lo lni, ndooladz golgac, tib lad golsob. Zha ne bredzle to lo lni, zeene gan zho laa to zob ga, ziaad zho ziaadxi zho to tsiesobnie zho to zaatne nzhixcuaa. Zha ne zoble lo mezh ga, zeene gan zhow, zianzniu to lo zho.

¹¹ Golsoladz ganle: grē zha ne lēēque zha runnon zho, lel riaanwin zho; laa zha ne riaanwin, runnon miech zho.

¹² Blozh ga, rēbchaa me lo men ne nac lidz ga:

—Saque luu gon, zeene cuedz luu miech guiaad zho tib wagw lidz luu, tsod luu loxaque zha ne ndzieeldiidz luu, loxaque zha bets luu, zha lidzse luu, lo grëгаа zha ne no gax lidz luu zha ne rapchense, zha cose cuedz luu; sac gon ib tedsod zbedzaque zho luu lo zhilni zho, stsire zho mine been luu ga.

¹³ Mazd bredz grëse miech, zig nac zha ne guiend pe yquii, zig nac zha ne guiend tib nia, zha ne guiend tib ni, zha ne roldгаа lo;

¹⁴ zeena gal dze ne grieeban grë zha ne bioxco wban zigne racladz Dios, ine gley luu ygaa luu guielnzaac ne tsieguial luu gneedz me lo luu.

¹⁵ Lad zha ne zobgrë me lo mezh ga, pquiab tib zho rëb:

—¡Dichos grë zha ne sca ygaa tsiesob lo mezh, tsietownie zho Dios zaatne rnabey me!

¹⁶ Pquiab Jesús rëb me:

—Tib men name, nzian zha ne bredz me tsie tib wagw lidz me.

¹⁷ Zeene gol dze ne laa guielwagw co gac, pxeel me tib zhingundziin me ziexi grë zha co.

¹⁸ Per pasë zho nie, zhaase zhaase ncuaane pquiaqui zho. Tib zho rëb: “Grieelod së naa, sac laa naa pca tib lë liu, ni lëetse nadze no gaso naa low; bzhiguiel gudz lo me gun me naa dispensar.”

¹⁹ Stib zho rëb: “Niina wriin pca naa gaay nëz ngon, laa naa no ganie ma dien zha run ma dziin, gudz lo me yquiambëzd me naa.”

²⁰ Laa stib zho rëb: “Grieelod së naa, sac niina wriin ptsieelnia naa, bzhiguiel gudz lo me gacd guial naa.”

²¹ 'Bdzin ngundziin co bzodiidz zho lo me zha rzë xtiidz grë zha co. Zeene bin mew, wbinladz guic me, bnabey me zho güey zho dib lad guiedz güeyxi zho grë zha ne guiend pe yquuin, grë zha ne guiend nia, zha ne guiend ni, zha ne rold lo, grëse zho bdzinnie zho ga.

²² Blozh ga, rëbchaa zho lo me: “Laa naa wbirele xmandad luu gon, per scase noraa zaatne cue miech.”

²³ Dzigo pxeel me zho stib, rëb me: “Güey dib ro guiedz, zha ne gdzieeltaa luu, dënie zho nëz rii, bloo guic zho guiaad zho; ib none tsodzëse miech lidz naa.

²⁴ Sac grë zha ne bredz naa glo ga, ni lalnu racladzdraa naa yгаа zho guielwagw rii.”

*Zha ne racladz sëeb xnëz Jesús
(Mt. 10:37-38)*

²⁵ Laa Jesús no nëz zie me nëz Jerusalén, miech guizhiu ne nal zhits me. Tibaque ptsire lo me bui me lo grë miech co, rëb me lo zho:

²⁶ —Lo grë to ne ziaadnal to zhits naa, gacnan to ganle zha ne racladz ygab xnëz naa, ib none gleynie zho mine rnabey naa. Sac zha ne mazdraa rleynie pxoz, mazdraa rleynie xniala, mazdragaa rleynie zho tsieel zho, xpëed zho, bets zho, bzian-gaa zho, xquielmban zhow, rquia zdoo zhow, peet xtsiind grë zha co par sëeb zho xnëz naa.

²⁷ Sac ni tib zha ne sca yquia zdoo cueeladz zho zho guiaadnal zho zhits naa, grieelod ygab zho lo naa.

²⁸ Antes ne yquiabladz to sëeb to xnëz naa, none wen wen sob to dien pe zlëb to ted to mine rieguial to. Zig nacse tib zha ne gzaa tib yu glaa ne gac chop

tson xcuaa, led rzobgazh zho rbee zho cuent dien pe zgaa xtimi zho tsaalow.

²⁹ Sac gon nenda loxaque cueeze zhow, ni lozh ga grieelod gzaalo zhow. Miech ne gaṅa laa zho gzhidznie zho,

³⁰ guiab zho: “Golwi lo zha qui ganle, loxaque bleeze zho lidz zho, na blëbd zho nzaalo zhow.”

³¹ Scaque rey ne no tilnie stib rey, led none sobgazh zho gaṅ zho dien pe zlëëb tsii mil xmenguiib zho tsietilnie gal mil xmenguiib stib rey co.

³² Telne rgobey me lëbd me, laga bii zit ziaad stib rey co, rxeeḷ me bla zha ne tsie tsienee dien zha gataa cuëz lo xtil zho.

³³ 'Scaque to nagon none glo gwi to pe nac grë ncuaaṅe no csaan to, parne grieelo ygab to xnëz naa.

³⁴ Sac gon zed ne nzhid, ḷpa dien yquiina?

³⁵ Per ni par gaca beeb peet xtsiinda; miṅe rac-taaw, laaw rziaab. Zha ne no liaadz guieṅ zho pe rnee naa, yquiaadiag zhow.

15

Zha rzac Dios zha ne zozit lo me (Mt. 18:10-14)

¹ Zeṅe rseed Jesús miech, nzian grë zha ne rtop dimi ne razh lo zha Roma, ni grë zha ne rzoob miech nac zha yozh, ye zho rbig zho rquiaadiag zho zhiwseed me.

² Nacne grë zha farisé ni grë maistr ley, rneenë zho me, rnee zho lëda ga ruṅ me sca rtsieelsa me grë zha co, rownie me zho.

³ Dzigo bnee me lo zho, rëb me:

4 —Togase nadien, gzoob ne quianie to tib gayoo mēcwxiił, ni lega naclew rziaab tib ma, ¿zha dien ruṅ to? Led rsaṅ to ma ne ndxie lo to ga lēē, laa to rie rieguib to ma ne bziaab ga, haxta rdziel to ma.

5 Zeene rdziel ma lo to, lo guiełbley co haxta rxobyāṅ to ma rdziṅnie to ma ro yu.

6 Lēēlēd rzodiidz tow lo zha ne ndzieeldiidz to, lo zha ne no gax lidz to, sac rley to laa xpēcwxiił to brieequia.

7 Gni naa lo to gaṅle, scadaa nagoṅ rzac Dios, tib guiełbley nrooba lo me, zeene raṅ me laa tib zha ngoopdoł rsaan xquiełntseeb, laa zho rbig lo me. Ne nligaa tib guiełbley rac zha co lo me, lēdle zha ne rzac miech wenle nac zho lo me.

8 "Zig rzacгаа tib meṅ wnaa, gzoob ne nzheṅ me tsii gayoo pes, ni lega naclew rsēēb me tib gayoow, ¿zha dien ruṅ me? Led hor cogazh lēē rquiaa me biini, rsilo me dzega dzega rloob me leṅ lidz me haxta rdziel me dimi co.

9 Zeene rdziel mew, rley me rzodiidz mew lo grē zha ne ndzieeldiidz me, lo grē zha ne no gax lidz me.

10 Zig rne naa ga, scadaa nagoṅ rzac grē xanjl Dios, tib guiełbley nrooba lo zho zeene raṅ zho laa tib zha ngoopdoł rsaan xquiełntseeb, laa zho rbig lo Dios.

11 Dzigo psilo Jesús bzodiidz me tib cuent lo zho, rēb me:

—Tib meṅ name quianie me chop mēēdbgui.

12 Tib dze, rēb zha ne nac zha niab lo me: "Papá, teł pe nac ncuaaṅe no gneedz luu lo no, bzhiguieł niinaga beengrołā, zeena gneedz luu miṅe raguiał naa." Dzigo beengroł me ncuaaṅe rap me, bdeed mew lo zho.

13 'Zhisaque goca, pto zha niab co grëse ncuaane bial zho, brieë zho laa zho zie. Bdzin zho stib dan, ga been zho grë guielyozh ne gocladztaa zho, grëse xtimi zho pxin zho ga.

14 Tibaque zeene laa xtimi zho blozh, mbanse rac zho guiendraa pe gow zho, ni lëëtaque len dze co laa tib gbin psiloque nëz co.

15 Dzigo race zho güeyguib zho dziin lad guiedz co, ga brieëquia tib men co bree zho, pxeel me zho yquiaanap zho nguts.

16 Lo gbin ne noded zho ga, rzac zho tebaa cho gdeed maase grë duuzhye dan ne row grë nguts co gow zho, per ni min co choot rdeete lo zho.

17 'Sca no zho ga, tibaque zeene bial zho biini psoladz zho nzian zha ne quia dziin lo pxoz zho, grë ncuaane raclo row grë zha co, haxta riaana, ni laa zho sca noded ga; rëbcha zho:

18 "Mazd mine naca laa naa guia gdziin naa lo pxoz naa stib, guiep naa lo me gon me naa perdon grëtaa falt ne ben naa lo me, falt ne bengaa naa lo Dios.

19 Maase sacdraa me naa zig xpëed me, siguiel me ycaania me naa gac naa zig tib zha ne quiase dziin lo me."

20 Horco bio zho nëz laa zho zey nëz lidz pxoz zho. Zitaa ziaad zho laa me gonle zho, pquia zdo me zho gon me zha rac zho; rias me güeydzieelo me zho bnaaz me nia zho, bdeedz me zho.

21 "'Papá", rëb zho lo me, "rien naa nroob falt ne ben naa lo Dios, bengaa naa lo luu. Rieguialdraa sac luu naa zig tib xpëed luu."

22 'Ni blëzd me nlozh nee zho, lëëlëd bredz me zha ne quia xtsiin me, rëb me: "¡Na goltënie tib nëz

lar wen nu gacw xpëed naa! ¡Gol̄tënie tib nil wen tso nia me, tib nëz guiel̄guid cub yquia ni me!”

²³ Bnabey me zho güeyxi zho tib ngon ne mazdraa ndaan, beet zho, rëb me: “¡Ib none gac tib lni, none dioow ne, none dio ne!

²⁴ ¡Sac gon̄ gun̄ naa cuent, brieëban xpëed rii naa! ¡Bnitle me ga, na laa me bdziel!” ¡Laa lni psilo!

²⁵ ¡Lni co noyac, zeene laa stib xpëed me zha ne nac zha gol ga, wbire lo dziin dan. Bdziñ zho gax ro yu, rlu rquia di, haxta wiee rlu noyac;

²⁶ dzigo bredz zho tib zha ne quia dziin lo pxoz zho ga, bnabdiidz zho dieñ pe lni ne noyac.

²⁷ Dzigo rëbchaa zha co: “Bets luu blanso, gane squitaa bnabey pxoz luu noyac lni; rley me gon̄ me mban zho laa zho blanso. Bnabey me gut tib ngon ne mazdraa ndaan.”

²⁸ Blëë zha gol co bin zhow, lo guiel̄blëë co bzëëbd zho ro yu. Nacne brieë pxoz zho, bnee me lo zho sëëb zho ro yu.

²⁹ Dzigo rëbchaa zho lo me: “¡Lëdraaw i gon̄ papá noyū luu! Bui gan̄le blactaa iz ne quiayū naa dziin lo luu, wlaltaa gard quits naa tib xtiidz luu. Ni zha rna tib dze, siquier tib chiv yeen̄ ygad luu lo naa, gownie naa grë zha ne ndzieeldiiz naa.

³⁰ Cho dzigo nac zha qui, blozhse güelyozh zho xtimi luu lo grëtaa guiel̄yozh ne been̄ zho, na no luu beet luu ngon ne mazdraa ndaan, noyū luu zhilni zho.”

³¹ Dzigo rëbchaa me lo zho: “Nliw xin, ni lalnu gard csaan luu naa, gacxe waa grëtaa ncuaane quianie naa, luu guiaan̄niew.

³² Per niina ne laa bets luu blanso, ib nonguiel̄a znu dziuūñ ne tib lni gleynie ne me; sac gon̄ bnit

me, ni na laa me bdziel. ¡Dziuuñ ne cuent brieeban me nu!”

16

Ligier miech par lo guielntseeb

¹ Tib vuelt bzodiidz Jesús tib cuent lo xpëedscuel me, rëb me:

—Tib men name nroob rapchen me, quianie me tib zha ne zo lo grëtaa ncuaane rap me; tib dzew, lega nacle bded diag me zhliaan noxin zha co xtimi me.

² Dzigo bredz me zho, rëb me lo zho: “Lëda i gon squi run luu, lega noxin luu xtimi naa. Niinaga racladz naa guiaadnie luu cuent nu dien zha quiayun luu dziin; sac grieelodraa so luu lo grëncuaane rap naa.”

³ Wbire zho ga, rëb zho: “Zha na ganle gon naa, telne guiab ne ga naa dziin dan, lëbdraa naa gon naa dziin co; tel guiaabгаа ne na ga naa gatop naa gon, rtoladz naa gnab naa gon lo miech.”

⁴ Tibaque zeene biab guic zho rëb zho: “¡Laa naa bienle zha gon naa, zeena tso zha ne gon xyudar naa zeene laa naa grie lo xtsiin men rii!”

⁵ Dzigo psilo zho bredz zho zha ne quia guielqui lo men ne quia zho xtsiin ga. Bdzin tib zha co bnaabdiidz zho lo zho dien palal nzëeb zho lo me.

⁶ Rëb zha co: “Tib gayoo tamb nceit nac mine nzëeb naa lo me.” Dzigo rëbchaа zho: “Nliw, lalga quia lo tib val ne psan luu nu. Ledaa val co nu, zac ctsieez luuw; bzhixcuaа stiba, pquiaа lo co, grol tamba zëeb luu.”

⁷ Bdziñaque stib zha co, bnaabdiidz zho lo zho dien palal nac xquielqui zho lo men co. Zha co rëb

zëëb zho tib gayoo sac zhobxtil. Dzigo rëbchaa zho: “Nliw, lalga raquiet lo val ne psan luu; per na zac ctsieez luu min rii, bzhixcuaa stiba, pquiaa lo co tapgalaque saca zëëb luu.”

⁸ Zeene bien men co zha noyun zho, bzee zdo me gon me scataa ndzielguic zho. Ncuane nto-ladza, per grese miech ne ziana ncuana lo guid-zliu rii, ndzielguic zho par gon zho gre guelntseeb. Par min co ndziibraa ndzielguic zho lo zha ne no xnëz Dios.

⁹ Sangué to gzoobladzde to gon to min co, ncuane rap to lo guidzliu rii, golquiina per par gon to xyudar samiech to. Zeene laa ncuana co gre, nenda zacnie zho to, per mine mazdraa non Diossi ible zacnie me to, zneedz me tib lugar ndzon cuëz to, led yedraa ga pe nitlo.

¹⁰ Zha ne ndzinli rundziin tel palal yeense ncuane riaanne zho, scaque ndzinli gundziin zhow zeene guiaanne zho nrooba. Laa zha ne ndzinlid, mine gon zho zeene guiaanne zho ncuana zhis, mincoque gon zho zeene guiaanne zho ncuane nroob.

¹¹ Nana zha ne sca gacd ne ndzinlise gundziin zho ncuane no lo guidzliu rii, z zha dzigo grieelo gundziin zho ncuana ndzon ne gdeed Dios lo zho zaatne no me?

¹² Stiba, tel sca ndzinlide to lo chen ben, zpe nac zhe ncuane gon to tib ncuane chenpaa to?

¹³ Golgona ganle, grieelod gon gleynie to dimi ni gleynieque Dios. Ib none telne Dios rleynie to, me none gleynie to, togo dimigaaw, dimi golleynie.

¹⁴ Gre zha ne nac farisé zeene gon zho sca rnee me, lel rzhidznie zho me, sac tel zhaw rleyniedox

zho dimi.

¹⁵ Dzigo rëbchaa me lo zho:

—Masaque rzac to nalëë nli miech wen nac to nëz lo Dios, saṅgue me goṅ, wen wen naṅ me zha nac zdoo to. Nli miech ne raṅ to, zha wen rzoob zho to; saṅgue Dios ni lalnu rzacd zdoo me miṅe ruṅ to.

¹⁶ 'Leṅ dze ne gard guiaad Juan Bautist, niapse xley Moisés ni grë miṅe bnee zha ne biadteed xtiidz Dios, miṅ co nac miṅe güeynaḷ to. Per zeṅe psilo Juan pseed me miech, desde hor co laa miech quiayacnaṅ stib mod ne grieelo ygaa zho zaatne rnabey Dios; gane na nzian zha ne noxco ygaa lugar co.

¹⁷ Per guiabde to togo nondraa ley, sac grëse miṅe zhobnee lo ley, jib laaw none gac! ;Zig nac guidzliu, zig nac gbaa zrieelo nitlow, saṅgue ley nitloda, tibaque naca!

¹⁸ Gacxe waa, grë zha bgui ne rsëbtsieel niina ni rtsieelnia zho stib wnaa, zha ne rtsieelniagaa tib wnaa ne psëëbtsieel, doḷ ga quiayunṅ zho; zigtaa doḷa padzeela, scaque niina doḷa.

Xcuent tib zha prob lë Lazz

¹⁹ 'Tib ricw name —rëb Jesús—, niapse grë lar niazh racw me, gzobse dze ruṅ me lni lidz me.

²⁰ Zaatne noque me ga, guiedz co no tib zha prob lë Lazz, lala prob me ni rlanaque me guiedz, gdipse lad me noyacnë guiedz co. Riese me riesob me ro lidz zha ricw co,

²¹ rquiambëz me dieṅ pe grieelod gow me maase ncuane rrieengaale lo xmezḥ meṅ co; ga zob me haxta rdziṅ grë mëcw rzëëludz ma lo guiedz ne rlan me ga.

22 Bdzin dzew laa Lazh gut, dzigo biet xanj̄l Dios beynie zho me lo Abraham, zaatne rdzin gr̄e zha wen. Goc palal dzew, laa meñ ricw co gutaque, blozhse pquianap zho me, laa zho güeyqueets me;

23 zeeñe biala me biini laa me nole gabil̄. Lëbdraa me no me lo guielnë co, lega naclew blis lo me, zit squi gon me Abraham, laa Lazh zobnie Abraham ga.

24 Horco bñab me lo Abraham siguiel̄ Abraham cxeel̄ me Lazh, maase guic mzhugniase Lazh yquiaa Lazh nis tsiegadz Lazh lo ludz me; sac lëbdraa me lo guidox ne no me ga.

25 Dzigo rëbchaa Abraham lo me: “Xin, psoladz ganle zeeñe wban luu lo guidzliu, ncuane gocladztaa luu pquianie luuw; laa Lazh mbanse bded me. Nagaa na, me nac meñ ne nogaa noyan guielbley, laa luu bgaa squi no luu lo guielnë qui.

26 Stiba, zha ne no nëz rii gacd guiaad zho i, niicle zha ne nogaa iw, gacd guiaad zho nëz rii; sac no tib yeedox ne rtse.”

27 “Bzhiguiel̄ sca”, rëb meñ ricw co, “pxeel̄ Lazh tsie me lidz pxoz naa,

28 tsienie me diidz lo zgaay bets naa zha ne bialan, guiab me lo zho ib gund zho minë beñ naa, zeeña guiaate zho nu yгаа zho lo guielnëdox rii.”

29 Pquiabchaa Abraham, rëb Abraham: “Tel̄ mincow, tsow glab zho lo gr̄e ley ne psan̄ Moisés, lo gr̄e minë bnee gr̄e zha ne güeyteed xtiidz Dios, beñque lo co zhobnee zha no gban zho.”

30 “Nliw”, rëb me, “per tel̄ squi tib meñ ne gutle tsie tsienee lo zho, rien̄ naa znuse csaan zho xquiel̄ntseeb zho gbig zho lo Dios.”

31 Dzigo rëbchaa Abraham: “Tel̄ne rond zho minë

rnabey grë ley ne psan Moisés, grë mine bnee zha ne güeyteed xtiidz Dios, scaque gond zho diidz niicle tsie tib zha ne brieabanle tsienee lo zho.”

17

Zha ne gunctal xtol stib zho

(Mt. 18:6-7, 21-22; Mr. 9:42)

¹ Tib vuelt rëb Jesús lo xpëëdsuel me:

—Nac lo guidzliu rii, ib gunfalte ncuane rgogui miech gunctal zho xtol zho, iper probsaxe zha ne rquuil samiech runctal zho xtol zho!

² Mazd zhi guielnëw lo zho ygadoo tib quie molin zhobxtil yan zho tsieron zho zho nisdoo, lëdle guielnëdox ne gan zho; sac gon dol nroob ga gun zho yquuil zho zha ndooladz ne no xnëz naa.

³ ¡Golguien sca ndzinli golgac! Tib bets tow, zeene pe tib falt gun zho lo to, golnee lo zho gundraa zhow; telne gnab zho perdon, golgun zho perdon.

⁴ Niicle telne nzian vuelt sca gun zho falt lo luu tib dze, been zho perdon zeene laa zho rbig rnab zho perdon lo luu.

⁵ Stib dzew, rëb zha ne rzënie me lo me:

—Bneedz guielbiini lo no dib zdooraa no gnalo no Dios.

⁶ Pquiab me rëb me:

—Tel niaca mine gzoob ne rnalole to Dios siquier lal tib midz moxtaz, niicle ncuane mazdraa ngan gnab to lo me, zun mew.

⁷ ¿Pe ran to ganle, zha nac zha ne run xtsiin ben? Zeene rbire zho dan, yase güey zho gon, güeygaa zho güeyquianap zho ma, pe liaadz men ne quia zho xtsiin ga, guiab me lo zho: “Na bded, bzob, zeena gowxtsee luu.”

⁸ Mine run me, gloque rnabey me zho gunlo zho ncuaane gowxtsee me, gdziib zhow lo me; rlozhaa row me, dzigora rowxtsee zho.

⁹ Niicle scataa ron zho mine rnabey me, ni rlozh ga, per ni xquizh rdeete me lo zho.

¹⁰ Scaque to nagon, zeene lozh gun to gre dziin ne pso Dios to gun to, peet yquiambезде to, golguien tib ngundziinse nac to, mine rieguial to ga, min co been to.

Biac tsii zha ne rlan guiedz lepr

¹¹ Laa Jesús no nēz zie me nēz Jerusalén. Laa me zieded tib guiedz win ne riaan zaatne ndzieel xtan Samar xtan zha Galilé,

¹² zeene briequia tsii zha ne rlan guiedz lepr. Zit zo zho,

¹³ nguiedz rbedz zho me, rnab zho lo me yquia zdo me zho.

¹⁴ Zeene gon me zho, rēbcha me lo zho:

—¡Goltsie, goltsielulo lo pxoz, zeena gan zho ganle laa to biacle!

Dzigo laa zho zie. Nēz no zho laa zho biaanmbe lo guiedz co.

¹⁵⁻¹⁶ Lo gza zho, hor co rias tib zho wbire, nguiedz rnee zho:

—¡Zha ndzontaa Dios! ¡Golwi ganle laa me beenguiacle naa!

Zigne bdzin zho lo Jesús, pquitsgzhib zho lo me, haxta bdzin lo zho lo liu, rdeed zho xquizh lo me. Tib zha Samara, zha zit nac zho.

¹⁷ Dzigo rēbcha Jesús:

—¿Yoraazhe gre zha co waa? Conque tsii zho name beenguiac naa.

18 ¿Tibaque zha zit rii dzigo lëe rzac zdoo minë been Dios lo zho?

19 Dzigo bliso me zha co ga, rëb me lo zho:

—Porne dib zdoo luu gon bnaloo luu Dios, gane biac luu. Bzë, peet tsieniedraa guic luu.

*Zeeṇe gbiire guiaad Mgui ne pxeel Dios
(Mt. 24:23-28, 36-41)*

20 Tib dze bnabdiidz zha farisé lo Jesús, rëb zho:

—¿Poc dzigo csilo gnabey Dios lo ne?

Dzigo pquiab me rëb me lo zho:

—Gacnaṇ to ganle, nacd min co ncuane ganlopaa miech.

21 Grieelod guiab zho laaw psilo nec, laaw psilolegaa nëz rii; sac gon tel niina laa me quian-abeyle nu.

22 Bded ga, rëbchaa me lo xpëëdscuel me:

—Zdziṇ dze, gacladz to tebaa zha znu so naa lo to maase tibaque dze, per gacdraaw.

23 Leṇ dze co, zio zha ne gnë lo to: “Goltë ganle laa Mgui ne pxeel Dios bdziṇ nu”; gnëgaa zho pa stib lugar none tsie to par gan to naa; tsienalde to, gliladzde to xtiidz zho.

24 Sac zeeṇe gbiire guial naa, grëse miech gaṇa. Zig nac tel guiab tib belye nroob ne glu zhan gbaa desde nëz ne rlan ngbidz haxta nëz ne rzëëb ngbidz, ¿niacxe gand grëse miecha?

25 Per ansraa ne gac min co, ible nroob guielnë ne cteed miech rii naa, ni lalnu gandzed zho naa.

26-27 Leṇ dze ne guial naa ga, grë miech ne ndxie lo guidzliu gal hor co, zhaa grë ncuane tsonie guic zho. Rsoladz to ganle zha rac miech leṇ dze ne biaad Noé, lel lo grë zhilni zho no zho, zha ne

notsieelnia, zha ne nobediin xpëed, tibaque zeene biao zho biini laa guiedox co psilole. Laa Noé nole len barcw, laa zho biaan grëse zho bnitlo lo nis co. Scadaa nagon no miech len dze ne guial naa.

²⁸ Zig racгаа miech Sodom len dze ne brie Lot ga. Scaque, loxaque ncuaan lo guidzliu rii noxco zho, zha ne no lo zhilni, zha ne no zhiwto, zha ne nozigaa, zha ne quia gon, zha ne quiazhixcuaagaa lidz.

²⁹ Lega naclew, zeene laa Lot brie, hor co laa tib guidox biet gbaa, notsa zufr bliaala lad guiedz co, grëse miech co bnitlo lo guidox co.

³⁰ Scapaa nagon rac miech ne ndxie lo guidzliu len dze ne laa naa guial.

³¹ 'Zha ne lëetaque hor co no glaa guic yu, ib guiabd zho sëeb zho len yu tsiebee zho ncuaane no len lidz zho, zha ne quiagaa lo dziin dana, ib guiabd zho gbi zho guey zho ro yu.

³² ¡Golsoladz ganle zha bzhaac wnaa ne goc tsieel Lot!

³³ Grëse miech, zha ne sca rquianë zdo grë ncuaane rap zho, ible znitlo zho xquielmban zho; sangue zha ne rquiad zdo grë ncuaan co, haxta xquielmban zho rbeeladz zhow, nitlod zho.

³⁴ Gal hor co, zaatne tipse nixgues chop zho, tib zho sēnal zhits naa, laa stib zho guiaan.

³⁵⁻³⁶ Zaatne tipse quia yot chop wnaa, zaatne tipsegaa quia chop mgui lo dziin dana, tib zho sēnal zhits naa, laa stib zho guiaan.

³⁷ Dzigo rēbcha xpēedscuel me lo me:

—¿Pa lo dzigo gdzi grē zha co?

Pquiab me rēb me:

—Horco bii zlu ganle paw. Zig nac grë pech, zaatne nix magut ga rdziñ ma.

18

Zha ne rñab lo Dios

¹⁻² Stib dzew, bzodiidz Jesús tib cuent lo xpëëdsuel me, par guien zho ib guiaand zdo zho zeene racniobd mine quianab zho lo Dios, rëb me:

—Tib guiedz name, no tib men co nac me wxtis, ni palal rquiad zdo me samiech me, per ni Dios rdziebd me.

³ Guiedz coque no tib zhuz viud, gzobse dze rie zhuz co rienab zhuz gun me guielwxtis, cuedz me tib zha co rlëë lo zhuz.

⁴⁻⁵ Glo ib rquiaadiagd me mine rñab zhuz co, per zeene goc palal dze gon me tibaque quia men co quianab me gac guielwxtis, dzigotaa rëb me: “Ncuaane lëbdraa guic naa lo men rii, tibaque squi quia me. Nli rdziebd naa Dios, niicle nodgaa naa liaadz pe rzac miech, per parne guiadgunneetraa me naa, mine naca mazd laa naa gun guielwxtis ne rñab me.”

⁶ Blozhse bzodiidz Jesús cuent co, rëbcha me lo zho:

—Telne sca bdziñ dze ne pquiaadiag zha ntseeb co mine bñab wnaa viud co,

⁷ ¿pe lel Dios dzigo yquiaadiagd xtiidz zha ne ngab lo me, tel tibaque gnab zho mine racladz zho?

⁸ ¡Nligaa, ib tedsod zun me mine rñab zho! Per segur zhis zho quiambëz gac xquielwxtis me, zeene laa naa guial stib.

⁹ Laa grë zha ne riats, zha ne rzac masaque zha wen nac zho nëz lo Dios, haxta rbix zdoo zho ran zho grëraa miech, bnee Jesús lo zho, rëb me:

¹⁰ —Chop zha name, bdziñ zho len yadoo ziezodiidznie zho Dios. Tib zho nac zha farisé, stib zho nac zha ne rtop dimi ne razh lo rey Roma.

¹¹ Zha ne nac farisé ga, psilo zho rnee zho: “Dios, rnedz naa xquizh lo luu, sac nacd naa zigne nac grë miech ngoopdol, zig nacse zha ne zo i. Wlaltaa runḁ naa guielgbaan, runḁ naa guielntseeb, niicle rquiangoobd naa stib wnaa.

¹² Haxta chop vuelt rcuan naa tib len zhmal, grëse ncuaaḁe runḁ naa gan, runḁ naaw tsii lal, rnedz naa tib lal miḁe rieguial luu.”

¹³ Laa zha ne rtop dimi ne razh Roma ga, gaxaque ga zo zho, per nquiitsrunḁe zho liu. Mban rac zho, quiase nia zho zdoo zho, rnee zho lo Dios: “¡Dios, rnab naa lo luu pquia zdoo naa znutaa miech ngoopdol nac naa!”

¹⁴ Gneli naa lo to ganle —rëb Jesús—, mazdraa goḁ wen biaanḁ recaudador co lo Dios, lëdle zha farisé co. Sac zha ne lëëque zha runḁnon zho, racnond zho lo Dios, laa zha ne riaanḁwin, runḁnon me zho.

Beenlay Jesús mëëdlas

(Mt. 19:13-15; Mr. 10:13-16)

¹⁵ Tib dze, nzian meḁ ne bdziñ lo Jesús, bdziḁnie zho xpëëdlas zho lo me, parne cxobnia me guic win gunḁlay me win. Grë zha ne nac xpëëdscuel me, lel psilo zho ndox zho lo grë zha ne bdziḁnie grë mëëdlas co.

¹⁶ Zeëḁe goḁ me sca quiayunḁ zho, dzigo bredz me zho, rëb me lo zho:

—¡Ctsirede to grë mēēdlas yeen qui! ¡Golsaan guiaad win lo naa! Sac gon grë mēēdlas yeen qui, ni zha ne nac zig nac win, zha co nac zha ne sēēb ygab lo Dios.

¹⁷ Nligaa zha ne gacndooladzd, zha ne gliladzd dib zdoo, zigne run grë mēēdlas, grielod gdzin zho zaatne rnabey Dios.

Ncuaane run dimi
(Mt. 19:16-30; Mr. 10:17-31)

¹⁸ Tib vuelt, wbig tib men ne nac zha non lo menquiedz Israel, rēb me lo Jesús:

—Nan naa luu nac tib men ne noseed miech, ni tib men wen nac luu, ḡbnē lo naa dien, pe nac mine gun naa parne grielo ygaa naa guielmban ndzon ne gdziṇd dze lozh?

¹⁹ Pquiab Jesús rēb me:

—Rnee luu lēē tib miech wen nac naa. ¡Nligaaw, Diosse gon nac men wen!

²⁰ Telne nli racladz luu ygaa luu guielmban co, none tsoxco luu gban luu zigne nac Xley Dios. Nanle luu ganle zha naca, rneew:

Tsonied luu zha ne led tsieeld luu,
gute luu samiech luu,

cuand luu samiech luu,

yquiadiidzguizhd luu samiech luu.

Gon pxoz luu, gon xniaa luu, cued luu xquielto me.

²¹ Dzigo rēbchaa men co:

—Maestro, grēse mine bzeet luu i, ni tiba gard quits naa wlal ne nac naa zha nguieg.

²² Horco rēb Jesús lo me:

—Stibaque mine rquiin gun luu. Güey, güeyto grēse ncuaane quianie luu, dzigo bdiiz dimi co lo

grë zha mban ne guiend pe yquiin; sca nroobraa guielnzaac ne ygaa luu gbaa. Lozh ga, dë, dënal zhits naa.

²³ Zeene bin men co sca rëb Jesús, mbanse rac me laa me zey; sac nroob ncuaane quianie me.

²⁴ Dzigo rëbchaa Jesús lo xpëedscuel me:

—iZha ngantaalëë, rzac zha ne squi rapchen sëëb zho xnëz Dios gnabey me zho!

²⁵ Mazd ngandse rded tib camell guieer guzh.

²⁶ Grë zha ne ndxie ga, zeene bin zho sca rëb me, rneechaa zho:

—Telne scataa ngan sëëb miech xnëz Dios, ¿chosezhe dzigo waa nac zha ne zrieelo sëëb xnëz me?

²⁷ Dzigo rëbchaa Jesús:

—Nligaa par miech, zootle tsod zha ne grieelo sëëb xnëz me; sangue me nan me no zho. Sac tel me, tsod ncuaane grieelod gun me.

²⁸ Horco pquiab Pedr, rëb Pedr lo me:

—Tel no, grë ncuaane rdziaapse no psan now, laa no ziaadnal zhits luu.

²⁹ Pquiab me rëb me:

—Golgacnaana ganle, grëse zha ne psan lidz, psan zho tsieel zho, psan zho xpëed zho, psan zho pxoz zho, psan zho xniaa zho, psan zho bets zho, bziangaa zho, porne bzëëb zho xnëz Dios,

³⁰ na lo guielmban riique, mazdraa nroob mine gan zho, ni lozh ga ib tedsod zgaa zho guielmban ndzon ne gdziindraa dze lozh.

*Bzeet Jesús stib zha csacsi miech me
(Mt. 20:17-19; Mr. 10:32-34)*

³¹ Ne sca no Jesús nêz zie me nêz Jerusalén, tibaque bredz me gza tsiipchop zha ne rzëniepaa me ga, bzeet me lo zho zha guñ miech me, rëb me:

—Grëse mine bzeetle zha ne biadteed xtiidz Dios padzeela teed naa, niina ne laa ne gdziñ Jerusalén, laaw gac cumplir.

³² Ga gnaaz zho naa, tsielo zho naa ladznia grë zha ne nacdraa zha Israel, xidznie zho naa, squiaago zho naa, stsuc zho lo naa,

³³ zguiñ zho naa, ni haxta zut zho naa. Per zeene gac tson ngbidza, zriebaanaa.

³⁴ Per ib bienñ zho dieñ zha nacne sca rnee me.

*Biac tib zha ne rold lo
(Mt. 20:29-34; Mr. 10:46-52)*

³⁵ Laa Jesús bzëeb ro guiedz Jericó, miech guizhiu ne nañ zhits me. Ro nêz co zob tib meñ ne rold lo, rnab me gon.

³⁶ Zeene bien me rlu nzian miech noded ga, dzigo bnabdiidz me dieñ pe nacne scataa ziaad grë miech co ga.

³⁷ Dzigo rëb zho lo me, Jesús, meñ Nazaret ziaad ga, zhits me ziaadnañ grë miech co.

³⁸ Horco psilo me nguiedz rbedz me, rnee me:
—¡Jesús, meñ xtii rey David, pquia zdoo naa!

³⁹ Grë zha ne ner, psilo zho ndox zho lo me parne guioog ro me, per leñ hor cole nguiezdraa rbedz me Jesús, rnab me yquia zdoo Jesús me.

⁴⁰ Nacne zeene bdziñ Jesús gax zaatne zob me, blëz Jesús, bnabey Jesús güeyxi zho me. Bdziñ me lo Jesús, rëbchaa Jesús lo me:

⁴¹ —¿Pe nadien guñ luu naa?

Pquiab me rëb me:

—¡Racladz naa guiac lo naa!

42 Dzigo rëbchaa Jesús:

—iNiinagazh gon laa luu gan stib! Laa luu biac, sacne dib zdoo luu bnalo luu naa.

43 Horcogazh laa men co psilo bui, ine rley me roolnie me Dios, laa me zienal zhits Jesús. Haxta gre miech ne zienal ga, zeene gon zhow, ye zho roolnie zho Dios.

19

Güey Jesús lidz tib men læ Zaquew

1-2 Guiedz Jericó, ga no tib men ne rnabey lo gre zha ne rtop dimi ne razh lo rey Roma, læ me Zaquew. Zeene laa Jesús zieded lad guiedz co,

3 brie me, ziewi me, sac racladz me gunbey me Jesús. Bdzin me, pasëse me gan me Jesús, sac lala miech guizhiu ne nal zhits Jesús, ni lala ndopse me.

4 Mine been me, rias me bdedner me güeytsep me tib lo yag guigw zob ro nëz co, par gdeeda diidza gan me Jesús, zeene laa Jesús ted ga.

5 Zeene laa Jesús bded ga, blis lo Jesús gon Jesús laa me zob ga, dzigo bredz Jesús me, rëb Jesús lo me:

—Zaquew, na zeena biet i. Sac racladz naa, lidz luu cuëz naa nadze.

6 Rley Zaquew gon Zaquew sca rëb Jesús, læëläd biet me lo yag co, laa me zienie Jesús nëz lidz me.

7 Zeene gon gre miech cow, rlëë zho, rnee zho:

—iPe læëtaa lidz zha ngoopdol qui ziebëz me!

8 Laa Zaquew, ine rley zobnie Jesús. Tibaque bzoli Zaquew, rëb Zaquew:

—Gacnan luu gon, lo gre ncuaane rap naa, laa naa gded grola ygaaz lo gre zha ne guiënd

pe yquiin, ni tel nogaa zha ne ndziibraa mine beenquizh naa zho, naa maase ctsiree naa tap lal mine blan naa zho ga.

⁹ Horco pquiab Jesús, rëb me lo zha ne ndxie ga:

—I nagon rlu laa men qui wbigle lo Dios, parne ycaania Dios me. Nli zha xtii Abraham nac me, per bzonziaab me

¹⁰ ni naa ne nac naa Mgui ne pxeel Dios, ible laa naa zial zialsilaa naa grë zha ne zonziaab.

Zha ne biaan̄nie dimi

¹¹ Grë miech ne zienal zhits Jesús ga, rzac zho zigne laa me gdziñ Jerusalén, laa me sob gac me zhirey zho; nacle bzodiidz me tib cuent rii, rëb me lo zho:

¹² —Tib xpëed zha non name, no me tib guiedz win, nacle diidza laa me no tsie zaatne zob men nroob ne rnabey, parne gzo zho me gac me rey guiedz ne no me ga.

¹³ Zeene laa dze co bdziñ, dzigo bredz me tsii zha ne quia xtsiin me, nroob dimi ne psan me lo zho tib tib zho, parne gundziin zhow, mientras gbire me.

¹⁴ 'Nzianlaa zha ladz me, rlëe zho ran zho me, dzigo pxeel zho bla zha ne güey lo men ne rnabey ne zie me ga, güey nab zho gdeete men co dziin co lo me.

¹⁵ Per niicle sca güey grë zha co, peet brieelod niun zho. Blozhse bzo rey co me, laa me bdziñ ladz me. Zeene bdziñ me, bredz me gza zha ne biaan̄nie xtimi me ga, par dieñ palal ziyaca.

¹⁶ Bdziñ tib zho, rëb zho: “Laa xtimi luu nu gon, tsii lal mine psan luu ga naca niina.”

17 Rley me rëb me lo zho: “¡Zha squi nagon racladz naa! ¡Wen brieequia xtsiin luu! Niicle zhis ncuaane psan naa lo luu, per bien luu niowse bendziin luuw. Na nagon, laa naa gzo luu, gnabey luu tsii guiedz.”

18 Bdzin stib zho, rëb zho: “Laa xtimi luu nu gon, gaay lal mine psan luu lo naa ga naca niina.”

19 Scaque rley me. Bzo me zho gnabey zho gaay guiedz.

20-21 Zeene bdziintaa tib zho, rëb zho: “Nli bendziind naa xtimi luu, sac nanle naa zha nac luu, niicle paraa niundziin naaw, grëse mine niuna gan lo luu niaana; gane mazd pquia naaw tib lë lo lar, blootsow naaw, ledaaw nu.”

22 Blëë guic me, rëb me lo zho: “¡Biche nu, paat rquiind naa miech yozh ne squi nac! Conque nanle luu zha nac naa,

23 ¿pex nac dzigo waa bioxcod luu maase mbe-diin luu dimi qui, ndziniaaw palal ncaania naaw niina?”

24 Dzigo rëbcha me lo grë zha ne ndxie ga: “Niinagazh golcob dimi qui nia zha qui, goldeeda lo zha ne ziaadnie tsii lala i.”

25 Pquiab zho rëb zho: “Per pe nacne zha coque ycaaniaw, ni nrooblew beenlo zho.”

26 “Ib sca no gaca”, rëb me, “sac zha ne rien zha gundziin zho ncuaane rcaania zho, nroobraa ncuaane ycaania zho. Laa zha ne squi nac, haxta mine pcaaniale zho, zdiooba lo zho.

27 Sangue zha ne sca ptsidil niac naa rey, goltsiexi zho, niinaga racladz naa ganlo naa gut to zho.”

Bdzin Jesús Jerusalén

(Mt. 21:1-17; Mr. 11:1-11, 15-19; Jn. 2:13-22;

12:12-19)

²⁸ Blozhse bzodiidz Jesús cuent co lo zho, laa zho bio nêz stib, nerse me lo zho.

²⁹ Zeene bdziñ zho gax Gui Oliv, zaatne ndxie guiedz Betfagé ni guiedz Betain, pxeel me chop xpëëdsuel me,

³⁰ rëb me lo zho:

—Goltsie guiedz win ne ndxie danse lo ne i. Ga gdziñ to zaatne quiadoo tib burr yeen ne choot gard sob lad, dzigo golxadz ma, golténie ma nu.

³¹ Tel cho gnabdiidz lo to pe nacne noxadz to ma, golguiab lo zho: men ne rnabey ne, men co rquiin ma.

³² Laa zho zie. Bdziñ zho, zaatne quiadoo burr co,

³³ nligaa, lëëtaque noxadz zho ma, zeene laa bizhuan ma bdziñ.

—¿Pe gun to xpurr naa? —rëb me lo zho—. ¿Pe nacne noxadz to ma?

³⁴ Dzigo rëbchaa zho:

—Men ne rnabey ne, men co rquiin ma.

³⁵ Bdzinnie zho ma lo Jesús, pxob zho lar ne rbix zho lad ma, bzob me ma.

³⁶ Zigse zie me, no grë miech guizhiu co rta zho xab zho ro nêz rded burr ne zob me ga.

³⁷ Grëse miech co, rleynie zho me. Laa zho xiuxto dze cho gui Oliv, zeene psilo zho nguiedz zëeb tsi zho, rley zho roolnie zho Dios, por grëtaa milagr ne ziyañ zho run Jesús;

³⁸ rnee zho:

—¡Nasi laa Dios pxeel zhirey ne! ¡Zha ndzontaa Dios! ¡Haxta gbaa noyac guiebley dze rii!

39 Blalaa zha farisé ne zienal ga, zeene gon zho zha roolnie grë miech co me, wbig zho lo me, rnab zho gnee me lo zho guioog ro zho.

40 Dzigo rëbchaa me:

—iZac guioog ro zho, per hor co dzigo laa grë quie rii csilo goolniew naa!

41 Zeene bdzin me zaatne nieenpaa Jerusalén, psilo biab guielnë me, biin me gon me guiedz co,

42 rëb me:

—iProb to men Jerusalén! iTebaa ye to nien niunbey to men ne needz guielbley rii lo to! Per na ib biende tow, masaque rzac to zig zha ne nioog lo.

43 Na nagon laa dze co bdedle. Grë zha ne rlëë lo to, ible ziaad zho ziadsioog corral zho to, ni tib nëz tedlaade to lo zho,

44 haxta guiab to ladznia zho, grë xpëed to. Znitlo zho ladz to, nëzrii nëzrec glaal zho grë quie ne niaa grë lidz to i; sac squi been to ib pcaaniade to Dios, zeene biaadpaa me nsilaa me to lo xtol to.

45 Bdzin me Jerusalén, güey me yadoo, psilo me blee me grëse zha ne noyun lgui ga, rëb me lo zho:

46 —Znu zhobnee lo Xtiedz Dios: “Zaatne nac lidz naa, ga none guiaad miech gzodiidznie zho naa.” Laa to gon, quiayun to lugar rii zig tib zhibliee ngbaan.

47 Bded ga, gzobse dze rie me rieseed me miech len yadoo ga. Nacne psilo grë pxoz ne rnabey, grë maistr ley, ni grë zha ne nac zha non lo menquiedz, quiaguib zho dien zha gdeeda diidz gut zho me.

48 Per rdziel zho dien zha gun zho, sac tibaque ndxie miech lo me, grëse zho rquiaadiag zho zhiwseed me.

20

Bnabdiidz zho cho nac Jesús
(Mt. 21:23-27; Mr. 11:27-33)

¹ Leṅ dze ne sca noseed me miech leṅ yadoo, nonee me lo zho zha nac Xtiidz Dios, tib vuelt bdziṅ bla zha ne nac pxoz ne rnabey, grē zho bla maistr ley ni zla meṅ ne nac meṅ non lo menḡuedz,

² rnabdiidz zho lo me dieṅ cho nac me, cho rnabey me, zha nacne sca quiayuṅ me.

³ Dzigo rēbchaa me lo zho:

—Ye naa laa naa guṅ tib wñabdiidz lo to.

⁴ Golnē dieṅ cho pxeel Juan zeene biadchoobnis Juan miech, ¿pe Dios pxeel Juan, te miechsew ye?

⁵ Psilo zho rnabdiidzlsa zho dieṅ zha ctsire zho lo xtiidz me, rnee zho:

—Telne dzieets ne Dios pxeel Juan, dzigo laa me gnē: “¿Pex nac dzigo waa bliladzde to miṅe bnee Juan?”

⁶ Tel na dzieetsgaa ne, miechse pxeel Juan, grieequiadaque ne; zgoquie menḡuedz ne, sac grēse zho rliladz Dios pxeel Juan.

⁷ Dzigo mazd lēē gdib miṅe been zho, rēb zho naṅd zho dieṅ cho pxeel Juan.

⁸ Nacne rēbchaa Jesús lo zho:

—Niicle naagaa nagon, grieelod gni naa lo to cho rnabey naa quiayuṅ naa grē miṅ rii.

Xcuent zha ne pquianap liu
(Mt. 21:33-46; 22:15-22; Mr. 12:1-17)

⁹ Blozhse ga, biire psilo me noseed me grē miech co. Bzodiidz me tib cuent rii lo zho, rēb me:

—Tib men name, nroob lbë uv beenbni me lo liun me. Blozh ga blediin me liu co lo bla zha ne ran liu, dzigo laa me brieë ga, zey me stib dan.

¹⁰ Zeene gol mëë ne laa nex co gol, pxeel me tib zha ne quia xtsiin me zie lo zha ne quianap liun me ga, parne gdeed zha co nex ne rieguial me ycaa me. Per lel bnaaz zho zha ne pxeel me ga, bdiin zho zho, blozh ga scase bzonëz zho zho.

¹¹ Wbiire pxeel me stib zho, scaque peet bdeete zho lo zho, lel ndox zho lo zho, bdiin zho zho.

¹² Pxeelaque me stib zho, goc zho tson, scasaque been zho, haxta psiwee zho zho.

¹³ Quianie me tib mëëd, rleynie me mëëd co. Zeene gon me sca been zha co, rëbcha me: “Miñe naca laa naa cxel xpëëd naa, zeene gan zho xpëëd naaw, peet gund zho me, nend zon zho xtiidz me.”

¹⁴ Pex guien zho cho nac xpëëd me, zeene gon zho men co, rëb zho: “iLëë zha qui nagon guiaannie liu rii! iGolgotsaa dziuut ne zho, zeena guiaana lo ne!”

¹⁵ Bnaaz zho xpëëd me, güeynie zho me zaatne nac tib lad lo liu co, ga güeygut zho me.

’iZha sca dien rzac to gun bizhuan liu co gza zha ntseeb co?

¹⁶ Ib tedsod lëë, zeene gbire me, znitlogazh me zho. Lozhse ga, cuediinga me liun me lo zla zha ne gundziina.

Zeene bin zho sca rëb me, rneechaa zho:

—iIb lic Dios qui, dziuunscad no!

¹⁷ Dze bui me lo zho, dzigo rëbcha me:

—Per led znu lëë, zhobnee lo Xtiidz Dios: “Quie ne psëëb zha ne nozaa yu, ni nannd zho lëëpaa quie co nac miñe rnazdziits yu.”

18 'Ni quie co gon, zha ne tsietsobe low, zac zho zig tib ncuaane rac tson tap lë; laa tel lëëgaaw tso be lad zho, zac zho zig tib ncuaane die die rac.

19 Grë zha ne nac pxoz ne rnabey, ni grë maistr ley, hor co bien zho miñe nac zho ga, bzeet me lo cuent co. ¡Gocladz zho gagazh naaz zho me! Per bdzieb zho, niacntseeb grë miech ne ndxie ga.

20 Dzigo miñe been zho, pxeel zho bla zha ne zie ziegungüet me par cxiñ me tib diidz, dzigo miñ co yquiaaqui zho tsiezo zho me lo zhiwxtis zha Roma. Rquiaalo zha co, no zho liaadz dieñ zha gzoobdiag zho xtiidz Dios,

21 bdziñ zho lo me, bnabdiidz zho rëb zho:

—Maestro, ndioñ no niapse diidzli ziena l luu, ni scagaa zeene rseed luu miech, rguibd luu guianñziuu luu lo zho, sinque niapse miñe nac diidzli, miñe rlu zha sëëb zho xnëz Dios, miñ co rnee luu lo zho.

22 Gane niina, racladz no gnë luu dieñ pe nonguiela ga rdeed no dimi ne razh lo rey Roma, te nonguielda ye.

23 Bienga me racladz zho gungüet zho me, dzigo rëbchaa me lo zho:

24 —¡Golneedz tib xpes to nu ganle!

Dzigo bdeed zho tib pes lo me. Blozh ga, rëbchaa me lo zho:

—¿Cho nu? ¿Cho lë nu quia lo pes rii?

Pquiab zho rëb zho:

—Lëë rey Roma i, lëë lë me i quia lo qui.

25 Dzigo rëb me lo zho:

—Miñe rieguial sca ycaa rey Roma, goldeeda lo rey Roma; scaquegaa miñe rieguial ycaa Dios, lo Dios goldeeda.

²⁶ Bzee zdoo zho gon zho sca ptsire me lo xtiidz zho. Mazd dzese bre zho, sac bdzielz zho zha niuṅgüet zho me; gocladz zho squi ndxie miech nxiṅ me pe tib diidz, per brieelod niuṅgüet zho me.

¿Pe nli zrieeban miech?

(Mt. 22:23-33; Mr. 12:18-27)

²⁷ Blozh ga, güeya que zla zha saducé lo Jesús. Nac zha saducé rliladzd zho zdziṅ dze grieeban miech; bdziṅ zho, rëb zho lo me:

²⁸ —Maestro, znu psan Moisés diidz: telne glo mgui guet lo wnaa ne nac tsieel mgui, ni gopd wnaa mëed, dzigo none betsaque zho ctsieelnia wnaa co stib, zeena gap wnaa mëed ne guiaan xlugar xpëed zha ne gut ga.

²⁹ 'Bio tib dii zha co znu bzhaac, gadz bets nac zho. Ptsieelnia zha ne nac zha gol, zeene laa zho gut, biaan xpëed zho.

³⁰ Dzigo ptsieelnia wnaa co stib bets ngutoo co. Blozh ga, gutaque zha co, pa së zho nsaṅ mëed.

³¹ Ptsieelniaque me stib zho, goc zho tson, niicle zha co psandaque mëed. Sca sca haxta bza gza gadzse zho ptsieelnia me,

³² tibaque zeene yeque me laa me gut.

³³ Mine racladz no gacndion no, ¿chopaa dzigo gac tsieel wnaa co, zeene laa zho grieeban, ne sca gza gadzse zho ptsieelnia me?

³⁴ Pquiab Jesús rëb me:

—Tiba, gacnan to ganle, lo guielmban riise rt-sieelnia miech.

³⁵ Zeene grieeban zho, zig nac zha ne yгаа guielnzaac gdziṅ zho zaatne no Dios, led yedraa ga ctsieelnia zho.

³⁶ Sac laa zho mbanle ga, gdzindraa dze guet zho. Masaque laa zho gac zig nac grë xanj1 me, mëöd gac zho lo me.

³⁷ Laa stiba, gacnan to ganle ible zrieeban grë mengut. Golwi ganle, zeene bzeet Moisés zha rëb Dios lo me zeene gon me tib yag zarz ne noyazbel ga; ga rlu rrieeban mengut. Rëb Dios lo me: “Naa nac Dios ne rliladz Abraham, naa nac Dios ne rliladz Isaac, naa nac Dios ne rliladz Jacob.” Zeene sca rëb me, ga rlu ganle mban zha co.

³⁸ Sac tel me, nacd me xDios mengut, sinque xDios zha mban nac me. ¡Par me, grëse zha ne ngab lo me, zha mban nac zho!

³⁹ Blalaa maistr ley zo ga, gon zho sca rëb me lo zha co, dzigo rëbchaa zho lo me:

—Maestro, nli squi naca zigne rnee luu i.

⁴⁰ Dzigotaa ni stib zho beendraa pe nabdiidz zho lo me.

¿Cho xpëöd nac Crist?

(Mt. 22:41-46; 23:1-36; Mr. 12:35-40; Lc. 11:37-54)

⁴¹ Horco bnabdiidz Jesús lo zho, rëb me:

—¿Zha nac dieñ ne rnee zho tib xpëédaque rey David gac Men ne nacle diidz cxeel Dios ga?

⁴² Led Davitaque name znu bnee tib lo salm ne pquiaa me:

⁴³ Bnee Dios lo men ne rnabey naa, rëb Dios lo me: “Cue naa nëz derech, nu bzob, nieeda lozh gnaz naa grëse zha ne rlëe lo luu, csan naa zho ladzna luu.”

⁴⁴ Gase ganle rlu, led scada; telne nli zha xtii David gac men co, ¿zha nac dzigo ne lëëque David rnee ne me rnabey David?

⁴⁵ Squi ndxie grë miech co noquiaadiag zho, zeene bnee me lo xpëedscuel me, rëb me:

⁴⁶ —Golguien gon, ib tsienalde to mine run maistr ley. Sac grë zha ne nac maistr ley, rdziladz zho racw zho lar nool, haxta zhits ni zho rbiba, rdziladz zho ndooladz rquiaabdiuzh miech zho zaatne rdzieel zho zho ro nëz. Zig nac len yadoow, zha nac zha ne rzob lo xcan zaatne rzob grë zha non; zeene riegaa zho tib lo lni lidz miech, lëepaaze zha nac zha ne rzob groj mezh zeene laa wagw rac.

⁴⁷ Ni rlozh ga, rio zho rla zho tel pe ncuaane rapse grë wnaa viud; ni parne peet guiabd miech lo zho, xtse rzo zho rzadraa pe lay ne rool zho. Sca run zho, jper ib tedsod nroob caxtigw ne yгаа zho!

21

*Gon ne bdeed tib wnaa viud
(Mt. 24:1-2; Mr. 12:41-44; 13:1-2)*

¹ Laa Jesús no len yadoo ga noseed me miech. Ga no me, gon me zha rdzin grë zha ricw, nroob dimi rсан zho len alcanci ne zob ga.

² Tibaque zeene bdzin tib wnaa viud, tib men proba, ye me laa me psan chop gaay win len alcanci co.

³ Zeene gon Jesús, rëbchaа me:

—Gneli naa lo to ganle, mazdraa gon non gon ne bdeed wnaa viud qui, lëdle grë gon ne psan grë zha qui.

⁴ Sac tel zha, dimi ne riaanle lo zho i rgogon zho; sangue wnaa prob qui gon, centav yeen ne quianiese me, mine rnalopaa me gziuu pe yquiin me, per laa me bloogona.

⁵ Laa Jesús zieriee ga, zeene psilo bla zha ne nac xpëedscuel me, rlozhd gwi zho zha niaa yadoo co, rzee zdoo zho ran zho grë quie ne niaaw, grë ncuaañe ngalguiee leña. Zeene gon mew, rëbchaa me lo zho:

⁶ —Niicle squitaa gon ran to niaaw niina, per zdzin dze ne nitlow, dib nacsew. Ni stib quie qui guiaandraa zigo squi zhobxcuaaw i.

¡Nsin golso!

(Mt. 24:3-28; Mr. 13:3-23)

⁷ Bded ga, bnabdiidz zho lo me, rëb zho:

—Maestro, ¿poc dzigo gac miñe bzeet luu ga? ¿Zha glu zeene laaw ziaadyob gac?

⁸ Dzigo rëbchaa me lo zho:

—Nsin golso, zeena choot yquidiede to. Sac nzian zha ne greequia, guiab zho laa dze co bdzinle, guiab zho zha nac Men ne zëëble diidz ga cxeel Dios. ¡Ib gliladzde tow!

⁹ Zeene gon to pa lo ndxiedil tib guiedz, pa lo noyacгаа grë dildox, ib gdziebde to. Ib none gac grë ncuaañ co, per lega loxaque miñe csilosew ga.

¹⁰ 'Grë guiedz nroob, laaw tilnie saguiedz nrooba; grë zha ne rnabey grë guiedz nroob, laa zho tilnie sazha rnabey zho.

¹¹ Nëzrii nëzrec csilo gni grë zhodox, nzian zaatne gan miech gbin, zaatne glaangaa zho grë guielguidzdox. Nzian grë ncuaañe glu zhan gbaa, nzian grë ncuaañ co, ncuaañe ctseb miecha.

¹² Per ansraa gac grë ncuaañ co, stsidil miech to, squiana zho to; znaaz zho to, tsiezo zho to lo wxtis ne rnabey yadoo, zha co co to ladzguiib, ni haxta

ziezo zho to lo wxtis ne rnabey guiedz, loxaque porne nac to zha ne no xnëz naa.

¹³ Ga nagon gdeeda diidz gnee to lo grë zha co, gacnan zho ganle cho nac naa.

¹⁴ Ib gunde to tso to zhgab dien pe guiab to lo zho, zeene laa to ctsire lo mine rquiaqui zho to;

¹⁵ sac naa gnedz guielbiini lo to, zeene laa to gnee guien to pe guiab to. Zha ne gona, squiaadiag zhow, per ni gdzielz zho pe ctsire zho lo to.

¹⁶ Haxta pxoz to, xniaa to, bets to, grë menlidz to, grë zha ne ndzieeldiidz to, stsidil zho to, lëëque zha tsielo to ladznia zha ne csacsi to. Lo grë to, zio zha ne haxta zet ladznia grë zha co.

¹⁷ Grëse miech glëe gan to porne nac to zha ne no xnëz naa.

¹⁸ Nli stiche zho xquielmban to lo guidzliu rii, per, jni tib guits guic to, grielod zho gnitlo zho!

¹⁹ Tiblique sca golgac, sozite to lo naa, zeena yгаа to guielmban ndzon ne gneedz Dios.

²⁰ Zeene gan to igose guiedz Jerusalén ndxienap menguiib, nanle to len dze co laaw nitlo.

²¹ Grë zha ne no guiedz ne ngab Judé, none xoon zho tsie zho nëz yagui, ga tsietsolan zho. Zha ne no Jerusalén nu, none grieeniob zho. Grëгаа zha ne quia dziin dana, ib guiabd zho gbire zho lad guiedz.

²² Tib guielnëdox ne csiaab Dios gan grë miech rii len dze co, ga gac grë mine raquiet lo Xtiidz me ted zho.

²³ jProb grë men wnaa ne lëetse len dze co zoney xpëed, men ne quianiegaa mëed ne bii radz! jMbandox ted miech, guielnëdox ne csiaab Dios gan zho guiedz rii!

24 Zutxuu miech zho, zha ne tedlaagaa lo guielgut zeyzhoo miech zho, zhaase zhaase dan ne gueynie zho zho. Horco laa grë zha zit co, sëëb gunchen Jerusalén; haxta gdziñ dze ne gnabey Dios griee zho.

Ziaad Jesús stib

(Mt. 24:29-35, 42-44; Mr. 13:24-37)

25 'Nzian grë ncuaane glu lo ngbidz, glu lo mëë, glu lo mel. Mbanse gac miech, zdiebdox zho zeene gon zho bidox ne tso tsasoli nisdoo.

26 Nzian zha ne haxta scow zho lo dzeb, zeene laa zho gan grëtaa ncuaane noyac lo guidzliu len dze co. Grë ncuaane no zhan gbaa, nëzrii nëzrec gaca.

27 Horco bii zan zho ganle zeene laa naa zialzëëb tib lo xcow con grë guelndzon, con grë poder ne rap naa.

28 Zeene gan to laa grë ncuaan co rsilo noyac, nley golco zdoo to; jsac hor co laa Dios ycaania to!

29 'Golzoob cuidad ganle zha nac yag guigw, beelzegaa pe stib yag.

30 Led ran to ganle, zeene laa grë zhicwa racnieen, laa zhiblaga rsilo rdzib, gase runbey to laa mëë nëëg ziaadgaxle.

31 Scaque nagon zeene gan to laa grë mine rne naa lo to nu rsilo noyac, dzigo nanle to laa dze ne csilo gnabey Dios ziaadgaxle.

32 Gneli naa lo to ganle, nzian grë miech ne mban niina, bii zan zho zeene laa grë ncuaan co gac; sac ible ncuaane gaca.

33 Zdziñ dze ne nitlo gbaa, nitlo guidzliu, sangue mine rne naa lo to nu nitloda; ible laaw none gac.

³⁴⁻³⁵ ¡Nsin sca golso, zaacse golgac! ¡Adel gal dze ne laa naa guial, lel lo grë ncuaañe ndzinlid, lel lo guielgonziu, lel lo grë zhgab ne rac lo guidzliu rii no to, zigne gun grëraa miech! Sac gon, lega naclew glanso naa.

³⁶ Nligaa nsin golso. Tibaque golnab lo Dios, gacniën me to peet gacde to lo grë guielnë co, inë peet xtolde to zeene laa to gacredz lo naa.

³⁷⁻³⁸ Gzase len dze co pseed me miech. Silgaw, miech guizhiu ne rdziñ len yadoo, parne yquiaadiag zho zhiwseed me. Guidze sca rseed me zho, laa pcow liu riebëz me cho Gui Oliv.

22

Bnediidz zho dien zha gnaaz zho Jesús
(Mt. 26:1-5, 14-16; Mr. 14:1-2, 10-11;
Jn. 11:45-53)

¹ Ziaadyoble lni Pascwa, zhilni nroob men Israel, lni ne row zho quietxtil ne rquiad ncobi lad.

² Grë zha ne nac pxoz rnabey ni grë maistr ley, len dze co laa zho no quiaguib zho dien zha gut zho Jesús. Noguib zho tib mod ne glisquid menguedza; sac rdzieb zho gacntseeb menguedz.

³ Tib dzew, laa mendox bzëeb zdoo Judas Iscariot, tib zha ne rzëniepaa me ga,

⁴ rias Judas güey Judas lo grë pxoz rnabey co, lo grë men ne zo lo zha ne rquianap yadoo, rëb Judas zha csañ Judas Jesús lадznia zho.

⁵ Zeene bin zhow per nli rley zho, nacne biaan zho diidz quizh zho Judas.

⁶ Dzigo desde hor co psilo Judas noguib Judas dien zha gdeeda diidz guiend miech csañ Judas me lадznia zho.

Dowxtseenie Jesús xpëëdscuel me
(Mt. 26:17-29, 31-35; Mr. 14:12-25, 27-31;
Jn. 13:21-30, 36-38; 1Co. 11:23-26)

⁷ Mer dze ne rsilo lni Pascwa, leñ dze ne sca row zho guietxtil ne rquiad ncobi lad, ni rut zho carner yeen ne rowxtsee zho.

⁸ Dze co bnabey Jesús Pedr grop Juan tsiegunlo zho xtsee ne gownie me zho wdze co.

⁹ Dzigo bnabdiidz zho lo me, rëb zho:

—¿Pa lo racladz luu guio no guiodziuuñlo now?

¹⁰ Rëbchaа me lo zho:

—Goltsie Jerusalén. Zeene sëëb to lad guiedz, ga gañ to tib mgui nzobyañ tib re nis, goltsienal zhits me. Yu ne gañ to sëëb me,

¹¹ golguiab lo bizhuan yu co: “Znu në Maestro, ¿pa leñ yu me gneedz luu gac zaatne gowxtseenie me xpëëdscuel me wdze rii?”

¹² Ga glu me tib leñ yu nroob ne riaañ glaa, nzhixcuaale leña, dzigo ga golgunlo zhixtsee ne.

¹³ Dzigo laa zho zie. Güey zho zaatne pxeel me zho ga, ga beenlo zho xtsee co.

¹⁴ Wdze co, zeene gol hor xtsee laa Jesús bded lo mezh gza me gza tsiipchop xpëëdscuel me. Xtsee co no zho,

¹⁵ zeene rëb me lo zho:

—¿Blactaa gon pquiambëz naa gdzin dze rii, znu gowxtseenie naa to nawdze rii, ansraа csacsi miech naa, gut zho naa!

¹⁶ Lëë lultm vuel^t nu gon¹ teed naa lni Pascw rii, haxta gdziⁿ dze ne laa Dios csilo gnabey, dze ne glupaa gan^{le} zha nac xtsee rii.

¹⁷ Dzigo bzheⁿ me tib cop nroob no vin, bdeed me xquizh lo Dios, blozh ga bdeed me cop co lo zho, rëb me:

—Gol¹quiin vin rii gza to.

¹⁸ Gneli naa lo to gan^{le}, lëë lultm vuel^t nu guie naa vin rii, haxta gdziⁿ dze ne laa Dios csilo gnabey.

¹⁹ Ni bzheⁿ me guietxtil, bdeed me xquizh lo Dios, blozh ga beengrol¹ mew bdiiz mew lo zho, rëb me:

—Gol¹quiina, rrieequia gon¹ lëë xcuerp naa i, sac gon¹ znu gon¹ zho xcuerp naa parne csilaa naa to grë to. Zeene gdeedtaaw diidz, gol¹gun¹ miⁿ rii parne glu to gan^{le} tibaque rsoladz to naa.

²⁰ Blozhse dowxtseenie me zho, scaque bzheⁿ me tib cop no vin, blozhse bdeed me xquizh, rëb me lo zho:

—Lëë stib trat cub nu gon¹ riaan¹ Dios grë me miech, rrieequia xchen naa nu nac vin rii, ren ne gzhiee xcuent to, ren ne tso firm trat co par glu nona.

²¹ Ni gacnaⁿ to gan^{le}, lo mezhaque nu gon¹ zob zha ne tsielo naa ladznia zha ne gut naa.

²² Naa ne nac naa Mgui ne pxeel¹ Dios, nli, ible none guet naa, parne gac miⁿe pxeel¹ Dios naa zial¹gun¹ naa, i¹per probsaxe zha ne tsielo naa ladznia zha co!

²³ Horco psilo gza zha ne zobnie me ga, rnabdiidzlsa zho dien¹ cho nac zha ne rzeet me ga;

²⁴ haxta psilo zho nodi¹diidz zho dien¹ cho gac zha ne gacnon lo zho.

25 Dzig**o** bnee me lo zho, rëb me:

—Nli grë zha ne rnabey guiedz ne ndxie lo guidzliu, masaque rnabey zho miech zig nac zeene bzhii zho zho, per zha gunraa miech, lëë gdib rxecw zho, haxta rnee zho nroob quiayun zha co xyudar guiedz.

26 Sa**ng**ue to gon, zha ne gnabey lo to, none guien zho gac zho zig tib ngundziin lo to; zha ne racladz-gaa gacnon, none guien zho guiaanwin zho.

27 Lo guidzliu rii, zha ne rnabey, rzobse zho, zha ne nac ngundziin, zha co rdziib ncuaane row zho. ¡Sa**ng**ue lo ne, led scad naca! ¡Go**l**wi ganle, tib ngundziin nac naa lo to!

28 Tose goc zha ne tibaque gocnie naa lo grëtaa mine bdeed naa len dze rii.

29 Gane niina, laa naa gneedz tib guienzaac nroob lo to ygaa to gdzin to zaatne bneedz Pxo**z** naa gnabey naa;

30 zeena ine znu tipse zioob ne lo xmez**h** naa ga, dioow ne, dio ne. Haxta so naa to, to gac zha ne cobey, pe nac mine been gza tsiipchop dii ne nac menladz to nu.

31 Horcoque bnee me lo Pedr rëb me:

—Bina ganle Pedr, racladz Satanás gon ycuiib ma to, zigne run zho zhobxtil.

32 Per laa naa bnable lo Dios, gacni**e**n me luu, csaand me sozitpaa luu lo naa. Gacxe waa, zeene guien luu lëda ga been luu, luu gnee lo grëraa zha qui, parne tibaque dib zdoo zho gnalo zho naa.

33 Pquiab Pedr rëb Pedr:

—Niicxe peraa waa gac, csaand naa luu. Te**l**ne co zho luu ladzguiib, ye naa tso ga, ¡te**l**ne gutgaa zho luu, zaatne guet luu, ga guet naa!

34 —Bina ganle Pedr —rëb Jesús—. ¡Guiel rigazh gon, gardle ycuedz gall, tsonle vuelt rëb luu runbeyd luu naa!

35 Dzigo bnee me lo zho gza zho, rëb me:

—Led rsoladz to ganle zeene pxel naa to güeyseed to miech, scase güey to, peet dimi bide to, per ni ncuane gow to, per ni lab to bide to. ¿Pe beenfalt ncuane nquiuin to hor co?

Pquiab zho rëb zho:

—Beenfaltetew.

36 Dzigo rëbchaa me:

—Horco nagon peet bide to, sangue niina zha ne quianie dimi, zha ne quianiegaa ncuane gow zho, none güey zhow. Niina nagon none laa to yquiuin spad. Zha ne quianieda, none maase tib xab zho cto zho, si zho tiba.

37 Sac nataa nagon, laa miech cteed naa mine zhobnee lo Xtiidz Dios, zaatne rnee: “Bnabey zho gut me, zigne rut zho grë zha ntseeb.” Grëse mine zhobnee teed naa, ib laaw none gac niina.

38 Pquiab zho rëb zho lo me:

—¡Bui ganle laa chop spad nule!

Dzigo rëbchaa me:

—¡Mazd peet gnedraa naa lo to!

Bzodiidznie Jesús Pxoꝝ me Getsemani

(Mt. 26:36-46; Mr. 14:32-42)

39 Blozhse ga, laa me brieë zie me nëz Gui Oliv, zaatne rietaque me; ziana laque gza xpëëdsuel me zhits me.

40 Bdzin zho ga, rëbchaa me lo zho:

—Golnab lo Dios gacnieñ me to, zeena yquuild menodox to.

41 Bzë me spalal, bdziṅ me zig zaatne riab tib quie ne rcheḷ ne nia ne, dzigo ga pquitsgzhib me, psilo me bnaab me lo Dios,

42 rëb me:

—Papá, laa naa rnab lo luu, telne zala zdoo luu, psilaa naa lo grë guielnë rii. Per telne grieeloda, miṅe gnëtaa luu sca gaca.

43 Horco biet tib anjl gbaa bdziṅ pchoobladz zdoo me.

44 Mban rac me laa me nozodiidznie Pxoz me, per hor cole mazdraa rnab me lo Pxoz me; lo guielnë ro co haxta rzonis me, masaque zëbdzuun grë nis co lo me zootle ren.

45 Zeene laa me guso ga, bdziṅ me zaatne biaan xpëëdsuel me, goṅ me gzase zho laa zho nixguies. Ye zho mban rac zho, lo guielnë co bguudz zho mcaal.

46 Dzigo pcuaan me zho, rëb me lo zho:

—¿Nixguies to ye? Lëda i goṅ, jgolsobna! Golnab lo Dios, gacniṅ me to, zeena yquiild menḍox to.

Bnaaz zho Jesús

(Mt. 26:47-58, 67-75; Mr. 14:43-50,53-54, 65-72; Jn. 18:2-18,25-27)

47 Laa Jesús quianeeque, zeene laa Judas bdziṅ bdziṅnie Judas tib dzoon miech. Zigne bdziṅ Judas, wbig Judas lo me, dow Judas bzhid cuas me.

48 —¡Judas! —rëb me—. ¿Con tib bzhid dzigo lëë glu luu naa lo grë zha qui?

49 Zeene bien xpëëdsuel me, me zienaaz grë miech co, rëbchaaz zho lo me:

—Maestro, ¿zha dziuun ne? ¿Pe zdeed spad no zho?

50 Znuse biet tib zho pchel zho tib nia spad, pchug zho diag tib xmoz men ne nac pxoz nroob.

51 Dzigo bnee Jesús lo zho rëb me:

—Golsaan zho, ndzinli golgac.

Horco wbig me bzhen me diag zha co, beenguiaac mew, lëetse min derecha.

52 Lad grë miech co no ndal grë pxoz ne rnabey, grë zha ne zo lo zha ne rquianap yadoo, ni spalal men ne nac zha non lo menquiedz; dzigo bnee Jesús lo zho, rëb me:

—¿Pe nacne squitaa ziaad to, nzhen to yag, nzhen to spad ziadnaaz to naa? ¿Niacxe naa cho ngbaan?

53 Blactaa dze name gon to no naa len yadoo, ni bnaazde to naa ga. Per nole guic to nagon nawdze rii gnaaz to naa; grë mine racladz to grë to mendox, niina laaw gac.

54 Horco wbig be zho bnaaz zho me, laa zho zienie me nëz lidz men nac pxoz nroob.

55 Bdzin zho lidz men co, bre zho xley me, bzëëg zho gui, laa zho no nodzëë zho. Ye Pedr maase zit zit nal Pedr, laa Pedr bdzin ga; laa Pedr wbig bzob lo zho ga.

56 Zeene gon tib wnaa ne quia xtsiin men co laa Pedr zob ga, dze rwi me, tibaque rëb me:

—¡Ye mgui qui gon rzënie men ne blansonie to i!

57 —¿Naa ye? —rëb Pedr—, ¡per ni runbeyd naa men qui!

58 Wdzeepaaw, laa tib zha ne zo ga, gonaque Pedr, rëb zho lo Pedr:

—¿Segur lëë ye luu nacie men ne bgaa i?

Scasaque bneelid Pedr.

59 Wdzeelaaque goca, zeen_u laa stib zho brieequia, rëb zho:

—Lëë tib zha ne nacie men_u qui nu gon_u. ¡Rlu zha galilé nac zho!

60 Pquiab Pedr, rëb Pedr:

—¡Rien_d naa gon_u, pe nacie squi rnee luu!

Gardle lozh grieë diidz co ro Pedr, zeene_e laa tib gall pcuedz.

61 Gall co nocuedz, zeene_e ptsire lo Jesús, dze bui me lo Pedr; dzigoraa psoladz Pedr zeene_e rëb me lo Pedr: “¡Guieel riigazh gon_u, gardle ycuedz gall, tson_{le} vuel_t rëb luu run_beyd luu naa!”

62 Mbanse rac Pedr. Brieë Pedr ga, psilo Pedr biin Pedr guie_lnë co.

63 Grë zha ne zopaa quianap Jesús, nzian grë ncuaane_e run_u zho me, psilo zho noyunguzee zho me.

64 Pxidoo zho lo me, ni rguin_u zho me, rlozh ga, rnee zho:

—Luu ne nac luu men_u ne ziadteed xtiidz Dios, ¿bnë sca dien_u cho ga bdi_n luu?

65 Nzian grë ncuaane_e rgoredz zho lo me.

*Güeynie zho Jesús lo zhiwxtis zho
(Mt. 26:59-66; Mr. 14:55-64; Jn. 18:19-24)*

66 Zeene_e biini liu, pcaalsa grë men_u ne nac zha non lo men_guedz, grë zho pxoz rnabey, ni grë zha ne nac maistr ley, güey zho güeynie zho Jesús lo zhiwxtis zho. Bdzi_n me ga, bnabdiidz zho lo me rëb zho:

67 —Bnë lo no dien_u, ¿pe lëë Men_u ne nacle diidz cxeel_l Dios lo guidzliu ga i nac luu?

Pquiab me rëb me:

—Niicle tel_{ne} gni naa lo to nli lëe me_n co nu nac naa, gliladzde tow,

⁶⁸ tel_{pe} gnabdiidzгаа naa lo to, ctsirede to low; sac gliladzde to mi_{ne} nac diidzli.

⁶⁹ Naa ne nac naa Mgui ne pxeel_l Dios, zhile laa dze gdzi_n ze_{ne} laa naa sob cue Dios nëz derech, me_n nroob ne rrieelo ru_n grëse ncuaa_{ne} racladz me.

⁷⁰ Horco grëse zho pquiab, rëb zho lo me:

—¿Xpëed Dios dzigo lëe nac luu?

Dzigo rëbchaa me:

—Tozhal name rnee, nli Xpëed me nac naa.

⁷¹ Horco rëb zho:

—¡Pe mazdraa textigw ne racladz ne! ¡Laa ne bdzionle gan_{le} mezhah rnee Xpëed Dios nac me!

23

Güeynie zho Jesús lo Pilat

(Mt. 27:1-2; 11-14; Mr. 15:1-5; Jn. 18:28-38)

¹ Horcogazh pcaanie zho Jesús nëz, bdzi_nnie zho me lo Pilat, me_n ne nac gobernador ne nzoob zha Roma ga.

² Ga psilo zho nzian grë ncuaa_{ne} rquiaqui zho me, rëb zho:

—Laa no bnaaz me_n rii gon_n ziaadnie no me lo luu, sac bgaa me noquiil me me_nladz no gacntseeb zho. Rnee me lo zho nonguiel_{da} gdeed zho dimi ne razh lo zhirey ne, me_n ne zob Roma; haxta rnee me mele nac rey ne gun_{bey} zho, sac Dios pxeel_l me ziaad me.

³ Dzigo bnabdiidz Pilat lo me, rëb Pilat:

—¿Pe nli na luu nac Rey ne rnabey lo zha Israel?

Pquiab me rëb me:

—Nliw, rey nac naa zigne rnee luu i.

⁴ Dzigo rëbchaa Pilat lo grë zha ne ne nac pxoz rnabey co, ni grë miech ne ziegrë zho ga:

—¡Ni tib dol̄ rapd meñ rii!

⁵ —¿Zha gapd me dol̄? —rëb zho—. Ni zaatne zieetaa me noquuil me miech gacntseeb zho lo zhirey ne. ¡Dible nëz Judé nu güeyted me; desde nëz Galilé brieë me ziaad me haxta nu!

⁶ Goñ Pilat sca rëb zho, dzigo bnabdiidz me dien pe zha Galilé nac Jesús.

⁷ Zeene gocnan me zha nëz co nac Jesús, dzigo pxeel me Jesús lo Herod, sac Herod rnabey nëz Galilé; lëëtaque leñ dze co laa Herod no Jerusalén ga.

⁸ Rley Herod zeene goñ Herod me, sac ziyon Herod grëtaa miñe ruñ me; quiambëz Herod gdziñ dze ganlo Herod me, ganlo Herod guñ me pe tib milagr.

⁹ Psilo Herod nzian grë ncuaañe rnabdiidz Herod lo me, per ni tib lo wñabdiidz co ib ptsired me.

¹⁰ Zeene goñ Herod rquiabd me, ni goñ Herod noque grë pxoz rnabey co, grë maistr ley co, ib rioogd ro zho rzadraa pe yquiaaqui zho me, rnab zho cteed Herod me caxtigw,

¹¹ nacne leñ psilo Herod grë xmeñguiib Herod rzhidznie zho me, runnguzee zho me. Bgacw zho me tib lar ne racw rey, sca nacw me lar co biire pxeel Herod me lo Pilat.

¹² Glo ib rdzieeld xtiidz Herod grop Pilat, laa dze co laa zho psilo bñeewen stib.

Bnab zho guet Jesús

(Mt. 27:15-26; Mr. 15:6-15; Jn. 18:39-19:16)

13 Dzigo bnabey Pilat pcaalsa grëse pxoz rnabey, grë zha ne nac zhiwxtis zha Israel, ni grëraa menquiedz,

14 rëb Pilat lo zho:

—Laa zho biad-zoob xdemand men rii lo naa nu, nac diidz noquiil me miech gacntseeb zho lo zhirey ne. Nacne pquiep naa me, ni blalagaa to gona; par naa peet dol rapd me.

15 Niiclegaa Herod, ye Herod gon ni tib dol rapd me; gane pxeelaque Herod me lo naa. Quiayund me ncuane guiab ne rieguial guet me.

16 Mine gaca, laa naa gnabey ted me tib caxtigw, lozh ga dzigo laa naa csilaa me.

17 Nac costumbr, gzobse lni Pascw rsilaa zho tib zha ne no xcuent lo wxtis.

18 Per zeene bin grë miech co laa Pilat csilaa Jesús, grëse zho nguiedz roptsie zho, rnee zho:

—¡Csilaad luu men qui, bnabey guetgazh me!
¡Barrabás psilaa!

19 Barrabás lë tib men co no ladzguiib len dze co, sac bgaa me zo me lo tib dii zha ne noyactseeb lo rey len guiedz Jerusalén ga, ni zëëbaque me tib ngutoo.

20 Bguib Pilat dien zha nrieelo nsilaa me Jesús,

21 per psilo grë miech co nguiedz roptsie zho, rnee zho:

—¡None guetgazh men qui! ¡Lo cruz bnabey yquia me!

22 —Per, ¿pe nacne gnabey naa yquia me lo cruz? —rëb Pilat stib—. ¿Pe nac falt ne rap me? Laa naa pquieple me, ni tib dol rapd me, parne gnabey naa guet me. Laa naa nile lo to, laa naa gnabey ted me tib caxtigw, lozh ga laa naa csilaa me.

²³ Psiloque grē miech co stib, nguiedzraa roptsie zho, rnab zho yquia Jesús lo cruz; haxta goc miñe racladz zho.

²⁴ Racse Pilat, laa Pilat bdeed diidz.

²⁵ Blozhse bnabey Pilat psilaa zho Barrabás, zha ntseeb ne no ladzguiib ga, dzigo laa Pilat psan Jesús ladznia zho.

Güeyquiaa zho Jesús lo cruz

(Mt. 27:32-44; Mr. 15:21-32; Jn. 19:17-27)

²⁶ Horco laa zho brieenie Jesús laa zho zienie me zaatne yquia me lo cruz. Nēz zienie zho me, bdzieel zho tib men Ciren lē Simón wbire lo dziin dan, pcuēēz zho men co, bnabey zho me bi me zhicruz Jesús; nalse me zhits Jesús, laa zho zienie Jesús.

²⁷ Miech guizhiu ne zie ga, ndal grē men wnaa psilo zho roon zho no zho xquielñe me,

²⁸ dzigo dze bui me lo zho, rēb me:

—Xin, nac to men Jerusalén rii, goonde to xquielñe naa. Mazd golgoon por grētaa guielñe ne no gan to, por grētaa guielñe ne no gan xpēēd to;

²⁹ sac zeene gal dze co grē men wnaa ne quianie mēēd, ziaab zho: “Mazd wenaque zie zha ne quianied mēēd, zha ne nanđ zha radz mēēd, zha ne niaadgaa gap mēēd.”

³⁰ Horco grē miech, laa zho gnab tebaa zha pixche grē gui guiaan zho zhana.

³¹ ¡Golwi ganle, telne znutaa miñe nodeed naa nac naa zig tib yag nguia, pelel to dzigo ne nac to zig tib yag bidz!

³² Ye schop zha ne nac ngbaan, zienie zho ga yquiaagza zho me lo cruz.

³³ Zeene bdziṅ zho zaatne nac “Gui Beerguic Ngutoo”, ga pquiaa zho me lo cruz gza me ngbaan co. Tibga zhicruz zho bzo tib nēz cue zhicruz me.

³⁴ Lo cruz co quia me, zeene nguiedz bnee me rēb me:

—¡Papá! Ncuane quiayun grē miech rii nu, bzhiguiel gunquizhd luu zhow; sac riend zho pe run zho.

Gza menɡuiib ne bdziṅ ga yquiaanap me, hor co tib tib zho bzheṅse zho tib lé xab me, laa stiba bio zho rif.

³⁵ Ndal miech ne ndxie quiawi. Haxta grē zha ne nac wxtis zo ga, no zho rzhidznie zho me, rnee zho:

—Stib miech scataa beṅguiac me, stib miech scataa bla me. ¿Pe rac me na ne riete me i? ¡Guet me i zho, telne nli me nac Meṅ ne zēēble diidz cxeel Dios, telne nli Dios bzooblo me ziaad me!

³⁶ Wbig menɡuiib co rdeed zho nziu bla guie me, rzhidznie zho me, rnee zho:

³⁷ —¡Zhirey zha Israel name nac luu! Psilaa luu lo guielnē qui nazho.

³⁸ Glaa guic zhicruz me quia choplan diidz ne pquiaa zho, rneew: “LĚĚ ZHIREY ZHA ISRAEL NŪ.”

³⁹ Grop ngbaan ne quianie me lo cruz ga, psilo tib zho ye zho rzhidznie me, rnee zho lo me:

—¡Led rēb luu lēē, luu nac Meṅ ne zēēble diidz ga cxeel Dios! ¡Blu nazho nli meṅ co nac luu, psilaa ne lo guielnē rii!

⁴⁰ Horco pquiab stib zha co, rēb zho lo zho:

—¡Psoog ro luu! ¿Pe niicle niina ne laa luu guetle ib rdzieebd luu Dios?

41 Bien ganle, jtel ne ible min rii riogua_l ne grop ne, nu nodizh ne grë guie_lntseeb ne bdziuu_n ne; sangue men qui, peet dol rapd me!

42 Dzigo rëb zho lo me:

—jBzhigui_l zeene guiaad luu gnabey luu, ib csand luu naa tib lad!

43 Pquiab me rëb me lo zho:

—Peet tsienied guic luu, nadzegazh laa luu së guioo ne zaatne nac lo xquie_lbley Pxo_z naa.

Gut Jesús

(Mt. 27:45-56; Mr. 15:33-41; Jn. 19:28-30)

44-46 Go_l gro_l dzew, tibaque zeene goc tib ncow dipse lo guidzliu. Ni palal rlud xbiini ngbidz, haxta las tres biala biini stib. Horco pquiaa Jesús tib redz nroob, rëb me:

—Papá, laa naa rsa_n zhiespíritu naa ladznia luu, luu pcaaniaw.

Diidz co brie_e ro me, znuse blozh me. Laa me quialozh, zeene laa lar nroob ne quia len yadoo Jerusalén ga briez nzoli, grol_taa goca.

47 Zha ne rnabey lo zhaguiib ne pquiaa me lo cruz ga, zeene gon zho zha blozh me, bien zho Dios been min co, rëb zho:

—jNe nlipagaa tib men peet xtol_d goc men qui!

48 Scaque grë miech ne goclo ga, zeene gon zho zha blozh me, biabguie_lnë zho, mbanse rac zho laa zho wbi ga.

49 Laa grë zha ne runbey me, zha ne gocnie me, zig nac grë men wnaa ne gocgrë zha ne brieena_l zhits me zeene brie_e me nëz Galilé, grë zho laa zho ndxiese tib lad rwi zho.

*Bgueets Jesús**(Mt. 27:57-61; Mr. 15:42-47; Jn. 19:38-42)*

⁵⁰ Lad grë zha ne nac zhiwxtis meñ Israel ga, no tib meñ guiedz Arimaté lë me José; lëë guiedz co ndxie xtan Judé. Tib miech wen nac me, noxco me miñe rnabey Dios,

⁵¹ ye me quiambëz gdziñ dze ne csilo gnabey Dios. Zeene bnabey zha ne nacgrë me dziin ga zha gac Jesús, ni lalnu biod me conform miñe bnabey zho.

⁵² Nacne hor co güey me lo Pilat, bnab me didzbey tsielit me xcuerp Jesús lo cruz.

⁵³ Dzigo güey me, blozhse blit me cuerp co lo cruz, pcheñ me me tib lo lar nroob, güey me güeyqueets me me tib leñ baa cub ndieen tib cho quie gax ga.

⁵⁴ Lëë bdze dze co no zho xco ne laa dze ne gdziiladz zho lo dziin sëëb.

⁵⁵ Grë meñ wnaa ne sca nacgza grë zha ne brienañ zhits me zeene brieë me nëz Galilé ga, ye zho güeynañ bgueets me, gon zho pa lo bio me.

⁵⁶ Blozhse bgueets me, laa zho zey. Bdziñ zho bzhixcuaa zho, tiblo zënex ne tsietëëb zho lad xcuerp me; dzigo laa zho bdziiladz zigne rnabey ley no gun zho.

24*BRIEBAN JESUS**(Mt. 28:1-10; Mr. 16:1-8; Jn. 20:1-10)*

¹ Laa zeene goñ dze ne rzobni zhmal, silgaw laa gza meñ wnaa co brieë, bi zho grë zënex ne bzhixcuaa zho ga, laa zho zie ro baan Jesús.

² Bdziñ zho, gon zho laa quie ne bioog ro baan me ga bdiooble;

³ bzëëb zho len baa gon zho, niicle xcuerp me guiendle ga.

⁴ Laa zho zo ga, riend zho dien pe nacne sca nialse ro baa co, pe nacne niicle xcuerp me guiend leen co. Tibaque zeene gon zho laa chop men bgui zole lo zho ga, masaque riaazbel lad xab grop men co.

⁵ Horco per nli bdzieb zho, lo dzeb co mine been zho laa zho pquiitsgzhib haxta bdziñ lo zho lo liu. Dzigo rëb grop men bgui co lo zho:

—¿Pe nacne ziaadguib to men mban zaatne rio mengut?

⁶ ¡Laa me brieebanle! ¡Guiendle me nu! Golsoladz ganle zha në me lo to len dze ne no me nëz Galilé,

⁷ në me: “Mgui ne pxeel Dios, ible none guiab me ladznia grë miech ngoopdol, squiaa zho me lo cruz, per zeene gac tson ngbidza, laa me grieeban.”

⁸ Dzigoraa psoladz zho, nligaa sca bnee me,

⁹ hor co lëëlëd güeynie zho diidz lo gza tsiiptib zha ne nac xpëëdsuel me, ni lo grëraa zha ne nacgza zho ga.

¹⁰ Nzianlaa nac men wnaa co, lad co no Marí Magdal, no Zhuan, ni Marí ne nac xniaa Jacob.

¹¹ Niicle bzodiidz zhow lo xpëëdsuel me, per con rnee zho led ncuaan gacd ga, ni lalnu bliladzd zhow.

¹² Tibaque zeene brieed Pedr, rias Pedr laa Pedr zie nëz ro baa. Bdziñ Pedr bdiixlo Pedr len baa co, gon Pedr nligaa, ¡loxaque lar ne briel me zhoob leen co! Blozh ga, laa Pedr zeyaque, rzee zdo Pedr gon Pedr nli guiendle xcuerp me ga.

Gon zho Jesús nêz Maús
(Mr. 16:12-13)

¹³ Dze co brieë chop xpëëdsçuel me zie zho tib guiedz win lë Maús. Gax Jerusalén riaan guiedz win co, maase chop hor rzë zho rdziñ zho ga.

¹⁴ Nêz no zho nozodiidz zho grë miñe pteed miech Jesús ga,

¹⁵ tibaque zeene bien zho laa zho bгаа tib lo men co, gocgza me zho laa zho no nêz, per, jib biend zho lëë Jesús ga!

¹⁶ Rañlo zho laa me ziegza zho ga, per ni lalnu beenbeyd zho ne mew, sac zig nac zeen pe tib ncuaañe ptse lo zho.

¹⁷ Dzigo rëb me:

—¿Pe squitaa nozodiidz to? ¿Pe nac squi rac to, zig nac zeene pe guielñë no to?

Dzigo bzodze zho. Mban rac zho, haxta lo zho rlu nroob guielñë no zho.

¹⁸ Pquiab tib zha ne lë Cleof, rëb zho:

—¿Niacxe bind luu ganle zha nactaa ncuaañe goc Jerusalén len dze rii? Grëse zha ne name güey Jerusalén, gocnaña.

¹⁹ —Nligaa —rëb me—, ¿pe dien goc ga?

Rëbçaa zho:

—Len dze rii psacsi zho men Nazaret ne lë Jesús. Tib men ne biadteed xtiidz Dios lo miech nac me, nziän grë milagr nroob ne been me; miech guizhiu ne bley pquiaadiag zhiwseed me. Rlu tib men nziuu nac me lo Dios.

²⁰ Per lel brieë grë pxoz rnabey, grë zho zha ne nac wxtis, bnaaz zho me, bnab zho gut me, pquiaa zho me lo cruz.

²¹ Tibaque rdzieets no, me niac tib meṅ ne nsilaa zha ladz ne ladznia zha Roma. Pasëse miṅ co niac, nadzele rac tsoṅ ngbidz beet zho me.

²² Per riend no dieṅ zha nac cuent co, sac nasil güey bla meṅ wnaa ne nacgrè no ro baan me,

²³ zeene wbire zho bzodiidz zho lo no nē zho guiendle xcuerp me leṅ baa, loxaque chop anjl briequia lo zho ga, rēb anjl co mban me.

²⁴ Blozh ga, güeyaque bla zha bgui ne nacgrè no, goṅ zho nligaa guiendle xcuerp me ga.

²⁵ Dzigo rēbchaa me lo zho:

—¡Nadzpaa ncow nac guic to, nadzpaa ndip nac zdoo to! ¿Riladzde to grè miṅ dzigo lēē bzeet zho padzeela ted Meṅ ne nole diidz ga cxeel Dios?

²⁶ Bzeetle zha co name ible no csacsi miech me, antes ne gbire me lo guielndzon ne no me.

²⁷ Dzigo psilo me bnee me lo zho pa lo zhobnee grè miṅ bded me ga, psilo me desde grè miṅ pquiaa Moisés, haxta grè miṅ pquiaa grēraa zha ne biadteed xtiidz Dios.

²⁸ Sca no zho nēz laa zho bdziṅ Maús. Bdziṅ zho ga, rac me zig nac zeene tib ted me,

²⁹ dzigo quia zho rnab zho lo me cuēz me ga, sac laa dze bdzele, zhile laa liu ycow. Nacne blēz me.

³⁰ Laa zho zob lo mezh gowxtsee zho, bzheṅ me guietxtil bdeed me xquizh lo Dios, blozh beengrol mew bdeed mew lo zho.

³¹ Dzigoraa zig nac zeene bzhiäl lo zho, laa zho beenbey me. Per par nianraa zho me, znuse bñit me lo zho, goṅdraa zho me.

³² Horco per nli rley zho rnee zho:

—Con razon zeene sca ziaadgza ne me nēz nonee me lo ne zha raquiet lo Xtiidz Dios,

masaque tib guielbley nroob ne biaadnie xcodiidz me zdoo ne.

Sca rnee zho, sac bien zho bdziñ tib guielbley nroob zdoo zho, zeene sca nonee me lo zho.

³³ Lëëlëdaque brieë zho ga, bio zho nëz wbire zho Jerusalén stib. Bdziñ zho lo gza tsiptib zha ne bzëniëpaa me ga, ni grëraa zha ne nacgrë zho,

³⁴ rëbchaa zha co lo zho:

—¡Tebaa gan to ganle nli brieëban xmaistr ne!
¡Laa Pedr gonle me!

³⁵ Psiloque zho grop zho bzodiidz zho zha gon zho me nò zho nëz, per haxta horne no zho xtsee, zeene laa me beengrol quietxtil dzigoraa beenbey zho me.

Brieëquia Jesús lo grë xpëëdscuel me

(Mt. 28:16-20; Mr. 16:14-20; Jn. 20:19-23)

³⁶ Lëëtaaue sca nozodiidz zho, tibaue zeen gon zho laa Jesús zole lo zho ga, pquiaabdiuzh me zho, rëb me lo zho, peet tsieniedraa guic zho.

³⁷ Le! rdzieb zho, haxta rzhidz zho lo dzeb co, sac rëb zho bod ndziin ga ran zho.

³⁸ Dzigo bnee me lo zho rëb me:

—¡Pe nacne rdzieb to? ¿Pe nacne rliladzde to naa nu?

³⁹ Golwi len nia naa, golwi zhits ni naa ganle. Golxeen naa, zeena gliladz to ganle nli naaw; sac tel ndziina, mese naca, gacd xen tow.

⁴⁰ Sca quianee me, blu me nia me, blu me ni me lo zho, zaatne biaaz me clav.

⁴¹ Per nli rley zho, rzee zdoo zho, per rliladzdaue zho dien pe nlipaa lëë me ga. Gon me sca rac zho, nacne bnab me ncuaane gow me lo zho.

⁴² Dzigo bdeed zho tib lë mel bguiee lo me,

⁴³ bnaaz me meḷ co, squi ndxie zho goṅ zho dow me ma.

⁴⁴ Dzigo rēb me lo zho:

—ǰPe ib rsoladzde to nile naa laa grē miṅ rii no gac? Led ni naa lo to, grēse miṅe bzeet Moisés, grēse miṅe bzeet grē zha ne biadteed xtiidz Dios, miṅe raquietgaa lo Salm teed naa, ible laaw none gac.

⁴⁵ Psilo me clar nonee me lo zho, parne guienṅpaa zho zha zhobnee lo grē guits co,

⁴⁶ rēb me:

—Ible lo co zhobnee sca teed naa ne nac naa Mgui ne pxeel Dios, rneew ib no gut miech naa, per zeene gac tsoṅ ngbidza, laa naa grieegan.

⁴⁷ Rneew, Jerusalén nu, nu csilo gacnaṅ miech ible none csaan zho xquielntseeb zho, gnalo zho naa, parne guṅ Dios zho perdon.

⁴⁸ Ni to goṅ ganle grēse miṅ co, goca.

⁴⁹ Na leṅ dze ne ziaadaque nu, laa naa cxel Espíritu Sant gacniṅ to, sac ib scale nac xtiidz Pxoṅ naa. Per guiabde to niinaga grieeg to tsienee to lo miech, Jerusalénse nu goḷcuēz, haxta nieeda ygaa to poder ne gneedz Espíritu Sant lo to.

⁵⁰ Zeene goḷ dze ne laa me guey gbaa, dzigo güey me güeynie me zho nēz Betain. Bdziṅ zho ga, blis me nia me, psilo me noyunlay me zho.

⁵¹ Laa me quiayunlay zho, tibaque zeene laa me bias lo guidzliu, ǰgoṅlo zho laa me bzoquia gbaa!

⁵² Horco pquitsgzhib zho liu, beennon zho me, rnee zho grē diidz ndzon lo me; blozh ga ine rley zho laa zho wbi ga, bdziṅ zho Jerusalén stib.

⁵³ Psilo zho gzataa dze rie zho yadoo roolnie zho Dios, rdeed zho xquizh lo me.

**Diidz ne rdeed guielmban
New Testament in Zapotec, Mixtepec
(MX:zpm:Zapotec, Mixtepec)**

copyright © 1998 Wycliffe Bible Translators, Inc.

Language: Mixtepec Zapotec (Zapotec, Mixtepec)

Translation by: Wycliffe Bible Translators, Inc.

Zapoteco, Mixtepec [zpm], Mexico

Copyright Information

© 1998, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mixtepec

© 1998, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2018-11-16

PDF generated using Haiola and XeLaTeX on 18 Apr 2025 from source files
dated 29 Jan 2022

5317ca58-7555-5e4c-a420-e1e9210e2df2